

明瞿九思著

(國學文庫第參拾四編)

萬曆武功錄

中三邊三
東三邊一

北平隆福寺街文殿閣書莊印行

明 瞿九思著

(國學文庫第參拾四編)

萬曆武功錄

中三邊三
東三邊一

北平隆福寺街 文殿閣書莊印行

內曆武功錄卷九・十目錄

卷之九 中三邊三

波兒哈都台吉列傳

一

三娘子列傳

六

把漢那吉列傳

三

昆都力哈列傳

七

青把都列傳

九

白洪大列傳

六

哈不憚列傳

六

滿五索列傳

三

滿五大列傳

四

永邵卜大成台吉列傳

二

合羅氣把都兒台吉列傳

三

哈喇慎著力兒把都兒台吉列傳

四

銀定把都兒台吉列傳

五

哆囉土蠻把都兒黃台吉列傳

六

麥力哥列傳

七

克臭列傳

八

火落赤列傳

九

擺腰把都兒列傳

一〇

兀慎打兒漢台吉列傳

一〇四

卷之十 東三邊一

土蠻列傳上

一〇七

土蠻列傳下

一三三

萬曆武功錄卷九・十目錄

二
一

卜言台周列傳

一三

宰賽兀兒列傳

一三

黃台吉列傳

一三

額參列傳

一七

土墨台豬列傳

一九

滾兔列傳

一八

灰正列傳

一九

一克灰正列傳

一九

腦毛大列傳

一九

堵刺兒列傳

一九

小歹青列傳

一九

附萬曆武功錄自序

萬曆武功錄總目

萬曆武功錄卷之九

翰林院添註待詔 瞿九思著

中三邊 三

波兒哈都台吉列傳

波兒哈都台吉。黃台吉第五子也。隆慶末。以敖刺氣打賴賒進故。往往積怨於我邊吏。數引其眾盜邊。由此波兒哈都諸部酋。遂稱強熾。陽與青把都滿五大。之眾。往來我市場。而陰縱其部曲。以擾塞下。比比然也。久之。虜酋哈加氣哇哇。亡抵於塞上。請降。是時波兒哈都方從母威兀慎比妓。往順義王所。而部夷俄。蟀。闖兀浪。遂託名追亡者。迺帥五十餘騎。直走羊房堡大邊。潰牆而入。哨卒王江見虜猝至。走告關吏。虜迺發鳴鏑中江。江死。馬亦死。於是墩中舉烽火。號召邊將王尙忠。亟提兵追逐。生獲夷人託託及馬牛十數頭。餘酋悉遁走。時辛巳。

五月也。而會滿五大部夷銀定儻不浪道。逢滿禿害采大黃葉。滿禿害故青把都部夷也。於是微與謀。謀引眾百餘逐水草。從馬營大邊驟馬至黃家岡。而黃鵝兒。汪歹洪。大努木慎。擺言大。乘隙虜我松樹堡卒張宅玘。張永等。民餘霍子胥。王加友等。傷卒海銳等。民餘白四等。亦皆十餘人。而裨將曹祿見爲貢夷不加兵。迺使蒼頭軍宋天祿以鉤鉤銀定儻不浪。銀定儻不浪卽以刀砍天祿右大指及顙頰。遂解去。我兵亦生獲把禿敗。奪其鞍轡弓矢。兀刺氈帽。虜迺復從松樹堡走君子堡。執我卒宗世干等四人。而我僅捕滿禿害一人。虜始從三岔口走大石門川。鹵我軍十一人而去。日。諸夷百餘騎復行獵獨石大邊。適滿五大部夷那泥等。亦以二十二騎採菜相見。皆大喜。遂推擇五磕氣尹兔賴。祝穹廬。偕眾擁入大東溝。略我馬七騎。驃驢二頭。總戎董一元。亟遣通事人迭可赤尾其後。幸捕夷人五磕氣尹兔賴二人來獻繫獄。先是滿五大。滿五索潛通。

東虜犯遼陽。而制置使鄭洛。大會臺御史張佳胤。方謙讓虜王俺答急。答問青
把都。罰治滿五大。滿五大躬率諸酋長。鑽誓佛前。不復犯漢塞。至是兩臺讓書。
再至。而青把都。滿五大。具言實不知故。制置使以爲虜飾詐。所言不足憑。是日。
議免段柰台吉官。以段柰故受我指揮僉事秩也。而滿五大亦并絕其貢市。制
置使奏聞。上有詔。詔督撫相機處置。務要妥當。潛消釁萌。於是閉關絕貢市。而
臺臣復使裨將馬應時。通事官師國勳。偕通事人黑倉麻渠小敖八。大羊羔子。
陳貴。馳虜王營。虜王遂除波兒哈都台吉及滿五大職名矣。其七月。俺答遣討。
托兒恰等。諭諸酋長。是時滿五大住牧東北道遠。而段柰台吉則從母在王帳
中。諸酋脫脫儻不浪前曰。此吾等爲之。而段柰實不知吾等所爲。卽鑽刀說誓。
願太師幸哀憐我託託除罪。生還罰贖。惟阿王所命已。滿五大言亦如之。第罰
治。我自有法。俺答何與焉。於是俺答獨罰脫脫儻不浪及黃害。俄婢闖兀浪。馬

駝牛羊凡一百六十有奇。帳房一頂。而洛迺大會佳胤及部使者茹宗舜。議釋託託。復波兒哈都貢市。而以馬牛八十。給王江家室。贖死者命。他悉予俺答及積功勞者。夷哩甲兒氣哩山兔。有差事聞。上從兵尙書梁夢龍議。賊夷姑免死。發與俺答。照夷法處治。已賜俺答。恰台吉及黃台吉。託託兒等。金幣有差。居四年。內戌。夷人毛七賴等十五人。小入盜我千家。衝溝口馬驛。久之。牛兒蓋等二十餘人。又至大定臺。索酒食。弗可得。奪我兵弓矢而去。我兵霍玠。追至碾兒溝。捕獲生口。端公張達子。後關吏詰問。皆段柰台吉部夷也。於是輕重罰治馬牛羊如初。而馬牛羊卽以易金錢。佐縣官撫夷費。從制置使鄭洛請也。居亡何。上谷卒出邊樵蘇道。逢段柰台吉部夷。我兵執而僇之。磔其戶以徇。洛迺條對。以爲此道上行夷也。我士卒何與。而直欲以明威。此太過。且恐異時此酋將率眾寇擾亡已也。其後戊子。段柰台吉果寇鈔我小白陽堡。略我男婦凡八人。軍

馬凡三百有騎。備新平者。將管一方。隱匿不以告。於是御史王之棟及給諫張希皋。按論之。上有詔。免管一方官。頃之。扯力克及青把都。罰橐駝馬牛羊凡二百有奇。於是兵尙書王一鶚。請復段柰貢市。賜扯力克。青把都。金幣有差。段柰自是輒悔過。當庚寅時。扯力克助逆。我聞段柰兀慎。擺腰之屬。皆偃旗鼓。高臥穹廬也。波兒哈都。或名跋兒哩都。或名奪柰台吉。或名哆柰台吉。

讚曰

令甲凡罰馬牛羊。旋卽以賞酋夷。如爲足以示罰也。夫堂堂大漢。得一馬牛羊奚賴。以夷酋得之。足利賴矣。今觀段柰。故我漢官也。數入關。而數擾我軍民者。旣皆爲其部夷。而今迺曰一切無所與。然乎否乎。藉令而與。亦不過罰馬牛羊。而又旋以予虜。此於虜酋何當哉。善哉。制置使鄭公。請毋以所罰予夷。以杜夷覬覦也。

三娘子列傳

三娘子。又名也兒克兔哈屯。故俺答妾也。始封事成。實出三娘子意。數蒙漢上賞。而黃台吉母矮克哈屯。黑台吉母一克哈屯。皆不與焉。已俺答西行。亦三娘子與俱。蓋自爲妾時。已藉藉有聲矣。後辛巳。答不幸物故。三娘子率黃台吉等告訃於關吏。上幸使使者。祭弔如禮。是時奉表稱謝者。皆哈屯爲主。名哈屯。卽三娘子也。上從廷臣議。賜哈屯大紅五綵綺絲衣二襲。綵段六表裏。木綿布二十疋。他皆有差。其明年二月。制置使鄭洛。遣通事吏馬應時。師國勳。安天爵。王志寶。王國鎮等。東西馳布。告諸酋虜故事。歲以二三月。臺臣使使者。佯爲趨貢。以諷虜情。於是三娘子亦遣夷使土骨赤。計龍等。請寬假貢期。時方以寇盜之事迫。而又苦旱。草枯馬羸。以故三娘子得託以爲辭也。制置使迺迫使者。堅弗許。第令其表文不用印。以示無嗣王也。其三月。黃台吉諸部先入貢。曩時諸小

酋必俺答貢事畢。後先入邊。大火已西流。而邊吏尤怪黃台吉不至也。是歲以嗣封事。黃酋獨先至。其六月。哈屯及龍虎將軍黃台吉等。進番表及馬九匹。鍍金鞍轡。鍍金撒袋各一副。弓一張。箭十五枝。已以書請諸酋與刺麻僧哈望噴兒刺爵賞。後一切賞勞如所請。其十月。三娘子遂與黃台吉合婚。娘子爲人有色而擅寵。以先王俺答之慄悍。且屈首聽命焉。此非黃酋所可約束。識者已知其不久必死此婦手矣。其明年二月。黃台吉嗣順義王。其九月。三娘子見大成比妓。擁俺答所遺諸部落及板升。甚雄。謀欲爲不他失禮室之。而陰以爲利。恰台吉與三娘子政有隙。弗從。三娘子亟使酋長扯布土骨赤。計龍等。引精兵二千人。圍大板升。會莫。弗能接戰。恰台吉與滿谷舍儻不浪迺。以旦日爲期會。於是治兵。如扯布。披戴盔甲。大戰於板升。殺扯布等夷人八十餘人。獲生口二十人。傷者亡算。奪獲盔甲三十副。它駝馬百餘匹。扯布亦殺恰台吉。夷人把兒孤。

大等五人。已殺六人。傷亦相當。又乘機至所奪馬牛及帳房夷器。兩家皆棄置田野中。並弗問。已宰生儻不浪。又乘機略恰台吉諸臨邊夷千餘人而去。亡何。諸臨邊夷多走鐵山堡。徼惠於巡邊夷人悖洞子等。請得居內邊。以避宰生儻不浪。已土兒寨張筆寫器等二千餘人。亦至殺胡堡。聲言吾等皆恰台吉部夷也。而爲宰生儻不浪所鹵。今以不能相從。故迺逃而相告。願關吏爲我啓鑰。兩堡皆弗內。於是諸酋各引去。是時三娘子必盡欲得板升。而恰台吉又不肯秋毫有所予。解忿者甚難。以故虎兒害及兀慎。擺腰皆遠去。而獨哆囉土蠻麥力艮。裸兒都司切盡黃台吉。實有意焉。大都又惡三娘子。出入兩王閒。專柄兩王。皆弗能制。遂至倚勢以凌人。而況黃酋。則又非諸部所心許者。人人欲假手恰台吉以報。今麥力哥至。私饋恰台吉米一百袋。牛一百頭。以佐鬪。然則三娘子之弗能克。豈不可知哉。其十一月。恰台吉鹵三娘子馬百餘騎。於是諸台吉與。

兩家約。約母得殺人趕馬。弗如約者。吾等得與眾共罰之。亡何。三娘子度諸講和者皆不過欺嫚我。不足採。我終不聽諸講和者言。迺遣夷人往鈔諸板升畜產。而大成台吉娘子率眾援板升。不使東哨得鹵略。於是諸講和者怒。以爲吾等不過爲兩家好耳。娘子既不從我。我豈能從娘子哉。於是佐板升治行李。盡闕匿他哨中。自是之後。恰台吉亦奪東哨夷人捨刺太恰馬四百匹。是時諸酋方殺馬牛以爲食。食盡罷於軍旅。怨甚。而計龍土骨赤。扯布。又日夜阻三娘子。三娘子不從。復徵諸部。令人治羊駝各一頭。馬五匹。米三斗。期生獲恰台吉及黃鸝兒。躋兀捨儻不浪。而後休也。其明年春。扯力克起。亦欲娶大成比妓。於是恰台吉幸爲扯力克地。竟爲扯力克所得也。三娘子益大怒。誓以死相仇殺。語在扯力克傳。其四月。三娘子部夷卜吉素等三人。盜我殺胡堡邊。爲邊吏沈棟所捕。往告三娘子。三娘子請以馬十一匹。牛一頭。羊六頭。得除罪。是年順義王

及三娘子以稱兵故。未赴市。於是備兵使王學書請於臺御史胡來貢。俟于趙。令虜王得遣酋長。至關市受賞也。其明年十二月。黃台吉不幸病。蚕天。上賜祭葬。視俺答。而三娘子及扯力克叩謝如禮。語在黃台吉傳。是時三娘子匿王篆及兵符。欲以私其所愛子。不他失禮。而與扯力克頗不相能。扯力克迺自立爲王。其明年。三娘子始悔過。而以十月十一日三更。召扯力克入帳中。掛弓矢聚斃。然三娘子部夷牙答漢。猶盜我助馬堡。而洪賣。盜我偏關也。三娘子一切既罰治如法。不欲以干我塞上旗鼓。於是偕扯力克及套虜及番僧入貢。上皆遣使者燕勞之而去。是時麥力哥把兔等。大鈔我酒泉。而兵尙書嚴清。悉如制置。使郜光先議。請繩以流虜東歸。然後予嗣封。其明年三月。竟以扯力克嗣。而封三娘子爲忠順夫人。賜大紅彩段粧獅子衣一襲。綵段六表裏。先是扯力克及五路等。爲三娘子。請一品夫人。已請王妃名號及誥命冠帶。大都。以三娘子在

俺答時爲寵妃。而又主貢事。積功勞。以故諸酋又得爲阿王母言也。其六月。扯力克三娘子至得勝邊迎詔。其七月。遣酋長滿兀害儻不浪等。進表文一通。白馬九匹。叩闕下謝恩。如蒙覆載。上復賜大紅五綵綺絲衣一襲。綵段四表裏。是時扯力克新嗣封。而又盡得大王父所貽精銳士。大自威武也。且年少。幸與三娘子等。此必中三娘子歡。而三娘子亦歲時服漢皇帝所賜五彩服。甚艷麗。扯酋心愛之。寧損乃公乎。好色不已。必不忍一時之雄。或好兵。好兵不已。然後疲而思安樂。亦惟三娘子左右之。是時麥力哥發難。漢方讓順義王急。而會火落赤尤甚。三娘子果乘隙佐順義王往。辭曰。迎佛及收賓兔諸部。以欺我所不意。其明年二月。三娘子亦移壁哆囉土蠻。其五月。遂大入河西境。其八月。請市馬鎮城。其明年秋。扯力克與火落赤大寇我洮河。而制置使梅友松亟遣通事人陳有齎檄。馳三娘子所。知扯酋聽三娘子言也。三娘子即使使者告順義王。趨

東歸。往來者言扯酋殊不欲歸。而迫三娘子言。猶豫者久之。而給諫徐桓。度三娘子必以言不見聽。有離心。計莫若乘此時。陰款三娘子。而立其愛子不他失禮。悉分封諸酋。如五單于故事。以離其黨。其明年。又三月。扯力克。如三娘子議。迺以書請假扁都。其六月。復請假鎮羌。其九月。竟從鎮羌驛出口。還故巢。語在扯力克傳。自是之後。計禽史酋。以請復市賞。頗相安於無事。數載而來。雖卜失鬼之族親。嘆拜之多財。誘之。猶不來也。

讚曰

三娘子。以一婢妾賤人。而得專三王寵。夫豈獨以色勝哉。觀大板升之戰。且知兵。柰諸酋不從何。始黃台吉所奪諸酋婦至多。及一朝得三娘子。而盡棄之。此不可謂能乎。每讀番書。出三娘子者多委宛。則未嘗不怪柔媚之傾意。信有之也。

把漢那吉列傳

把漢那吉。鐵背台吉長子也。生四歲喪父。孤養於大母。及長聘兔捨金女。而爲俺答所奪。以與襖兒都司。於是怨而亡走漢。漢授以指揮使。已歹通等六十餘人至。已討討兒等四人至。已啞兒兔及妻那蘭住。妹哈喇慎子般不害。女綽胡兔至。牽引馬牛羊充塞塞上。於是副總戎麻祿。提兵出亮馬臺受之。時隆慶庚午九月也。其十月。臺御史方逢時度把漢那吉親俺答愛孫必大索塞上。迺遣偏將軍備雲西諸城堡居頃之降人沈世庫言。胡中私議欲以趙全周蠻子贖把漢那吉還。而會俺答遣黃台吉提兵二萬餘人馳威平堡水泉州。旦日移大小莊窩羊順坡止壁。去平虜城可六十餘里。迺大言索那吉曰。與我孫我馬牛羊橐駝及板升諸首級。惟漢太師所命不然。吾且引諸騎入城。大鈔迺城中也。是時我雲中兵僅萬餘人。而裨將劉廷玉亦大言以報之。若必欲得那吉。須退

舍獻我板升諸叛酋。然後可不然者。吾塞上精兵三十萬方雲屯。視禽滅而俺答黃台吉若九牛亡一毛也。黃台吉聞而大喜且懼。是日卽遣小酋長腦木舍偕土忽智詣逢時所。因引至東城。召見樓上面與語。語大略與廷玉同。腦木舍還報。於是黃台吉退舍。秋毫亡所犯。是時趙全等方治食物。日莫以奉俺答。俺答猶豫久未決。其十一月。俺答黃台吉。遂執趙全等來獻。上幸從廷臣議。賜以幣帛。燕勞之而去。其明年貢市成。語在俺答傳。其五月。把漢那吉貢馬二匹。有鞍轡。其明年癸酉。上新卽位。諸虜酋入貢益恭。詔加賞賚以優之。是年冬。把漢那吉獻我叛人李四。劉洪四。宗璉。詔賜把漢那吉衣一襲。表裏四之。居歲餘。丙子。制置使方逢時念。把漢那吉久主貢市事。積功勞。請勳階。上幸賜階昭勇將軍。其明年十二月。俺答率十萬騎西行。欲畱把漢那吉守市。後竟與俱往。居西海凡二載。日暮從諸比丘後。習佛事。殊亡他腸也。其後庚辰。譯者叢文光深入。

虜營。而以忠孝經。督把漢那吉及擺腰。於是制置使王崇古。請比譯者馬繼志。授大鴻臚序班法。優文光。詔可之。是年冬。順義王俺答死。又明年賜北虜勅書。而把漢那吉猶與焉。其明年癸未。四月三十日。把漢那吉出行獵。墜馬死。於是乞慶哈及酋長恰台吉。妻把漢比妓。告訃於臺御史胡來貢。而是時胡中諸部哭之甚悲哀。謂把漢那吉妻幼子稚。無所歸也。於是比遼左王果事。請諭祭。詔可之。其十月。以子朝木台吉。襲昭勇將軍。把漢那吉旣還。十三載。無所事。日誦佛經數萬言。閒則行獵塞下而已。以那吉所部精兵三十萬。而獨我交克等。屢屢盜陽和邊。則其忠實豈不可知哉。而竟不得襲者。以倫次當屬黃台吉故耳。不然。夫豈不知首款之功也。把漢那吉。或稱把都台吉。或稱大成台吉。或稱大成矮吉台吉。或稱把漢孫。妻把漢比妓。長朝木台吉。次克木台吉。

讚曰

天道無親。常與善人。若把漢那吉。首款塞。後至擁精兵三十萬於塞上。秋毫亡所利。可謂善人非與。卒之身死未一載。而爲扯力克。卒然有其妻。此豈無天道之極哉。又聞把漢孫之子幼。胡中每一言及。輒涕泣。此必有以感之者。母迺番僧動以番經。叢文光動以忠孝經。而得之漸磨者深乎。不然。何中外皆稱其誼也。

昆都力哈。青把都。白洪大。哈不愾。滿五索。滿五大列傳。

昆都力哈。俺答同母弟也。逐插漢根腦及大沙窩三間房水草。旁近三衛。常以精兵三萬。政自强大也。嘉靖中。夙有志於我汾州。隆慶初。偕土蠻寇我棒椎巖。墜巖死者。動以千數。居一二年。以俺答約。鈔我石州交汾間。昆都力哈輒驩甚。亦謀欲寇蔚州。遂引眾走偏頭關。驢皮窯及老營。青陽卯入。已復欲分道馳。而以黃台吉寇新平。把都兒及永邵卜阿兒都司。蒿奴。梁落土蠻。寇大同。獨坤的里罕不從。迺大鈔我獨石。永寧。然牛馬道死者萬餘。慘矣。而給諫歐陽一敬。溫純。後先以其狀來請。是時昆都力哈。春秋逾五十。胡中號爲老把都。然甚好兵。母厭。而會史大等盜。老把都馬牛二百餘頭。老把都益大肆殺略以報之。因略我漢人七口。驢二頭。而俺答方請通貢。有萌芽矣。制置使王崇古。迺薄責以斯事。老把都悔罪。急還我漢人及驢。而自謂亦不復殺史大也。惟漢太師所命。漢

太師遂予段紺。老把都乃躬率妻若子及其酋長南嚮羅拜受所予置之神車。大喜過望。其明年辛未上幸從廷臣議許以把漢那吉還老酋復得孫喜甚始逸去。是年夏五月貢市成俺答爲昆都力哈請封二字王後竟授都督同知於是與俺答等遣使入貢上幸賜襲衣表裏已昆都力哈續至得勝堡外制置使王崇古令備兵使燕勞之因與諸酋爲盟而退其六月赴張家口市獨諸部後至閉市昆都力哈迺與黃台吉請續市從之是年臺御史孟重躬至市監臨以昆都力哈請也先是臺御史劉應箕辱臨弘賜堡乘得勝市布告法令以故諸虜酋皆必欲徼惠於臺臣而後始愉快其明年夏老把都吉能以罹霜露病貢與市皆不至邊吏不知故而以爲把都與土蠻通婚媾久今或背盟行且舍宣大而圖薌遼不可知而又恐合土蠻則舍薌遼而圖宣大又安可知乎頃之永邵卜貢至而後知兩酋淹滯牀蓐間也老酋且屬使者把歲器有後言言病愈。

我且往入貢。幸邊吏寬假之。亡何。昆都力哈吉能東山。各以訃告矣。俺答如失左右手。日夜哭。亡聊。迺誦佛經。欲陰爲兩酋地。是時制置使王崇古等。亦使使者往弔之。而適雷擊死夷馬。於是昆都力哈妻一克哈屯。方擇日祈禱於皇天上帝。迺不受漢使者弔。初。酋婦及其妾猛可眞。妄聽小人言。疑夫爲漢所斃。鎮死。政悲憤。易我漢使者。而伯子把都兒黃台吉。仲子青把都。女太松阿不害。子壻索郎儻不浪。獨從旁曉譬。母背順義王約。因稱謝。敢拜使命之辱。自是貢者竟青把都及太松阿不害也。始老把都。得勝外邊之言曰。東有昆都力哈。永邵卜大成。西有襖兒都司。我三家相愛敬往還。所不一心者。天實擊之。順義王方新稱臣。而老酋及永邵卜。無故過疑我塞上用釁。此大非順義王意。妄甚。於是皇天果驅雷擊其馬牛羊。亦從老把都盟也。

青把都。始故授我指揮同知也。所居在大沙窩。三間房。旁近赤城。壬申秋。法當

貢馬一百匹。而以父坳方在哭涕之位。迤北黑夷又略青把都帳房三十項。殺八人。遂得有辭於邊吏。曰。頃以黑夷故。政凜凜。惟穹廬是保。而順義王適命至。青把都政在行閒。幸寬假我期會。我固不敢自外於貢吏也。其明年癸酉。上新卽位。青把都偕永邵卜。以九月至。且有續貢。惟是不腆敝貢。敢以贖壬甲不至之愆。是時老把都妻若子。益爲三衛姦夷所誘惑。堅執我毒死其夫。而永邵卜亦以一二小酋偶死市場。疑與酋婦同。而加以土蠻諸部。大肆殺略。御史孫鑑深恐青酋數往俺答營。必解盟。而況俺答親黃台吉父。青把都伯。夫豈不能約束其子若姪哉。而陰縱兩酋爲亂。謬爲恭敬。挾我必厚施。以求解忿。得乘爲利。亦安可知乎。至是款塞。塞吏聞而愉快可知矣。臺御史吳兌。乃請以青把都轉都督僉事。是年。青把都以十一月赴張家口市。御史陳文燧。請著爲令。令以二月杪貢。五月初旬市也。其明年七月。青把都偕弟哈不慎及永邵卜大成等至。

已又續市。進鞍伏弓矢一副。其九月。遊擊將軍謝惟能告倣于備兵使崔鏞。韓宰言西虜青把都方祭旂纛。佯以寇遼東爲名。而實志在界嶺口。義院口之閒也。制置使方逢時聞大驚。以爲入市曾幾何。而卒有此音。殊未可信。第巢穴旁東虜察罕。而又以女東桂。適長昂。或垂涎於青酋。得西市利。而故駕言西虜。以逞己奸。遂至奪其利。而固其黨。時或有之乎。是後給練李戴。蔡汝賢。後先皆上書。議亦如之。亡何。通事人劉江。又言青把都提兵二萬。馳土蠻。謀欲寇山海。制置使楊兆。亦以狀來聞。而會俺答書至。言青把都業已聚兵舊開平。志在寇上谷塞。殊不可繩以法令也。制置使以爲此亦俺答故智乎。亟使使者諭之。青台吉。黃台吉等並治兵獨石邊外。使者因曉譬以禍福。彼迺曰。何乏若薊鎮撫賞皮及蟒段也。卽予予朽敗。然則諸酋之內訌。抑有由也。邊吏何不如約。毋使胡馬牧於塞上乎。於是大司馬譚綸。按御史陳文衡奏。謂薊鎮故無此例也。咨所

在嚴爲備邊。其明年四月。土蠻大會青把都等二十餘萬。馳大寧舊城。而臺御史張學顏。乃急遼東上書。請薦鎮入衛兵及火藥一千斤。鉛彈二千斤。其後大將軍戚繼光。徐而察之。果屬夷長昂假外父行。以便已搶略已耳。制置使吳兌。即使使者安天爵等。譙讓青酋。青酋曰。吾未嘗有犯塞意。今所言皆虛妄。吾第欲鈔朱赤諸達子。果有之。然亦未遑舉也。旣奉漢太師命。敢不退舍。而惟貢事是圖。柰何重以煩太師乎。是後貢市不乏絕。其明年十月。打刺明安兔行獵。至膳房堡。而縱諸部夷盜邊。副總戎賈國忠。使使者問諸俺答。答迺讓青把都。於是罰治如法。語在俺答傳。其明年二月。青把都與屬夷討孫卜賴。有隙。欲因緣子壻長昂以報之。遂與母哈屯及其弟麟古太。麟古塞。哈不慎等。馳昂營。祭神。引常擣勞等三千餘騎。道斗里庫。五兔牛。直擣馬牆子嶺。於是討孫卜賴降之。而獨那莫大受兵甚。其八月。青把都入貢。請市馬。視山西大同數。自言吾兄弟。

五人。擁精兵萬餘。何渠順義王不若乎。而制置使兌。亦言青永入貢。與俺答等。亦歲以八十八人。奉馬二百五十四。得稱金吾將軍。豈不揚揚威武雄塞上哉。其十二月。青把都復引二萬餘騎。馳長昂營。謀欲寇前屯。而臺御史周詠。以其狀來請。大都。青把都入市。未幾而卽馳昂。昂固其主臣。而加以長禿。董狐狸。章兔。鵝毛兔輩。爲爪牙。以故青酋得以掩飾其姦。而猶要我西陲市賞。及我問其故。則彼乃推委於不可知。而益以巧言欺嫚。我不知我大將軍視青酋反狀。如見肺肝也。其明年五月。青把都復入貢。已復張家口市。然互市之初。虜馬在上谷。不及二千。而今已漸增至三萬六千餘矣。御史安九域。甚言青永諸酋。吾上谷不能支也。爲之柰何。其七月。青把都使使者偕長昂款塞。請入貢乞賞。語在長昂傳。其九月。大會辛愛及三衛諸酋。又聲欲寇遼東塞。總戎李成梁。因驛騎以聞。其明年八月。遂與土蠻。老思罕合營。大率控弦之士十餘萬。於是蟠古歹。

等。先馳哈刺母林。御史于應昌及給諫王致祥。後先請備邊至悉。其明年五月。青把都部夷滿禿害等。盜我松樹堡。君子堡邊。略蒼頭軍宗世千等四人而去。而五磕氣及尹兔賴。又犯我大東溝。獨石營。然皆藉口於打牲。已迺罰治。請除罪。使我塞吏。終不得執以爲辭。而且貢市不乏絕也。語在波兒哈都台吉傳。其九月。委正約青把都。寇山海迤東。居歲餘。癸未。青把都又大會逞把都兒。謀欲殺速把亥。已復與嶧古塞。從東虜把漢大打來罕等。寇寧遠。是時長昂。蒙薊覆載恩久。而哈不愾。在上谷塞。亦如之。迺東西合黨。巧爲彌縫。東虜則藉資於西。而西虜又復附翼於東。已乃各至我關市下。我亦予之以上賞。亡不人人各極其歡而去。抑何姦也。兵尙書兌甚怒之。令大將軍治青把都。以故縱罪甚當。其明年正月。制置使張佳胤及臺御史李松。以潘陽堡捷聞。蓋所殺多青把都掌喇喇酋也。其五月入貢。且赴張家口市。皆如初。其九月。長昂罰諸敗北者馬牛。

已。青把都從所居白言舉兒克。引眾馳長昂營。聲言祭神。又言欲駝米。號召諸酋。以示漢不意。御史蕭大亨。具如夷人滿都不賴言。以請頃之制置使佳胤。輒又言聚兵大寧城。老河。於是乎薊鎮義院口告徹矣。是時部夷小阿卜戶。不與青把都俱往。迺借兵西虜。挾我開牆子嶺。曹家寨賞也。時佳胤習知邊事。見此。曾牽制我首尾。使我力分備寡。既不得併力於東。又不得忘情於西。乃佯爲治曹家路諸將卒罪。因而捕之。小阿卜戶覺。乃遁去。其明年四月。爲哈不愼請罪。語在哈不愼傳。是年七月。以哈不愼故。獨使使者曲兒會齎貢至。然馬少十四矣。其八月。以猛可真事。佳胤遣裨將李如棟。問諸青酋。青酋曰。太師不自治之。迺問我何爲者。於是佳胤決策欲主勦。塞上烽火候望。益精明而嚴矣。猛可真始惶懼。叩闕而請曰。惟太師幸赦我死罪。其九月。長昂亦至。先是閉關久。諸窮夷被困。怨甚。至是青把都始悔過。迺與昂婦東桂。促之款塞。得除罪。是月。青酋

與順義王遣使至關中爲卜失兔。請增市賞。從卜失兔約也。語在卜失兔傳。其明年正月。青把都及滿都不賴復有雄心。乃治鬪器具。欲俟草青馬肥。大入遼東塞。以報潘陽之役。後六月。法當貢。青酋則復委首從諸酋。後牽馬至魚鱗雜遜。其八月。縱諸部寇我當路塞。非那詭至獨石城。則擺言大卜落赤攢謄戶。後先馳張家口也。其明年六月。御史孫愈賢。以青永等市馬無定數。請著爲令。令上谷毋得踰二萬匹。雲中一萬匹。制置使洛。恐青永及打刺明安部落至繁衍。不可以倉卒議損。遂寢。是歲也。貢市如初。其明年春。以罰治段柰功。幸賜金二十兩。綺綵衣一襲。表裏二之。布十疋。其明年夏。大酋首哈羅氣。擁萬餘騎。雲屯張家口外邊。青酋亦從旁坐視之。皆以虜王西牧亡所約束故也。其明年。青把都入貢。及市張家口。益恭順。視曩時倍之。是日。聞制置使洛語及西事。即使使者致聲虜王。趨東歸。居亡何。土蠻及土墨台豬。使使者借青把都兵四萬。長酋。

迺帥青酋子扯稱阿亥。先應之。其先恭順。非青酋意也。其明年正月。土蠻果引
青酋寇海州。甘泉而去。我師擊其惰歸。斬首捕虜凡九十餘級。御史胡克儉及
給諫張棟。皆以書劾奏副總戎張守廉等。始養寇罪。大略。以蘇家窩零騎。不至
三十。泥溝堡不至五十。而又會大雨雪。虜大羊陷西古城。何至我男婦被圍者
三百人。不聞一馳救也。始青酋歲以十月得往東。祭先人墳墓。邊吏輒私勞以
金衣。費凡百餘金。驕如是。安在其能制其死命乎。甚至部夷若虎兒合氣妻我
希舍兒。小小四娶我歌兒。腮汗妻我頂子尖胯。羊羔子妻我張氏。唱小廝妻我
小廝兒。薛目妻我吳氏。且役使我把漢。黃天祿。百戶趙思景。爲買屋居以居之。
名爲守貢。而一歲之間。僅以半歲往胡中。他皆居漢室。妻漢婦。僂然忘爲其胡
虜也者。嗟而土室之人。攜我塞上歌兒舞女。喋喋而咷咷。陋固何當乎。曩者張
斷事壽明論之。始知江充徒戎。原非過計。第以戰守和三議。時出而互用焉。虜

在我掌中矣。

白洪大。把都黃台吉長子也。始授我指揮同知秩。後以大父蚤天。所部皆統於青把都。癸酉冬。制置使吳兌。請襲祖父都督同知。詔可之。自後貢市不絕。儼然以龍虎將軍歲時從青把都赴張家口市。頗號清晏也。居亡何。青把都發難于遼東。而白洪大輒與俱焉。遂偕老沙。結連東虜。鱗戶伯戶等。謀欲寇我寧遠。前屯塞。然亦青把都誘之。及哈不愼之事。白洪大輒譙讓以大義。亟謝過。此可不謂義舉乎。白洪大。何前倨而後恭也。

哈不愼。又名來三兀兒。昆都力哈第三子也。入則與青把都市我張家口。出則從土蠻。黑石灰。速把亥。莽骨大。莽骨能等。大鈔我東陲。上卽位。頗聞在上谷塞。輒以指揮僉事奉約束。斤斤唯謹。獨無柰橫行乎薊遼也。丙子冬。沙河東關之役。諸虜酋以二萬騎乘虛而入。幾破城。賴大將軍李成梁兵得亡恙。是月復連

長昂等寇我寧前錦義之間。自恃與昂通婚媾。可藉以無恐。而加以阿兄青把都。有積怨深怒於討孫卜賴也。數引眾入塞。不意我塞上卒強。多所殺略。以故哈不愼等日夜欲報之。自是之後。諸酋數發難于薊遼者。皆哈不愼謀也。庚辰夏。連騎數千圍我劉五臺圈。殺略人畜。焚燬草屯。亡算。會臺御史周詠行。海州諸營兵馳救之。遂引去。然諸酋甚狙詐。欲擊東。則聲言于西。塞上未嘗須臾忘備也。明年春。土蠻復欲有事于錦義。而哈不愼。疇古歹等。乘隙而起。以疇金兒爲鄉導。時備寧前兵者副使李松亟請于制置使梁夢龍。頃之。虜騎二萬塞道。以惑我無它備。我兵竟分道而馳大青松山之間。以故虜計得不售。時給諫王致祥及王三餘。後先上書。大略。惡哈不愼輩受賞於宣大。而入犯於遼陽。大爲彼所欺慢也。請革其撫賞。以創艾之。居歲餘。癸未。制置使鄭洛議亦如之。故事。哈酋歲從青永貢馬十四匹。是年。上詔塞禁哈酋母入貢。而屬青把都罰治如法。

先是。土蠻弟小打兒漢中流矢。而哈不愾諸部夷被創痍獨甚。兩酋益不能謝前過。欲報之怨。其九月。哈酋引二萬騎。大會土蠻及大小委正等。欲鈔我寧遠。山海。桃林口。於是備兵永平副使成遜。請于臺御史翟繡。爲山海關以外計。計築垣壘壕。以待之。亡何。哈不愾不至。於是小委正走廠房。大逞克世等走水汲。一克灰正走宿商。期旦日並至山海關。而以四萬人入關。二萬人阻遼兵至者。而不知我偏將軍王守道。杭大才等。先已備中前所及前屯衛矣。頃之。虜騎果自前屯衛。三山營。冉冉而來。我師亟走老君屯西。李家山臺。去關不二十里。逢虜騎五千餘。鑿圍吾師。我師僅二千人已耳。虜皆下馬牽甲。而以白旗麾諸虜。虜亦惟白旗是瞻。旗一引。虜十餘騎。於是。我師發鋼輪大礮。虎蹲礮。自日中至日夕。大戰五十合。然後退一里休舍。殺傷大當。于是夜。參將守道乘虜退。夜半。帥諸軍執把刀鎗器具掘壕。而以盛運土壤。至深五尺。火礮多壕置外。我師

環甲擊刀牛以自衛。旦日虜乃以零騎分爲二道。一道徇前屯。一道徇一片石。新堡會遊擊戴朝弁都護霍貢深溝固壘。又先期令諸村落斂牲畜。虜遂弗敢前。乃於營中舉火。焚其輜重及糧糧。而以七八騎衝我南水關。我軍王有功。中流矢死。獨林見得遯走。於是。以四騎追至東嶺。賴我師鼓噪得解免。守道見營中被圍急。乘夜漏盡潛出營。告急于制置使張佳胤。乃亟遣臺頭路及燕河路。宣府營三屯右營兵將至者。四面皆壁丘家山。旦日虜以鬪器少。取居民門窗木片。以爲扞蔽。而我軍大藥弓弩亦幾盡。守道計帥三軍。以悶棍潰圍而出。而適副總戎楊紹勳兵至。鳴礮。道知其爲應兵也。亦鳴礮。虜大驚。稍解。紹勳得進與守道合營。虜復衝鋒而前。我師殊疾力戰。斬首一級。奪獲達帽。套靴及達刀。鉤鎗。護胸及達箭一百八十六枝。射回箭一十四枝。頃之太平寨及喜峯路。駙馬寨界嶺口。劉家營兵。又皆詣山海關。虜度弗能敵。是日日晡。迺東過前屯衛。

從沙河站高臺堡而去。迺屬永平倅李一言司理。宋伯華按驗我軍死者僅一人。傷十二人。馬驥亦二十餘耳。其十月。哈不慎始道大寧城。過塔盤。直走敖母林。與大正委正會。具告以故。令亟易馬。以報前日之役。哈酋因馳罕赤保哈。約諸酋復寇前屯。山海制置使佳胤度虜騎復至也。乃以兵備山海寺兒谷三道關。而令有敵趨諸軍。赴一片石黃土嶺。以禦之。亡何。虜從前屯大古路口。走山海關。過歡喜嶺。我軍候知敵急。趨告守道亟提兵出關。虜已分爲四道。一道衝一片石。奪人畜。騰走南山。裨將戴朝弁麻柏霍貢。追逐。奪還周安李真等凡一百三十三人。牛驢凡二十一頭。又二道衝南北水關。以裨將張蘭等備兵嚴畏。火箭快鎗石礮擊郤之。四道衝關廂新羅城。城北工未就。欲乘隙而入。百戶陳守仁拒弗克。死之。守道乃躬率諸軍。大戰數十合。虜稍退。我師奪獲達帽。氈口。守仁拒弗克。死之。守道乃躬率諸軍。大戰數十合。虜稍退。我師奪獲達帽。氈口。

袋鉤鎗盜纓達箭各有數頃之虜乃以零騎奔一片石先是關下鋼輪石礮甚具而指揮使林樹勳又戒塞下母出牛畜虜知我有備大懼退而走東嶺殺我居民張貴等三人虜孫虎等六十五人傷譚昇等二人略馬牛羊百餘頭糗糧七十七石燒室廬一十九所車一輛已縱百餘騎馳關外焚新堡子鄭家莊遂走八里鋪多所殺略然後中分軍而以一軍爲營一軍走中前所守道等提兵追擊之虜復走老君屯是夜虜從大古路口遁走頃之御史李東劾奏請失律者將岳汴劉登太王守道杭大才以請而制置使佳胤謹按故事宣大以戰爲守薊遼以守爲戰但使匹馬不入卽爲首功茲役當以血戰爲功而略其損軍之罪以保全城關爲重而原其虜掠之未於是兵尙書吳兌覈山海事覆奏大略以山海關及八里莊去前屯七十里去山海七里今遼東城堡無失而八里莊殺略甚多太等未可盡謂無罪唯上所財察於是左遷岳汴而以劉登太王

守道等戴罪視事。其明年正月，西虜蠻兀等復引眾馳長昂營，蓋爲哈酋。憤山海關之未逞也。先是哈酋約復至，日夜引領以望之。居有頃，哈酋乃至。伍胡罵而與昂會，謀欲寇寧遠東西塞。其二月，又欲寇前屯。已，又欲寇開原、鐵嶺及廣寧迤東。其九月，遼陽大風霾，以十日夜不息。先是哈酋提兵四萬往，上迺有特詔，屬中貴人張宏宣示大司馬，謂虜眾東行，戎心叵測，有如賊夷借兵入犯，宜相機堵截。是月，上躬視山陵。於是御史張文熙上書言：「哈酋兩寇山海、長昂，直搗劉家口，皆去長安甚近。於山海關輕騎可兩日至，劉家口可一日至，甚爲剝膚之災。意在請上返蹕。」其十一月，速把亥等又謀犯三岔河。已，遂與哈酋、莽兀、歹板卜來等合兵，復謀犯寧遠東西塞。其明年四月，哈不愾漸悔過，又見貢夷數受漢上賞，獨已毫亡所得，乃先遣部夷插漢我不良及其男小歹成、姪班不刺什台吉，牽馬四十四匹，牛二十五頭，羊六十頭，赴張家口曰：「敢告關吏，請以

此贖罪可乎。制置使洛見以爲哈酋不聽阿兄青把都約束。敢於峒喝。固亡道甚。今所請亦不躬自來。乃率眾至邊。此不過託名于講賞。而實要挾我。況哈酋犯遼。又罪重也。非牛羊所可贖。洛寧益堅閉不許。頃之。哈酋亦引眾至。旁近塞行獵。聞制置使議。大拂初意。乃頓足歎曰。塞上豈爲我獨不能逞于宣大哉。卽引眾從雲州兩河口入鎮安堡。我堡將李春提兵發乘矢中虜。虜大怒。擁眾而前。以鳴鏑射死六人。傷九人。鹵我軍韋海。左石等。耕牧人周月子等一百八十六人。牛羊一百六十二頭。洛乃先以揭告內閣及戎部。然後下令。令將軍箭兵秣馬。亟驅除之。母輕予一斗粟。一尺布。以幸中虜計。令與臺御史蕭大亨同。始大將軍王國勳。以羽檄徵諸路兵。備龍門。是日遣偏將李迎恩。麻承勳。張充寶兵出北柵子。急馳大邊。柳河墩。而屬分巡使劉葵監之。行未至舊莊科。道逢哈酋。我乃使使者劉縉國召哈酋前。哈酋之眾三千人。皆畏我大將軍旂鼓。多

懾魄反踵走。弗前。會莫。我師次獨石。哈酋爲人徂詐而善謀。見我師銳于前進。恐弗敵。故爲敗北示弱。而遂以此爲緩兵計。旦日。遣夷使送奉韋海。左石等。款塞。復請撫賞。詞甚悲哀。塞吏終不許。知所請詐也。哈酋於是從大邊。羊川墩。復與我師挑戰。戰至數合。虜大敗。騰山鑽林走。我師乘勝。勇氣百倍。追逐八十里。至赤把都。擊破之。虜大率減什二三。獲首僅一級。奪獲馬二十八匹。夷器二十有八。先是將軍令。令將卒皆從馬上亂行破殺。毋得下馬以要功。虜以故得輿尸還。已聚諸死尸焚燒。煙焰滿川。適大風起。延及白洪大帳房。馬牛羊延燒死者亦已千餘。哈酋乃知亡當于漢也。亟退走三閒房。待罪穹廬。甚媿悔。復欲遣使者往。而度塞吏弗信。往無益也。乃徼惠于白洪大。青把都及七慶把都兒。幸爲我請罪于漢太師。所鹵略塞上人畜。今俱在。願以遺還。唯太師哀憐我。復我市賞。我之願也。於是白洪大遣五磕氣。青把都遣小小嘶。七慶把都兒遣罕哈。

把都兒哈酋亦遣羯羊羔送所鹵略大率百六十六人與俱因道鎮安之役哈酋實爲講賞來而以李守備故激之爲亂然亦徒自亂耳未嘗僇漢一人而漢將卒所僇我抑何景觀今傷夷者未起謳吟之聲未絕太師何不除哈酋前過爲漢請復市賞乎其哀矜惟太師罰治亦惟太師幸太師圖之是時我師備獨石及馬營赤城青泉鎮安龍門益固而制置使洛迫青白諸酋之請急遂以書請上命大司馬行御史大夫而以其事屬御史徐申驗問於是制置使爲檄遣通事官羊羔兒小敖八姚世清陳祿布告虜中必罰治哈酋如法然後可是日順義王并禦兒都司遣夷使海大問諸青把都青把都卽偕永邵卜大成白洪大滿五索丙兔喫慎把都兒滿五大擺獨賴班不刺什及哈不愾母一克哈屯姊太松阿不害合詞致書而屬夷使五磕氣我兒故道銀定首領補兒克太儻不浪請罰治如初其六月青把都躬率哈不愾詣一閒房而復遣夷使五磕氣

至。已東虜長昂亦遣使者陶拜等至。皆冒雨而來。待命境上月餘。亦不聞出怨
詈語。其出自至誠可知矣。制置使洛始託爲巡邊。乘傳行獨石。以察虜情。青把
都聞之。復約順義王。乞慶哈。永邵卜大成及襖兒都司。亟遣使者詣傳舍。洛迺
進使者堂下。反覆辯析數日。大都諸夷使感朝廷恩德。而數哈酋罪。不容口也。
每得制置使一言半辭。輒唯唯叩頭。以爲太師第許哈酋貢市。亦何牛羊之不
足贖乎。惟太師憐而諾之。洛既見諸酋。祈懇如一口。且悲號愈切。下守巡使者
問狀。其七月。青把都攜哈酋。詣獨石大邊。因與約。願罰駱駝十頭。馬牛羊一千
頭。且有後言。指天日以爲誓。誓自今毋犯塞。謂予不信。請以番漢文字大書一
紙。以爲質。洛然後許諾。諸虜酋聞而大喜。趨使者海大五磕氣等。叩闕稱謝。其
十月。哈酋牽駱駝馬牛羊如數。詣張家口。然遲至兩月者。以畜數多。不能倉卒
辦。皆借及親舊故也。於是制置使洛以其狀請。下兵尙書張學顏。覆議以奏。上

幸許復哈不憤貢市開賞。賜乞慶哈。青把都。白洪大。一克哈屯。太松阿不害。金幣有差。居歲餘。丁亥。襖兒都司。吉能哈等至塞上。舉扯力克嗣封事。制置使洛稱引哈不愒事以爲戒。諸虜對曰。何至是。哈酋故爲老王子所驕寵。無所罰治。未嘗聞大漢法重也。今自罰治以來。輒悔過。兩載之間。不敢以匹馬半筭至東塞。誰謂哈酋復起者。是歲哈不愒罹霜露病。在手足不仁。後病愈。輒從青把都打來明安起志。曷嘗一日不在我廣寧迤東西。亡問誓矣。東行之日。哈酋唯恐虜騎之行遲也。

滿五索。又名滿兀四。蓋昆都力哈第四子也。所居在小日陽堡外邊。始辛未。與其弟滿五大。並授我指揮僉事。然以青把都故。數數與東虜通鈔。我遼陽。至不恭矣。辛巳秋。制置使張佳胤薄責青把都。青把都召而罰之。以爲諸酋嘗指天日爲誓。誓不足憑。乃徼靈於佛。若曰天耶佛耶。其鑑之耶。居二三年。乙酉。哈不

慎假青把都諸酋。請犯遼罪于時。滿五索之使結轍于道。要之貢與市。皆從青把都入也。子薛的箇台吉亦授正千戶。

滿五大。又名滿兀帶。蓋昆都力哈第五子也。世與察罕通婚媾。以所居在大沙窩三間房也。始議貢時。滿五大歲以馬十疋。從青把都入。然其後犯遼。輒與滿五索俱往。青把都常召至佛前誓。毋犯漢塞。言如是決矣。乃辛巳夏五月。滿五大部夷把禿敗。銀定儻不浪。復盜我松樹堡。已不受兒等。奪我軍衣裝及糧糧。滿五大曰。我實不知故。而制置使洛臺御史佳胤。竟請免滿五大官及貢市。後以順義王罰治。得復職如初。語在波兒哈都傳。是年冬。滿五大偕百戶銀定儻不浪。波兒哈都。並款塞補貢。於是禮尙書請移內府。治表裏衣服絹布。太史治勅書。齎署丞。至上谷塞。班予之。至一切馬值。悉如故事。仰所在椿朋舍。居歲餘。癸未。滿五大以十月故矣。又以部夷犯塞故。停襲。明年九月。上幸從制置使方

逢時請以伯子卜彥台吉襲。

讚曰

上谷獨優于它鎮者。豈非以昆都父子哉。要之。皆我屬夷。何至借遼陽以逃文
罔。罔密猶之逃雨也。無之而非是矣。至哈酋犯我鎮安。此尤屬宣大漸不可長。
滿五索五大。佛前之盟甚堅。後頗背之。豈佛不足憑耶。信不由中。質無益也。而
況于盟。況于夷酋之盟乎。

永邵卜大成台吉列傳

永邵卜大成所牧。在大青山後。莊皇帝時。制置使王崇古請外臣俺答封。先使使安克。諭答必大會諸部。然後可以答常鈔我石州故也。是年冬。大雪深二尺。而以月正元日。接見漢使驩甚。自言深感釋那吉恩。雅欲與大王父入貢。少稱塞萬一如大王父言。克等恐永邵卜所言詐。微以一言相詰問。永邵卜乃指天日以爲誓。不如約者。有如此日。於是出太師所予漢布帛諸物。殊鮮麗。奪虜酋目。永邵卜益大喜。因設帷焚香。南嚮叩頭者三。稱謝不容口。是日屬筆寫契。俟天祿。以番札復太師。敢不唯太師命是從。始定封事。授永邵卜爲指揮同知。它皆有差。是歲辛未。永邵卜大成等從俺答。從結綱。並稱外臣。請入貢。已乃赴張家口市。唯是不腆駿馬。冀欲以充塞下一日之選。虜酋俱受恩賜。幸可知矣。是月續至得勝堡外邊。我塞吏亦燕勞如禮。其明年。以老把都有狗馬病。病死。而

又有黑夷之禍。未久寧獨貢市後。以九月至也。制置使崇古請遷永邵卜都督同知上可之。賜之詔曰。爾等敬順天道。尊事朝廷。以馬來貢誠順可嘉。今特賜爾等彩段表裏。用示褒答。爾等宜益堅臣節。圖報國恩。永享太平之福。又授奶奶大威靜爲百戶。然永邵卜殊不知受漢恩深也。其明年老酋婦以把都死。疑我用燭。永酋遂從而和之。而又會一二小夷適偶死關市下。愈自堅其說。御史孫錄議欲嚴武備。而陳文燧則以永黃二酋構難。自治不遑。遑它務哉。是時上新卽位。永酋等貢不敢後。然黃台吉已改市新平堡。授部夷小威靜唐戶敖兒六爲百戶。其明年貢市告竣。復得與其弟合羅氣受上賞。於是授部夷恰儻不浪等一十人爲百戶。其明年六月。永邵卜以足疾。而其母臺戶哈屯又病。並伏在牀蓐。乃遣其子隱克台吉至。其明年打刺明安諸部夷盜邊。黃台吉偕永邵卜罰治如法。語在俺答傳。是歲制置使方逢時念永酋貢市母乏絕。請遷部夷

補兒賽榜實等九人爲百戶。是後永邵卜亦進階爲龍虎將軍。志寢驕矣。而自以爲阿部不在順義王下。請得市馬。如其數。關吏以青永二枝較之。固已相等。何渠順義王不若乎。以是間諸永酋。永酋無辭于關吏。乃歲比貢市如初。我亦以漢秩畜永酋諸部夷甚備。乃於辛巳授黃鵝兒。癸未授俺的蓋。乙酉授項革。皆後先爲百戶。從制置使鄭洛請也。永邵卜爲人反覆。慄悍而徂詐。自知宣大遇我厚。未可以兵戈擾也。順義王迎佛。永酋遂擁眾與俱。遂主仰華寺刹。意在託火真諸酋而起。久之復變易名姓。庶宣大母藉口以仇我。可謂姦矣。居歲餘。丁亥。賓兔捨西寧。而子壻瓦刺它卜囊。率精兵千餘騎。往岔口堡。已乃從寬溝。透泗水堡閭門。我師生獲儻不浪二人。及後訊之。乃永邵卜部夷也。哀懇再三。得解免。時頗聞瓦刺它卜囊強盛。而豈知瓦刺它卜囊卽永邵卜乎。其明年四月。瓦刺它卜囊及酋長著力兔。提兵往海腦。鈔黃毛。協我鎮羌閭門過邊。其明

年九月。海虜率五千餘騎。從南川入境。聲欲鈔擺羊。已乃鈔南山生熟番。然後馳觀音堂。大率略漢人二口。牛羊二百頭。時備兵西寧者萬世德。卽遣裨將鍾一清等。譙讓它卜囊。它卜囊曰。我始固不知其爲漢人也。有死罪。唯將軍所罰。於是一清大索胡中。得漢人及牛畜。多以還塞上。而副總戎李魁。以爲不獨是。虜得我漢人三百。馬牛羊數千。今安在。它卜囊對曰。無之。我眾方欲行漢地。何敢欺嫚將軍。將軍幸徧觀之。於是虜眾傳發。馳高牆堡。而我師亦捕伏西溝。沙塘川。以備諸虜騎出口。虜竟還走落麻也。魁乃窮追。而與虜兵並驅。我兵獨奪其大道。迫虜騎。虜騎懼而散走。以致諸牽馬羊者。多傾跌墜崖死。虜益鞅鞅謀。高以爲險。魁亦隨上山。諸虜曾鑿魁馬。魁急麾後軍鳴礮。虜聞礮聲大驚。皆出營與我師角。我師倉皇。甲不及披。弓不及彀。自相蹂踐。墜崖谷。虜遂乘勝殺魁。

及指揮阿承印。李世顯。劉詔。與把總李崇謙。千戶陳治綱。皆死之。而軍士死者亦一百餘人。至若虜墜崖死者。乃不過二三騎耳。先是。生番盜虜馬。而它卜囊及魁。捕獲白和尙。追還其馬。已又得馬五匹。白和尙大怨望魁。乃微告虜酋把爾台吉。謂李將軍匿其肥大馬。於是與瓦刺它卜囊。合兵問魁。以故魁亦大怨艾虜。兩欲相攻殺。計頗堅。是固禍所從來矣。兩臺都光先。曹子登。乃以其狀請居亡。何御史徐大化及給諫張希皋。皆以書請革瓦酋市賞。歲不下千餘金。而屬兵尙書王一鶚覆奏。上有詔。免萬世德官。乃調分巡使李丁。以代之。許瓦酋得叩闕獻逆以除罪。自是之後。瓦刺它卜囊。乃許出酋長四人及器械馬匹。而又假火落赤來請罪。會制置使光先物故。遂中止。然此特延引歲月。冀緩我天誅耳。況火酋討手信希爵賞。則又挾而要我。然瓦酋姦益露。其明年六月。宰僧阿赤兔。以搶番寇內邊。制置使梅友松。以爲瓦酋所使。豈藉此以窺我強弱乎。

時副總戎龔成。具羊酒及段梭竹籠。使陳撞子馳虜營。以贖所鹵畜。友松乃上書劾奏之。以其事屬順義王罰治。時扯力克方新至也。其明年四月。它卜囊見塞上調番易馬。乃率火落赤等數萬騎。公行殺略。益甚。語在火落赤傳。其六月。上詔大司馬。言虜眾狂逞。淪盟犯順。乃邊備久弛。制馭乖方。欲覈始事部落。及失事信地。以奏。於是御史周孔教劾奏故制使郜光先及臺御史李廷儀。趙可懷。備兵使錢楷。李丁。詔奪光先誥命。調廷儀。免錢楷。李丁官。它皆如故。其八月。永邵卜擁眾從扯力克。大鈔我洮河。語在扯力克傳。御史崔景榮。於是發永邵姦。而謂瓦刺它卜囊。乃永邵卜別名。自西寧犯我偏將。乃捧頭鼠竄。在海上幾歲。我邊吏未遑問也。則復移捏工川。而與火落赤同巢。遂翼火酋。而佐扯力克以亂。意在要復市賞。其九月。臺御史廷儀。上書辯西寧事。書多不載。其十二月。制置使鄭洛議。有能捕斬瓦刺它卜囊者。請比賜兀慎。擺腰法。予三千金。世授。

以指揮使。是時給諫薛三才。張棟亦上書。請欲討瓦酋罪。大都憤李魁死。未幾而李聯芳繼之。李芳等又繼之。數數然也。其明年秋。永邵卜偕火落赤等。馳嘉峪關。聲欲寇甘州。其冬。永酋擁酋長阿相等度河。馳莽刺川迤南。木申竹捨龍尾白禾。白晝焚草。延燒八十餘里。是時我通事人捕伏交子岡。而番僧龍力刺麻又自虜營歸。得其狀來告。於是制置使魏學曾上書。恐河凍又復東牧。其爲說。大都言河洮或可無慮。河州景古城。有一二天險。假令我偏裨諸將軍。提邏卒數百騎。畫地而守。彼豈能飛度哉。政恐洮州平漫。無險可阻。而獨幸彼所逐牧。木申竹捨龍尾入禾。相踵千餘里。今已燒荒。胡馬必不能絕飼而馳。然邊備不可不蚤自圖之。居三四年。乙未。瓦酋亦旣聞明詔。罷和主戰。自知市賞久弗可得。乃以九月乘它虜入市。復擁眾馳分水嶺。誘捏爾朵破。我塞上度瓦酋必以是日至。先期我備兵使劉敏寬。朱朝聘。遣裨將孫秉乾。陳三奇。莫負時等帥

百金之士。捕伏南川山谷閒。而郎中顏宇坪。梓龍鷹高第。又皆轉餉勿絕。亡何。虜果窺柞。越關而入。未半而我伏兵舉烽火鳴礮。大將軍楊濬大兵四面至。矢石如雨。虜乃中分營東西走。而刺撤爾。捨捨兒。申中等族番兵。合營鑿虜。自日出至晡。大戰數十合。我攻其內。番攻其外。虜益首尾不相及。大破之。斬首捕虜六百四十五級。殺虜悉從刺撤柞迤南。渡海而遁矣。是時我師恐諸虜乘虛而入鎮海。於是遊擊將軍白澤。提兵待西川。然後臺臣李汝。田樂。以其捷請。故事。捷至。兵尙書移御史大夫。屬所在御史。覈功以奏。唯是御史喬廷棟。按西寧捷。果如臺臣所錄。獨閣臣及兵尙書石星。戶尙書楊俊民。給諫吳文梓。運籌帷幄功。不與諸將吏並敍。於是上以甘鎮大獲奇捷。朕心加悅。內閣輔臣殫力運籌。忠勳茂著。迺有特詔。詔吏尙書。是日加文淵學士。趙志皋少保。改吏部尙書兼武英殿。廢一子尙寶丞。加文淵學士張位。太子太保。改戶部尙書。廢一子中書。

舍人。加東閣學士陳于陞。陳一貫太子少保。兼文淵閣尙書如故。廕一子入太學。皆賜金幣有差。頃之。上復有詔。轉李汶大司馬。兼御史左丞。廕一子執金吾千戶。田樂轉御史右丞。兼左司馬。廕一子指揮同知。皆世襲。起制置使鄭洛。以收番族功也。而加本兵少保秩。及賜諸將吏爵賞如法。自是之後。永邵卜益深怨于我塞上諸將吏。而又會火落赤敗於河州。及以明年六月。相率攻我蔡旗堡。是時永酋欲報我西寧。火酋欲報我河州。卒之。兩無所報。相繼敗北。我師斬首虜凡一十八級。始夷酋把都爾恰殺李魁於朵磣。後我師亦於朵磣執把都爾恰斬之。計其期。則又皆以九月。異哉。君子曰。西寧之捷。奇兵也。亦義兵也。是可以報李將軍矣。

讚曰

以臣而伏覩高皇帝置安定罕冬四衛。蓋爲羌夷歸降者建。豈正德而來。亦不

刺遂竄居我海壩。而加以虜王後先迎佛。遂使西海。頓成虜穴乎。永酋得主寺
刹。亦足愉快。乃直必與我師角。兩受敗北。於永酋何當哉。法曰。窮寇勿追。南川
之戰。李將軍自速其斃。薄伐猶犹。至于太原。豈欺我哉。

合羅氣把都兒台吉列傳

合羅氣把都兒台吉。又名哈羅氣。又名合落氣。始授我指揮僉事也。而貢市與永邵卜大成同。始壬申。永邵卜大成以世父死。而又被黑夷殺略。以故貢獨後。以九月至惶懼。於是與合羅氣等。待罪境上。低徊者久之。我偏將軍提奇兵備左衛遊擊將軍提蒼頭兵。備張家口諸路偏裨。提桴鼓至者如雲。於是制置使王崇古下令。幸寬假合羅氣等。後至罪。擊牛酒以犒之。然後許夷使克賴等。牽馬百二十匹入。已部夷正千戶插漢敖不良等。以馬三十匹入。並請貢。而遣大臣靜。牽馬守市。我分巡使王汝梅。燕勞如禮。卽趨赴張家口市。是日。崇古赴岔道。而獨臺御史吳兌。親臨市撫賞。諸虜酋皆歡欣鼓舞。如蒙更生。官易馬凡九百有二匹。軍民凡八百有八十八匹。牛一十有一頭。羊一十有五頭。自是之後。合羅氣幸拜明威將軍。歲時偕永邵卜。貢市母乏絕。而獨庚寅歲。擁眾萬餘騎。

環列張家口。說者以爲青把都誘之也。

讚曰

余觀諸市虜。卽效順乎。然不能不微有出入。而合羅氣則自入市外。寥寥無所紀述。惜乎。庚寅之役。擁屯市堡。與曩時所繇異矣。合羅氣爲德不卒。殆小人也。

哈喇慎著力兔把都兒台吉·銀定把都兒台吉列傳

哈喇慎著力兔把都兒台吉。授我指揮同知也。己巳秋。土蠻發難。哈喇慎欲往從之。將有事於薊遼。而會辛未貢市成。哈喇慎幸從青把都後市我張家口。不聞有它腸也。居二三年。乙亥。青把都及哈喇慎謀鈔東海。遣弟滿五大。請於俺答。答方以請佛及經與蟒段故。唯恐毫釐過失。以傷我塞吏。亟禁阻之。著力兔把都兒對曰。吾未嘗有犯中國意。第使者讓書再至。敢不如約。曾幾何頃。而爲丙子九月。哈喇慎以訃聞。伯子馬五素台吉襲其臣節之無玷。山賜天也。

銀定把都兒台吉。始授我正千戶。控弦之士近千餘人。然貢馬與昆都並矣。并皆市張家口。丙子冬。部夷行獵膳房邊也。道逢把總張繼屏等十餘人樵蘇。屏等鳴礮不及終。盡爲虜所捕。捕往興和城。已乃還我六人曰。吾還若。若爲我告塞上。亦還我降夷可乎。然諸酋微意。意在購重賞也。于是制置使方逢時。使趙

國勳歐清問順義王。王罰治如法。令還我將卒。得除罪。語在俺答傳。是時九塞獨上谷稱強。以青把都。永邵卜及打刺明安三部部落眾也。頗聞市馬至三萬有奇。孫御史愈賢。請損之。不可。然豈一朝一夕之故哉。所由來者漸矣。

讚曰

哈喇慎。銀定。皆名夷也。其行事不少概見。何哉。彼市虜能恭順。如兩人者。歲不過從酋長。一至關市。若其陰謀窺伺。誰則知之。若哈喇慎早夭。銀定以部夷故待罪。謂兩酋無媿于塞吏可也。

哆囉土蠻把都兒黃台吉•麥力哥•克臭列傳

哆囉土蠻把都兒黃台吉。授我指揮同知也。先是庚午歲議封。而制置使王崇古見爲哆囉土蠻。親俺答宗盟也。必會議。然後可。是時哆囉土蠻所居。在雲石堡外邊。部兵萬餘。議幸與俺答同。明年秋。遂與俺答入貢。赴水泉市。自是俺答稱哆囉土蠻。曰堂姪。然每入關貢市。輒相與顏行至久之。哆囉土蠻與北夷讐殺。俺答亦移帳。詣哆酋所。如左右手。已復報怨於瓦刺。則丙戌八月也。去俺答切時五載餘矣。乃引蛇布襖兒都司及套虜卜失兔。莊兔賴。往而下令。令酋一牽馬八匹。羊四十頭。且從邊外川底走。虜皆畏道險。低徊久之。而會松山酋長著力兔。亦欲略黃毛達子。黃毛卽瓦刺也。以清水市未畢。先徵西河諸夷。趨治裝。亡何。套虜何業阿不害。帥七百餘騎。壁鎮番外邊硝池墩。大言欲從永昌暗門。走南山。頃之。威正恰亦帥三百餘騎。從大柴溝堡迤西走。而適哆囉土蠻哈。

炭把都兒。龍合台吉。威正他不浪。穩都乞他不浪等五千餘人。傾巢而來。於是並擁眾至寧遠堡。堡將李魁。陳善道。鑾諸虜。弗欲入。虜請以酋長四騎爲質。乃入牧羊川休舍。旦日。火落赤擁二千騎。馳范家營。山暖泉頃之。套虜板及台吉。狐洞台吉。威正阿拜。復帥三百餘騎。至鎮番邊外菜菴山。走昌寧湖。而獨麥力艮台吉。哈喇各力台吉。博介台吉。尙在獨青山白石頭。而吉囊諸部又未渡河。乃止壁以遲之。是時胡中名哆囉土蠻。爲歹言黃台吉矣。歹言於火落赤爲親兄弟。於阿榜台吉爲親叔姪。以故合族相援。扇結爲姦。先是。阿榜台吉打兒漢把都兒居南山久。則恐套虜新至乏水草。引眾六百騎及馬牛羊八千。從東高舊古城。孤山灘馳迤西石觜墩。蔡家湖草古城。而爾失恰。威正恰。引眾七千餘騎。橐駝馬牛羊五萬。從九眼泉。孤山灘。透花寨。九條嶺。二馬營。草古城。高阜灣。馳迄北黃城兒江陵口。欲以故居居套虜。議如是決矣。火落赤在里山寨聞套

虜至驩甚。卽引精兵三百人。從水泉閭門郊迎。於是歹言黃台吉。從月牙湖。王秀鋪。透草古城。而與火落赤相接見。是日。兩酋從大黃山。透迤南羊戶口。而哆囉土蠻子哈喇狗及酋長兀浪他卜能。我令他卜能。命都六他卜能。脫卜他卜能。僧個他卜能。汪脫他卜能。阿脫漢把都兒。亦引精兵二千。皆從寧遠走水泉。而以革勒根台吉。捨刺乞炭苦思賴。千餘騎。尾其後。已忙快把都兒。綽賽他卜浪。李拜他卜浪。麥力艮台吉。土骨赤台吉至。己阿木大打兒漢。襖兒谷道至。并皆入水泉閭門。透大營堡。而抄胡兒。青把都兒。把漢喇叭。引千餘騎。中分軍。一軍透新河。一軍透西花寨。於是制置使郜光先。亟以檄馳告雲中。革哆囉土蠻市賞。然所至必撫賞。段梭米麪酒食。不乏絕也。故事。稿賞流虜。悉出臺臣贍錢。頃乃議撫犒流虜銀。而偕瓦市冊。齎部考驗。從臺御史王塙請也。是月。歹言黃台吉。乃與諸虜約。約從永昌入邊。由南山渡海而西。於是假道于永昌將李魁。

因好謂魁曰。那顏吾從行之眾五千有奇。而加以吉囊諸部。後至者未已。且曩時順義王西來故事。而那顏豈不聞之乎。願爲我畫便計。俾我得走故道。及所至燕賞。如先王禮。則那顏之賜多矣。敢請。而備兵使萬世德。因與分守使賈仁元。分巡使邢珍。太僕卿張孔修。請於臺御史曹子登。按瓦刺在嘉峪關西。卜隆河之北。而諸虜既云西搶。則何不直走西底。而乃枉道南渡哉。此或虛聲以恫喝人。亦安可知。時政慮南山無邊墉。僅以一口爲限。而況由迤東。不數日可飛渡洮河。迤西不數日。可直衝肅境。而我河西將卒又散處營中。各千五百餘里而遠。有如倉猝告敵。則邊胡以相恤。於是下令。令關吏毋得內虜騎。虜竟擁眾壓境上。且有後言。欲市馬千餘匹。邊吏以爲非我市夷。不許。乃令諸虜走川底道。虜復請曰。極知太師法嚴。顧吾道遠。馬已疲倦。且川底險。而我諸父兄弟。皆在南山。必大會會議。然後可行事。我必不走嘉峪。嘉峪則瓦刺巢。而制置使

光先迫諸虜請。遂遷俺答故事。聽虜騎由水泉兒閭門走洪水扁都口出境。往迤北野馬川休舍。先是丙子夏。俺答由甘州昌寧湖至寧遠堡閭門入邊。從周家灣。永昌城。過橫梁山。滾石溝。新城兒石頭口九條嶺。洪花寨。曹古城。大馬營。泉腦扁都口出也。是時卜失兔偕隱布台吉。莊禿賴偕蠻素兒拓不能。著力兔偕碑馬兔打正。亦欲西搶。而適莊禿賴遣夷使板龍恰。祝活佛。活佛言。若等欲西搶。今歲殊無吉日也。頃之切盡黃台吉訃音又至。於是板龍恰追莊禿賴等勿出師。合諸虜騎。大率萬二千有奇。而並欲往甘州。潛師勿出。或言今歲略諸番。而明年始事瓦刺也。是後御史楊有仁及給諫顧九思。劾西事奏報緩期。上有詔罰諸邊吏俸三月。已兵尙書張佳胤追論前臺臣董世彥。侯東萊。聽俺答道經內地。以致夷酋得請爲比。於是詔奪兩人誥命。其十一月。歹言黃台吉。遂與火落赤。從沙塘川。哈喇只溝入。內邊多所殺略。語在抄胡兒傳。其十二月。

歹言黃台吉義子我僧大。盜順花堡邊。邊卒詰問。我僧大遂發鳴鏑。中我卒姚二死之。大將軍劉承嗣奮勇而前。追諸騎。獨斬我僧大而還。以故歹言黃台吉益欲報之。制置使光先。遣遊擊范子忠及官通宛大才。牛哇子勞歹酋。行至鹽池川。歹酋報我官使。於是麥力哥乘機挾我市賞。後以扯力克嗣封。譙讓甚急。始還巢。語在扯力克傳。然歹言黃台吉竟與火落赤挾我建城修寺。而後還也。頃之。歹言黃台吉遣夷使乞答害。恰巴答。而克臭男抄胡兒。遺二捨金等赴甘州。講我僧大人命。因牽馬四匹。請與姚千戶焚楮願輸罰。而我塞上亦稍予段梭。以資犒喪費。其明年春。兵尙書嚴清。按臺臣奏。大略欲虜王。諭歹言黃台吉。黑勞赤台吉。移帳東歸。其五月。宣大制置使洛。亦使官通戈陶。偕扯力克使者。齎海外。調歹言。歹酋志在捨番。然與火落赤離羣矣。其六月。歹言黃台吉。偕抄胡兒。引眾馳黃河腦。捨生番阿爾力覺。先帥兵絕其歸路。然後挑虜戰。破之。生

獲十餘騎。而歹言黃台吉遂中流矢死。它虜悉還鹽池川。時二十一年也。於是臺御史子登檄守巡使。遣官通張達。告酋婦西牧之不利。已有明驗。趨還巢。酋婦聞漢使語。泣下蔽面。然猶豫不決。已官通許松。行閒。歹妻始議還巢。唯請故道從扁都闔門入境。制置使許諾。令所在犒喪如禮。其七月。歹妻及其子。引精兵七百。扶櫬東還。餘悉置海上。是時火落赤。亦使脫谷大博思痛等執繡送之。靈柩進口。我裨將陳善道從柩。至黃馬圈。去口三十里止舍。而部虜五百餘騎後至。會莫彊欲入邊。邊將張君恩。楊國相。弗容入。爭論。蒼頭軍袁吉。遂反刀毆達婦。婦傾跌下馬。諸虜皆鼓噪。攘臂而起。而酋使牛的箇及脫谷大博思痛等。忽從山上撲來。佐鬪亂甚。傷君恩面貌。我軍益發勇。矢石如雨。虜被矢石刀劍。擊死者二十二人。傷十一人。墜山巖死者五人。我師死十六人。傷十二人。墜死四人。虜分其半。走河東墩。而善道聞礮聲。亟馳還。去墩不三里。逢虜騎百餘。發

鳴鏑。遂中善道。賴萬金良藥。得不死。虜皆走涼州城。我師追逐。生獲牛的箇。卜言兀博思痛。脫谷大沙爾。當撒爾。儻三庫。土忽爾。八人。馬甲刀矢如數。虜始知漢兵弗可敵也。莽歹酋樞樹前告曰。願佐旦日。歹妻遣酋長恰乞他害。陶速太邦什等。赴洪水。而乃以死請還所鹵略。及欲贖死者命。漢亦言。我有殺傷。於是畱乞他害。而遣通事人哱羅太。偕陶速太邦什。赴虜營。驗問死傷。果如言。而我軍還營中死者。則又八人矣。虜使堅欲我予牛的箇等。乃得乞他害四人而去。於是臺御史子登。大會太僕孔修。行洪水。令歹妻移柩大馬營。而屬同知王協夢猝。劉起凍。及副總戎陳霞。復驗斯事。乃當牛的箇等六人。請論如法。則念脫谷大博思痛。爲火酋使者。第以軍法。笞掠之數十。遣去。而我軍死者。人予五金。以資櫓車費。始歹言黃台吉。偕我僧大威正恰。西牧。活佛常告以不利。誠勿往。今三人果死於番漢手。而我僧大尸至。焚散于烈燄。惟威正恰。歹言黃台吉。猶

得裹其骸骨以歸也。

麥力哥。又名麥力艮。然亦有名麥力艮者。乃哆囉土蠻把都兒黃台吉弟也。始以俺答受封故。得與著力兔。克臭。並除指揮僉事。丙戌八月。哆囉土蠻西牧也。麥力哥輒與俱往。至川底。已十月矣。川底地寒。乏水草。而以又客久。人馬俱疲。麥力哥乃遣二十騎。送奉番文。索帽段。琵琶。箏。葡萄。毯。海青。白表。紅錦紙。皮箱。及米麪諸什物。且有後言。言必欲百餘袋。或千餘袋。紛紛挾我肅州請開市。是時備肅州兵者朱正色。帥裨將孟孝臣。拒以肅州無開市例。況地狹民貧。所請又非土產。此明以難我。我惟知塞上精兵。殺滅而屬。將柰何哉。虜使乃言。吾屬十萬餘騎。尙後至。竊恐煩將軍亡已也。於是犒勞而去。其十一月。套虜復齎使者番書。索我開市大賞。正色亟使通事人高岱仁。把卜肖。馳老營諭虜。因以羽檄趨標兵傳發。而會把卜肖還。持令箭。問諸番手信。正色問把卜肖胡遲。卜肖

具言爲虜營所繫。今虜以三萬騎入邊矣。頃之。虜果擁眾而前。礮聲震地。我師鑿戰于紅橋。以儆來告。正色易戎服。躬提兵出郊關。大張旂鼓。聲繹如也。孝臣乃帥指揮汪承宣。請予虜酋賞。正色易戎服。躬提兵出郊關。大張旂鼓。聲繹如也。孝臣卽偕承宣馳紅橋。諸將軍殊疾力戰。虜望見城上高標。冉冉自天而下。大驚。乃罷戰。圍我頭墩。腰墩。正色因麾勇敢士六百人。捕伏道左。而微使二百騎。以次第下馬。扒沙滿盛盈內。復上馬徘徊。忽飛沙。沙蔽虜面。我師多所斬獲。然虜亦止壁空心墩矣。先是虜遣諸騎。從道上捕我諜者。及得諜者。則又恐傳虜中事。皆繫以鏹鐺。後聞正色至。始解縛。於是諜者披髮帶水而來。亡何。虜從空心墩。使使者丘脫兒。復請市。有番文。文大略。問咱兩家兵勢孰雄。且言我肅州尙萬餘騎。吾何畏哉。詞大不敬。備兵使以爲東市已革。肅州故無大賞費。何至挾而謀我。益堅約不從。使者請召捕虜卜喇問狀。卜喇言空心墩果精兵萬餘也。我

師於是移壁。壁豆墩。虜乃分爲二道。從東西河掘邊出境。大言。吾姑去。不久當復入索賞。且番子人畜皆匿二墩院。吾必擊破之。然後已。今且與將軍約。約二三日一入略。不然者。吾第以精兵五十人。阻其東道。何問肅州一孤城哉。旦日虜復自酸棗林明沙窩入邊。所殺略。臨水堡黃泥鋪河清驛及西店子永定莊亂骨堆番夷王刺麻僧蛇眼結思冬等馬牛羊未可更僕數也。虜始薄臨水時。裨將余世威見爲去明沙窩不遠。請于正色。正色明而習于兵。趨三軍下馬。人牽馬五匹。闕匿堡中。而又以舊營曠闊。旋改爲小營。置火礮居外。於是布陳神鎗爲一層。弓箭手爲一層。凡三層。皆坐地下。聽軍中鼓發。以次起立。出擊賊。賊不退。則執刀伏地。然後麾二層。坐起亦如之。是時將軍令下。諸將皆仰面視旛鼓。出萬死不顧一生。母逗遛者。請將復以旛幟。高懸樹木。已積柴如山。暮夜始乘柴舉火。火光燭天。虜以黑夜遠眺。旛幟與林木相雜。人馬莫辨。十步之外草。

木皆兵矣。亟相引從故道走。走出邊。其十二月。御史楊有仁劾奏斯事。以虜常執我備守使達雲妻妾。後以八百金請贖。此乃諸將吏驕虜酋罪也。於是兵尙書張佳胤議覆。以爲麥力哥如果自悔。還我所鹵略。我宜稍予之以賞。不然。請以大兵問之。上有詔。嘉朱正色。任事拒虜。它皆罰治有差。自是之後。臺臣薄責扯力克益急。必欲趨麥力哥還。而後許嗣。是時麥力哥與捨刺乞炭有隙。制置使鄒光先使使離其黨與。而扯力克又遣躰克襍兒。六打兒漢首領。把不盡等。趨東歸。乃十二月還巢也。所遺部落甚多。其明年正月。抄胡兒。使使者卜刺害等。爲諸部請食物。兩臺以爲誘麥力哥亂者。實襍兒都司。夷酋毛大也。亟以毛大獻我。并罰治鹵略事。我予若上賞。於是命肅州衛治廚。特犒卜刺害。而許以桃棗沙糖段布米麪茶斤。曰善自治事。漢太師不欺若也。因遺通事人夏才及來虜拜三戶。並告虜。虜中皆叩頭唯唯。麥酋罪當誅。顧其人已東還。柰何責及。

我酋長乎。我酋長故知麥力哥東歸時。悉還所鹵略塞上。且有罰。罰橐駝一頭。
馬二匹。羊五頭。既已折刀爲誓而去。今毛大貧夷也。我胡中呼爲餓狗。而況以
哱囉事久。往北山。搶瓦刺。其何牛羊之足罰乎。使者凡三往返。兩臺竟不許。其
二月。虜酋答應黃台吉及王把都兒。遣夷使土刺赤事。索我執虜俄大。擒虜卜
刺速可。說者欲釋兩酋。姑置。毛大方在猶豫。久未決。而適胡中亦有議。議以馬
八匹。贏八頭。牛一。羊二。贖俄大罪。以俄大常略我遊擊范子忠故也。而又代毛
大。出馬一匹。牛羊各二頭。邊吏終不許。其三月。抄胡兒還至新城外邊。頗聞速
可死於囹圄。殊怏怏不自樂。其四月。抄胡兒移牧威虜鎮夷河。堅執毛大。今從
北山還套矣。所遺部落。以無主。未可約束。於是立巡邏達虜。月給人米三斗。布
一疋。而我乃與王把都兒。著力兔台吉。歹成他不能。追講前事。諸虜頗欲得卜
刺兩虜急。乃出張文。殊保等二人。牽馬贏八十三頭。牛二十九頭。羊七百三十

二頭曰。它有所未備。則我速可之死。豈不足以相當乎。已復出罰服駝一頭。馬三匹。牛七頭。羊四十一頭。羊皮一十二張。牛皮一張。毛氈四片。皮襖二襲。氈襖一襲。皮繩毛繩各四條。箭二枝。大率約麥力哥及王把都。馬一牛五羊七。已足九九罰服矣。是日犒勞從者。卽移寧夏。革捨刺乞炭市賞頃之上幸從兵尙書嚴清議。詔釋卜刺。俄大令勿捕毛大。并皆得除罪也。始麥力哥爲恰台吉講和。于時扯力克之勢重。意頗偏恰台吉。而以米百袋。牛百頭。私佐之。頃以扯力克命。獨先諸虜東還。得免於斧鉞。麥力哥於是識時務矣。

克臭亦哆囉土蠻把都兒黃台吉弟也。始俺答時。臭與賓兔逐牧甘州塞外水草。及款塞授我指揮僉事。已輒復去。甲戌冬。俺答欲爲臭等請市甘肅。先期檄臭等母亂邊。制置使石茂華以爲不可。乃議撫賞。而鄭洛則以爲哆囉部酋旣開市雲中。復請我甘肅。胡爲者。於是賓兔好謂克臭曰。若胡誘我。徒自疲耳。乃

大略諸村落亂甚。先是。階州木竹坪番族執我備守使范廷武。後乃贖以馬驃牛羊及段布氈條衣服諸什物得解免。以故番益驕橫弗可制。乃復擊我三岔花齋。殺略居人崔應新等而去。唯是塞上恐虜與番合。乃薄責順義王急。是時虜騎每一至關右。輒咎宣大。且令俺答禁諭之。上詔主計者謂邊臣依違觀望。無事則陰享其利。有事則諉罪于人。豈人臣受職任事之忠。且操縱之權。當在中國。今一遇有敵。卽令俺答禁諭。是倒持太阿。反使虜酋得挾以自重。亦豈當時許貢初意。然後邊吏凜凜于明威。其明年三月。克臭乃佐賓兔復請建寺。且開市。辭極恭順。我亦誠勿搶番。臭等唯唯敬如太師約。於是制置使鄒光先議開市。其十二月。遂開洪水扁都口市。已又開莊浪岔口堡。鑄尖墩小市。語在賓鬼傳。是後克臭子我僧大盜邊。與我師角。中流矢死。頃克臭以互市至。大與我邊吏論。論欲贖死者命。語在扯力克傳。是年按臣董子行念克臭。賓兔居莽刺。

川久。而又加以抄胡兒。火落赤等。視爲奇貨。當復起。乃上書。請分固鎮兵。以備邊。與御史屠叔方意大略同。丁亥正月。克臭引火落赤。逐牧河以南。寬漫水草。光先復令順義王。諭以東還。不然。亦當歸西海。書去。久不報。居歲餘。庚寅秋。克臭大會火落赤。揣庫兒。宛著台吉。大黃台吉及吉囊。宰僧。惟正他卜囊。明安台吉。阿赤兔。眞相阿拜失加阿邦賓等數萬騎。託言建寺。乃擁眾大鈔我洪石。硖水泉。大黃山之閒。而時或出沒歸德。捏工沙溝及武勝馬營水柞。與夫老虎溝。水磨溝。腦松林。李家莊。殺略通事人火力赤。楊眞。土人李松。周思等。馬牛羊亡算。於是河洮之間。紛紛又見告矣。御史張天德以狀聞。語在火落赤傳。是年七月。偕扯力克。寇我洮河。語在扯力克傳。其明年二月。克臭復引火落赤。可卜列。潛居莽刺川。西山。我總戎尤繼先。提兵擊破之。斬首捕虜凡一百五十餘級。奪獲馬牛羊。

亡算。臭乃引眾逃。先是。臭等吞食西番。西番有積怨于臭。以故哈六東。哈六部等。出番兵一百人。韓六。韓完等。出番兵五十人。誓滅此而後朝食。識者已知鼓番爲破虜奇策矣。是歲克臭復連火酋。馳嘉峪關。欲出我關吏所不意。倉猝寇甘州。計未售。大都克臭碌碌不過依賓兔而起。頃與火酋扯酋亂。始益强悍。然假諸番而強也。曩者。抄胡兒常遣切盡。安兔等。請死罪。我塞上陳兵甚都。然後延使者入。會克臭以市事至。傍觀見兵威。大自惶懼。至變色易容。乃信克臭蓋因人成事者也。

讚曰

關石豈非故三邊哉。然今非徒三邊也。自哆酋西牧。臭等賓居莽刺。而莽刺又爲一邊。余聞其下美水草。諸酋得恃以爲命。始事者議除燒荒之令。何哉。歹言黃台吉。威正恰。我僧大。今安在。臭酋猶不凜凜耶。乃聞麥力哥東還。得保首領。

則未嘗不爲西慮大息也。

火落赤列傳

火落赤亦哆囉土蠻把都兒黃台吉弟也。辛未春火落赤乃聞俺答稱臣奉貢。弗思約束以檄惠於漢官而顧偕把都兒著力兔及綽羅哥黑探把都兒我綽兔阿卜吉等二千餘騎馳山丹大泉止壁使古塞阿刺帳等十二人分道走一道走涼州謁臺御史楊錦一道走永昌謁御史劉堯卿皆稱引把力台吉綽力兔台吉大賓兔小賓兔欲入貢兩臺許從吉能入不然如必強我獨欲從甘肅入則恐虜酋不能爲表而況道遠行且疲于馬也夷使皆叩頭稱那顏所言爲是。我乃犒使布疋及酒食因遣通事人郭文禮楊忠與俱是時火酋志在出嘉峪關搶哈密款塞終非實意識者已知此酋異日必爲西陲患矣迺先遣五百騎從黃草溝迤南走以觀我師進退我師果出郊接虜戰火落赤躬帥百餘騎前曰我無犯塞意也塞上柰何不予重賞而又禁我毋西略則豈欲我等饑餓

死乎。乃擁二千騎從紅山觀音中渠。小沙渠湖馳西店子。略西番刺爾郎等族。已略日恙刺真帖木兒諸族馬牛羊。真帖木兒疾力戰斬虜首二級。虜卽返黃草壩休舍。旦日虜皆馳紅泉我師尾虜至東樂堡迤西山羊鋪而火落赤把都兒則帥二百騎從壕頭過邊接我通事人王名幸爲我告太師亟予我酒食我迺去先是明詔詔各邊共結和好以全大信以故都護竟下令擊牛酒以犒火酋火酋乃走板橋堡野豬灣湖止壁居一二日始透高臺鎮夷水塘湖而會我師先已燒荒乏草弗可居亟由三尖海子鹽池雙井兒臨水中渠走肅州迤北譚家堡然後過煖泉堡清水河馬營溝冉冉馳倉兒湖新城透嘉峪關已迺從水關出塞透大草灘然火酋雖倔強乎猶奉我將軍令漢使亦日夜趨虜行虜馳無敢後也其明年二月火落赤復從涼永山丹直走肅州我塞上恐虜走故道乃東備寧遠西備山丹洪水諸當路塞是時切盡黃台吉亦假道西搶語在

切盡黃台吉傳。久之。阿赤兔又引切盡黃台吉。火落赤等八千餘騎。馳武勝堡。堡吏李崇勳阻之。阿赤兔好謂勳曰。將軍亦嘗聞搶番者乎。今西番從黑松來。搶我胡中馬牛及漢所予金帛。殆盡。我安能須臾自緩。亟奪關而去。直擣西山外邊。諸番亦先據險。以奇兵伏林中。虜騎至。伏兵從林中起。發弓矢。虜人馬不及避。半中流矢。疾馳而虜又弗得地勢。無可遮避。迺返馬營溝。虜已餓三日餘矣。阿赤兔疑通事人洩之。令番得以蚤備。怨甚。迺告塞吏。亟欲索牛酒。御史韓應庚見番虜皆由內地相仇殺。爲必報之仇。我弗可以威阻。虜又弗能解甲還。勢且久牧。擾我塞上。數數然也。迺上書。請備邊益嚴。時萬曆癸未也。而給諫蕭彥。御史屠叔方。皆後先行邊。所上邊計。多弗載。是歲火酋。請得涼州賣馬。至百餘匹。居二三年。丙戌。火落赤爲抄胡兒。請犯石硖口罪。罰馬牛羊各有數。其六月。哆囉土蠻擁眾屯南山。與火落赤議。以略黃毛爲務。所至縣道。燕勞如禮。其

七月。果與抄胡兒等殺略番土人。馬牛羊亡算語在哆囉土蠻及抄胡兒傳。
其八月。阿榜台吉法當市。而以從世父火落赤故未及與。是時南山及野馬川。
胡騎塞道。煙塵不絕。聲言搶番。搶瓦刺。大都志在搶番。而瓦刺特寓言耳。頃之。
遂與抄胡兒等刑白馬以祭旂纛。決策從石涯。馳西寧。已迺從碾伯水磨溝勝。
番溝。大鈔生番白和尙等族。於是以所略爲營段家灣。旦日從哈喇只溝而還。
先是分巡使珍。太僕卿孔修。使使馳告火酋。令其從洪水扁都口出境。直走赤。
斤河。毋得擾我內道。然火酋則非復曩者事也。竟入內。多所殺略。語在抄胡兒
傳。其明年二月。火落赤。抄胡兒。復引海虜且且台吉。渡河而南。制置使光先。移
備兵使石檟。亟遣官通事白闡兒。曉譬火酋以禍福。誠母鈔洮河。而會火酋首。
領班隆等。在把爾谷台吉營。於是總戎劉承嗣。遣副千戶李福保及通事人段。
因大胡祿火力赤。而遊擊將軍王鐵塊。亦遣通事人楊計保。大阿都只。乘馬六。

匹。并皆從鎮海堡出邊道。逢思哥密生番板的阿爾貢且朵爾加黑巴且答巴等百餘騎。執四人殺之。它得逃。而塞上猶未之知也。居亡何。白鬧兒還自胡中。問福保等安在。白鬧兒具言。往返未接對也。塞上疑此人必死於虜手。迺遣通事人蘆伏偕小阿都只。往問之。僅遺枯骨道上。皆指以爲胡祿。歸而白於備兵使檳。檳曰。柰何妄指枯骨。而云胡祿乎。乃問諸火酋。火酋對曰。我嘗見思哥密。服漢人皮襖。類李福保者。此爲思哥密所殺。當無疑。檳又曰。柰何妄稱人衣。而云福保衣乎。蓋恐虜酋假手於我。而因得以蠶食諸番。以故弗信虜酋言。而適番人板的失加來歸降。始得思哥密殺我官通狀。先是思哥密鹵我居人趙家保人畜。家保居帳中。目擊之。檳迺亟遣官通馬仲。得哈爾力。趙奔牙等。分道而馳。黃河。窻麻兒崖之間。視死者骸骨。則大荒以外。林禽野犬走者如雲。安在其爲屍骸也。塞吏於是相與歎曰。福保等骸骨。弗可復歸矣。乃遣番僧。趨獻首發。

難者。而生番乃堅約。不從漢使者言。制置使光先益大怒。以爲此福自款塞以來所不見者。乃請比癸未時。南番逮捕我官軍法。議往正其罪。而福保等則有宣大官通楊亮例可比。於是議贈福保勳階。以爲死王事者勸。其四月。火落赤帥部酋掘邊墉堡。吏匿不以告。其六月。我僧大盜邊中流矢死。火落赤奪其骸骨。焚之而去。居亡何。火酋迺以番文索我築城修寺。然後請罷兵。邊吏堅不可。以爲先年築城爲優俺答。今弗可引以爲比。且修寺禮佛。虜得藉口以蹂踐我內地也。其六月。順義王扯力克及三娘子。趨麥力哥東歸。獨歹言黃台吉。黑勞赤台吉。竟不從。黑勞赤蓋我所稱火落赤也。先是。抄胡兒。火落赤。威正三部。並以迎佛西來。久弗歸。而僅歸其一部。今二部仇瓦搶番。虔劉我民。歲無寧日。以故御史左丞魏時亮上書。慮之甚悉。是月。西寧備兵使萬世德。遣通事人魏文禮。馳西海仰華寺。嗣虜互市。會有歹言黃台吉之難。火酋不與俱往。幸保首領。

於是以收生番爲務。得刺卜兒之眾。固千餘矣。而制置使郜光先臺御史曹子登。恐番虜合勢。益不可支。計翦滅其羽翼。羽翼成而西事岌岌矣。其九月。火酋馳西寧境上。先是。紅帽生番祁李二氏最慄悍。夙不欲從虜。虜亦恨其盜馬之仇。服屬中國。酋欲收以爲部。亡從也。是時。火酋聲取祁李及昂藏班撒手信。而道路紛紛。言火酋已得紅番矣。子登故知諸番。視祁李爲嚮背。祁李去後。從者益盛。乃下令。令紅番母從火酋。敢不如令者。以黑松莊浪兵。往正之。於是。火酋以未收紅番爲辭。退遁西海。頃之。火酋趨涅左。而紅番且令爾加刺卜兒。果引諸虜。從邊外思哥密族出。思打壩。遂入寄彥才溝。奪祁家西番祁和尙牛羊三千餘頭。略三人。殺二人。傷七人。我裨將陳治剛。提兵數十人。馳水草溝。鑿虜。虜殺我軍二人。傷居民楊天恩。梁計先等七人。傷兵卒異逢吉。我亦射三虜。皆死之。奪其馬驛而還。後以兵寡亡援。虜乃得走。捏兒朵。已還本溝。撤爾灣。紅。

崖寺。郎池。秋池。復走南川。略田家寨馬牛羊。大率五六百頭。執居民李均兒。童男徐黃子。受保子。遂從扁道溝出境。而會我援兵至。皆追亡逐北。劍斬刺卜兒。傳首塞上。奪獲夷帽皮襖。及靴撒袋。弓矢各有數。然火酋亦畏我塞上罰治。乃謬爲恭順。及接見漢使。則曰。紅帽旁近邊。而與熟番漢人相善。今以負馬牛故。致有今日。若與虜無與也者。刺卜兒素非心從火酋。而一日盜虜馬。遊擊王鐵塊。遂乘機奪其肥壯馬。怨是以引火酋深入寇。語在御史楊有仁疏。初火酋破滅多思歹星吉倉二族甚亡。辜子登以爲諸番當有鬼死狐悲意。且協守魯光祖所提土兵又皆勇敢士。登因得用爲計畫。其七月。火酋使使者脫谷大。博思痛等。送歹言黃台吉喪。其十月。與莊禿賴。歹牙乞等。大鈔我西寧諸塞堡。語在莊禿賴傳。其明年四月。火酋憤黃毛執慌忽兒。慌忽兒逃還。於是大會諸虜報之。乃分置家室。而抄胡兒。青把都兒。把漢喇叭。置居山甘。歹牙赤置居嘉峪關。

皆外邊。而火酋以參將馬應時故。自邊內尖海子。請置水塘。曰。願那顏爲我閒視之。且吾所徵順義吉囊及恭谷兒台吉。把都兒台吉。青把都兒苦賽。兵已且莫發矣。今吾先遣矮卜哥恰。提兵二千人。出肅州卜隆吉河。視水草行有日頃之。抄把六酉。亦先以精兵三百騎至。及從風營大泉中分營。而以一營馳山前。一營馳山後。與火酋合兵。並至關西。使巡邊夷俄再賴來告。我迺犒勞酒食而去。先是。應時以夷僧爲譯者。僞造臺臣符篆。鬻胡中有死罪。而以教酋婦習番字功。微遣人求救於順義王。順義王致書臺臣。得因火落赤請救。遂挾去。自是之後。應時出入虜帳。漸至今官。以故火酋恃以爲恩。後迫使命。稍移臨邊新城。迺謂時曰。我有德於若。若柰何忘我乎。春退而治貢賚。親詣新城邊下。於是請增撫賞。費凡七十金。而又以賞物不潔。榜掠千戶周繼祖及執事者。皆數十。然後命蒼頭軍走馬相戲。以爲虜歡。虜果歡。復請市。而會回夷莫明等三十人至。

春令與火酋市。市馬百匹。牛羊千頭。已賓。兔妻及其子額成格。子壻他卜囊首領。打賴恰著力兔。歹牙赤使者必邪氣威正邦什。又至。已火落赤阿榜台吉使者拜要台吉。又至。皆索我賞賚。威正邦什曰。吾欲從鎮羌闔門。馳海腦。拜要曰。吾欲從山後。馳紅崖。聲欲搶黃毛。黃毛兵在頸矣。而御史徐大化劾奏馬應時。大都以回虜不可合。使火酋得執爲故事。且瓦刺在回夷哈密之北。進則慮回之覬知。退則懼回之襲其後。以故虜不敢入瓦刺。我其以漁人收蚌蠣乎。乃其機則係於回。回藉中國以自庇。今遲回虜互市。虜將視回爲外府。稍不如意。勢且伐之。回計亡聊。必折而臣於虜。回虜既合。則虜無藩籬之阻。可以高居哈密。直擣瓦刺。母論能收瓦刺與否。虜卽與瓦刺解構。將柰肅州何哉。後兵尙書王一鶚亦請曰。始火酋偕阿榜台吉之請。牧我水塘也。其說爲備。莊酋甚哀。此固貪牧水草。而實假我以誇胡眾。且得倚之內擾。異日又據以爲巢。此不可不知。

也。其明年十月。火酋爲瓦刺它卜囊。請罰治。久不報。是時御史崔景榮。以火酋挾我。建寺捏工川。迺上書言。捏工。故河州外境也。與威正等之水塘。皆宜嚴爲禁。其明年二月。臨洮天鼓鳴如雷。其四月。固原地震。火酋志在洮河。及擁眾馳歸德所。計欲挾歸德。移捏工川。而會貞相台吉。亦欲爭得之。亟遣其子揣庫兒等三十餘騎。采大木十圍以上。將萬餘本。置杓牙卜。以俟興工。於是制置使梅友松。臺御史趙可懷。以爲逼近西寧。會議河洮之虜。自賓兔及克臭等。逐牧麟刺川。歲引不絕。遂成虜穴。今火酋復據捏工。勢將滋蔓。蔓難圖矣。迺決策募番兵。前是阿力族酋長桑節省所生十三子。爲虜滅其二子。今部兵萬餘。誓以死報。故請收番以驅虜。是或一道也。頃之。給諫薛三才上書。陳邊計。略引世廟齋居決事。慮亡不在邊。每邊書至。輒出御札。問計帷幄大臣。一日至三四下。而其甚者。則召至後苑面議。意在請上重邊務也。然上已從大司馬議。發馬價十萬。

以佐甘肅之急。蓋自火落赤。揣庫兒。及宛著台吉。大黃台吉。吉囊宰僧。惟正他卜囊。明安台吉。阿赤兔。真相台吉。克臭。阿邦失加。阿邦賓。賓鬼妻男等起。或邀我洪水石硖。水泉大黃。而使涼州以西。甘州以東。絕而爲二。或鹵我歸德。捏工。沙溝。而使河洮不得安枕。或盜我武勝。馬營。水柞。而使莊浪不寧。或衝我老虎溝。紅崖子。水磨溝。腦松林。李家莊。而使西寧爲魚肉。頃之。虜騎散走。靠羊撒道。逢洛巴族數人。自洮州還。執而殺之。已迺帥酋長威正台吉。擺彥哈南刺札等四千餘騎。從松山官洛。大川入口。乃引眾鈔。自舊洮州。古爾占堡。至熟番三若族。凡三十餘里。馬牛羊皆闕匿堡中。虜迺急攻堡曰。若不出馬牛羊。吾攻若堡也。因乘風舉火。焚燒三若族。而備守使高崇謙。趙魁。從城上發火礮。火箭。如雨而下。擊虜。虜退而止壁山坡。於是副總戎李聯芳。提兵一千六百九十人。馳土門堡。裨將李寵。丁文臣。提兵七百二十六人。馳火煙口。虜方略我清泥河牛羊。

二百有餘頭。而我兩將軍合兵而前。乃並馳沙巴兒山頂。是時虜已分兩道走。而老營伏包家大頂。以待我師。我師亦復分營。而屬孫將軍繼祖。李將軍寵。丁將軍文臣。周將軍輔。賀將軍汝登。包將軍繼賢。提兵七百二十有六人。爲中將軍。趨千麻舊墩山口。高將軍崇謙。提兵二百八十七人。爲左將軍。趨千麻杓山口。李將軍聯芳。韓將軍啓太。譚將軍賓。郎將軍應圮。提兵九百六十四人。爲右將軍。趨包家大頂。頂以上有煙墩一座。三面皆漫坡。而獨南面不二十步。爲陡崖深溝。豈右將軍死所乎。羣虜望見右將軍從漫坡冉冉而上。出零騎誘我師。我師見爲虜寡。呼蒼頭軍拜言。兔等。鑾虜。虜迺從溝中倉猝起。衝我。鋒甚銳。我兵中斷。首尾不相接。李將軍聯芳。急下馬呼三軍。三軍皆不下馬。還視虜。虜已陳兵而前。我師四面走。聯芳與兵士楊孟夏等十餘人。獨中立奮死。發乘矢。所擊殺甚多。顧矢盡力疲。亡可柰何。然足不移寸步。勇矣。虜酋鶻兒。竟舞刀砍右

將軍聯芳及啓太及賓及應圯及兵士孟勇等。大率一百一十二人。重輕傷凡三十八人。奪馬橐駝凡六百九十三頭。盈甲及鎗礮諸什物亡算。是時我兵奔北。獨南面者多不及追。然自相蹂踐。墜崖谷死者十有六七。己左將軍戰於舊墩。左將軍又敗。己中將軍戰於麻杓。中將軍又敗。計番人包完卜。番和尙。馬牛羊被鹵者。亦皆以百數。而火酋迺揚揚擁眾。還搃工川也。於是御史崔景榮請薄責順義王。令縛獻火酋。而議者以爲不宜令虜合也。嘉靖中。合於宣大。則宣大危。萬曆初。合於遼東。則遼東危。今合於甘固。則甘固危。乃劾奏當事諸邊吏。而府丞李禎。因以書請祛四弊。行六術。而歸重於二策。御史張天德。亦欲聯屬番族。以樹藩籬。語皆在奏疏。是後給諫張希皋。薛三才。鍾羽正。孟養浩。張應登。張貞觀。徐桓。御史周孔教。樊玉衡。皆後先上書。或請募河南山東勇敢士。或請革火酋市賞。或請主戰。或請繩扯力克。以主謀法。或請追論始禍者。曩時西寧

之變。扯酋猶可諉。曰遠不及知。今者躬馳塞上。而況火酋每入寇。則多扯力克部夷。誠無辭於塞吏之間矣。其七月。扯力克至河西。傳檄火酋。欲詣莽刺川。而火酋迺率輕騎。迎於道。遂引扯酋萬餘騎。從綽遜口。馳搥工川。而扯力克亦欲大鈔我河洮松茂。而火酋。眞相。皆熟習洮岷者。願爲先鋒。蟻聚蠶攢。得隴望蜀。於是制置使梅友松。請拜上官指揮魯光祖。爲遊擊將軍。提兵一千人。援西寧。而以弟光國襲之。從李禎議也。其八月。火酋寇河州癿藏上寺灘。以先期有戒。秋毫亡犯。然我兵壁寧哈刺耳記及老鴨烏龍莫泥葱花嶺諸要道。未嘗須臾不戒嚴也。而火酋乃糾扯力克及眞相台吉。竟從寧哈刺耳記。入河州迤東。索我躰段金銀。然邊吏奉有明詔。革扯酋市賞矣。乃竟攻我河州臨洮。語在扯力克傳。上又不惜帑金數十萬。特簡制置使而召輔臣面議邊事。已大會公卿庭中。舉將材。邊無遺畫。而大學士王錫爵亦言邊事。與古相反者一。況火酋一枝。

顯然逆天自棄。斷斷不可拾收。書多弗載。而給諫張希皋。御史秦大夔。張應揚。李本固。邵以仁。皆以書奏。豈皆非金規碩畫哉。亡何。切盡妣吉又見告矣。謂扯酋與火酋會謀。欲大鈔我甘州。時扯酋能不俺俺答。而卜失兔又不及老吉能。徒以火落赤。鳴張狼踞。陰陽其閒。安在不旦夕亂也。是月也。上從兵尙書王一鶻議。贈李聯芳都督同知。罰劉承嗣。高崇謙。以下有差。其九月。給諫張棟。劾督臣梅友松。臺臣趙可懷。奏報未當狀。大都按虜騎二萬而云六萬。且虜往來。乩寺堡。馬家灘。景古城。大率二十四日。洮岷之間。死人如麻。而云絕無搶掠。生獲一人。射酋長三人。斬首四十級。而云醜虜受挫。不爲不多。獨不念李芳等六將軍。皆相率陣亡乎。先是。周御史孔教。劾始釀禍者。乃奪故制置使光先恩廕。而調臺臣李廷儀。頃之。科臣恐啓後人畏事。趨避不前。迺復以書奏。後竟調南。然始事者惴惴矣。居有頃。廷儀亦上書。陳扯酋及火酋事。其略曰。虜王奉詔西牧。

非私行也。以馬羸，棲遲南山。又盡非內地也。卽請市請賞。而第以一使者來。又非虜王內擾也。部酋卽聞有盜竊。我師不無罰治。又盡非亡當也。顧聞之閣臣及部臣。科臣。而未敢仰塵宵旰。故臺臣未之知耳。且李魁之敗於瓦刺也。僉事臣萬世德。許火酋以爵賞。令其講處。非以夷攻夷之法乎。後果許獻我歹虜四人與盔甲馬驥。動以百數。而會光先物故。迺爾中止。自臣到官管事。頗聞火酋索手信。希爵賞。業已有嚴禁。今西寧之事。乃不自悔。曰。將卒失在窮追。而柰何以爲甘肅貽之乎。臣聞未款之先。亦不刺爲河西患。俺答吉囊諸酋。亦圖瓦刺。捨西番。虔劉我內地矣。況頃者扯酋向番索信。亦率俺答故事。而皆謂今日始之可乎哉。臣誠愚憲。不識大計。終願從督臣梅友松。更訂要約之說。惟陛下財察。已督臣友松。亦劾奏參將鄧鳳不法狀。始景古城之戰。臣所徵者。莊浪兵耳。而鳳迺請往。因列爲三營。總戎劉承嗣。李芳爲一營。營東山。鄧鳳爲一營。營西

山遊擊孟孝臣。郭有光爲一營。營居中。鳳陰攜著力兔部虜四人內質。故鳳敢爲前列。然不使眾聞有質虜也。迺召嗣。嗣至西山。則虜形已露。亟欲徵東山軍合營。鳳謂此火酋來獻我人口。無故而移壁。徒爲虜所姦笑。於是趨孝臣。詣虜營論事。行不至二十步。虜皆披甲鼓噪。嗣已知幸中虜計。卽呼孝臣還營。虜迺騎馬而前。衝我軍。我軍礮銃並發。斬首二級。虜復下馬伏地。步衝李芳營。亂戰。傷承嗣。盔甲及戰馬。賴左右救得潰圍解免。然芳及何把總天衝。魏把總承勳。賀千總守義。李中軍如玉。國瑞死者凡二百四十有六人。執是以問鳳。鳳胡爲陰攜質虜。及虜已發難而不赴救。其將何辭以對哉。書奏。下戎部問狀。然與部使所列迥異矣。其十月。蜀臺臣李尙思。以扯酋雖還。而火酋尙牧捏工川。迺令天全六番。播州諸土吏。治兵以備虜。制置使洛亦請嚴爲禁。禁走故道。火落赤竟引吉囊那卜失兒。詣甘肅外邊。假故道。居有頃。桑橫台吉。從莽刺川。遣阿赤

兔。引小酋羊羔兒卜撒。馳邊外撒刺族。視道路。行至寫常溝。逢番官韓恩。韓亦速及偏將軍原進學。蒼頭原秉儒薛梅執之來獻。乃屬進學訊問。而阿赤兔親真相台吉弟桑橫台吉嫡母子也。在胡中爲掌標把都兒部兵三百人。常以月明時隨桑橫台吉從虜王及火眞自大山入漢地。以搶略爲務。於是。以阿赤兔繫獄。故事。捕斬頭目首領恰把都兒者。予百金。迺賜韓恩冠帶及百金。他皆犒以金錢有差。先是。進學遣通事人馬二秋。應雷等二十人。與乞台熟番鎮兒吉等五人。微走捏工。視火酋。瞓其移帳。輒舉火焚所連木。令不得建寺。適使者至。火酋果涉捏工迤南。桑腦兒等急走杓牙卜。乘大風舉火燒一日夜。尺寸亡所遺。然則鼓番之效可知矣。於是復下令。令諸番。有能捕斬火落赤及真相台吉等酋長首級。大者千金。小者百金。王內番王完卜。乃言景古城。和政驛事。實擊虜死者十六人。進學復遣外番哈著加他兒察之。果擊死董刺上巴恰麻泥巴。

失牙什愷牙囊必台失土巴恰把罕兒打爾罕巴失卜纏台都兒土加首領木兒節且令山頗答巴兒史答土巴害巴都兒湯古巴都兒巴爾共他卜囊竹爾歹恰禾禾歹巴都兒只來把都兒皆扯酋火酋頭目也已迺出阿赤兔庭中問狀言亦如之初督臣皆以幕府上功首虜迥異僅揭移閣部至是友松始以請上要亦諸將校二十日鋒鏑之交六晝夜霪雨之慘死暴沙場生者脫身萬死功自不可沒也其十一月虜酋等由嘉峪關外邊西還獨卜失兒等擁眾掘我水泉邊墉我師雲翔而起追逐三十餘里擊破之斬首捕虜九十五級奪獲勅書及坐纛四杆營築三隻令箭九枝帳房五十九頂多金書封冊佛像密藏之物馬驥牛羊一萬八百有奇戎器達衣酥酪肉塊不可勝數而卜失兒丟力管抄胡兒亦中流矢幾死皆奔走南山道其十二月制置使洛興臺臣趙可懷移書甘肅臺臣余之禎以爲懸賞甚輕大會贊畫主事梁雲夢少卿王亮及僉事

使萬世德。郭宗賢副使朱正色參政使胡希舜郎中胡應辰議。迺請購火落赤。視黃台吉。購真相及瓦刺它卜囊。鵝兒。揣庫兒。視兀慎。擺腰。我塞上始購俺答。不惜伯爵及萬金。黃台吉五千金。爵以都指揮僉事。兀慎。擺腰。三千金。爵以指揮僉事。皆世襲。果爾。卽胡中且當有擒生獻款者出。況堂堂大漢。豈無計安國。李春。白春。王現之流。復起乎。當是之時。火酋惟恐虜王東還。勢益孤落。數數往帳中。聲言再寇洮河。南捨松茂及墩喇。求所以繫虜王者。無所不至矣。於是御史周盤上書。以爲洮河之敗。文武將吏後先解綬者幾二十人。而論者猶紛紛不已。寧不使虜益驕。中國益輕耶。臣之愚計。莫若以扯酉放歸於巢。而於火落赤。則明示以不赦。且請寬假歲月。聽塞上選將練兵。便宜行事。廟堂之上。第垂拱以觀厥成。毋事倉皇。毋煩論議。毋持宋事。輕詆款貢之非。毋引漢事。遽期出塞之效。書奏下。大司馬問狀。其明年正月。遊擊劉天俸。獄中上書。獻火技。請破。

虜。上有詔。詔臨淮侯李言恭。戎政尙書張國彥。驗問。迺令家屬劉禮。運火磚。火雷。火礮。火籠。火箭。赴演武所閱視。果如所言。於是減天俸罪。適邊。庶得立功。是月。火落赤。揣庫兒。眞相等。聞塞上精兵十萬。聲欲擣二川。迺乘冰堅。渡黃河。馳迤北走。猶遺酋長可卜列。宗塔兒。鶻兒等四百人。遂牧躉刺川南山。南山卽石門大山口。乃烏思藏門戶也。然番人之欲報虜者。可乘而起。又當我七鎮精兵。雲翔而至。於是河州鼓順邊外番長哈六束。哈六卜。果引銳番一百人。韓六。韓完等。引五十人及乞台諸番大率八百人。而與我劉將軍承嗣。原將軍進學。吳將軍顯。合兵。先遣番人哈奔滅。偵虜。然後進兵。深入躉刺川南山。凡七百餘里。鶻兒等倉猝不虞大兵至。亟披甲上馬。接戰。我師殊疾力。擊破之。斬首捕虜大率一百五十五級。奪獲盔甲弓矢亡算。生獲可卜列姪拜巴爾的等一十二人。拜巴爾的。故從威正恰鶻兒。入洮州。殺我李聯芳者。塞東聞而大喜。凱歌而還。

虜迺以百騎尾其後。已師次撒川。虜見山峻拒險。知我有備。盡反踵走。而所過
保安撒刺諸道。番人皆執我白旗。舉手加額。稱愉快曰。將軍爲我驅除虎狼。得
毋勞苦乎。敢以牛酒犒從者。其二月。火酋復遣拜腰他不郎等十二騎。馳沙溝。
視道里。我師鑿戰煖泉溝。斬敗之。斬首虜三級。拜腰他不浪。卽哈探把都也。其
三月。火酋以虜王既西還。而卜失兔又新敗北。勢孤。乃率真相等。鼠竄二川。是
時。火真還巢。順義王回塞。火酋諸部落。舉見攜貳。內外帖然。而說者恐海上遠
徙。於宣大且不便。此說皆虛謬也。藉非不他失禮易王之說。使之落膽。則扯酋
海上。肯并其諸番。而遂棄乎。給諫張應登。乃上書請厚賚諸番。金茶粟帛以勵
之。先是。制置使洛。見諸番頗附虜。招徠益力。於是生番復自虜歸漢。自稱願爲
屬番。亦旣四十餘族。合之凡三萬人。給以白旗劄付。令其趕馬殺賊。而諸番皆
大喜踴躍。人人以殺虜自期許。居亡何。賓兔妻還我紅帽。西番課爾羅漢等十

四圈。此皆從賓兔十餘年者。而武勝堡馬其撒卜爾加等七族。又相率請歸降者二千人。給諫張應登乃上書陳四大計。其一亦爲收番族也。是時議者欲築洛口山寨。而土吏楊受獨以爲鐵纏山寨故番地。請築堡屯番。登信以爲可許。它若忽山嶺。雙池嶺。龍洞山。皆在絕頂。弗可以興築。宜建柴塘。而加以狼糞煙灶。因爲房二所以居番首。令哨兵監之。至建堡。則請於綽遜口。一旦有警。則直自番地以達青海。豈不善乎。自後御史李本固深疑於甘涼諸番。以背爲虜嚮導。今忽爲我藩籬也。是月涼州白虹貫天。天鼓晝鳴。瓦獸吐青黑氣。上衝於天。又三月扯酋以書復制置使洛。自言河洮之役。釁非自我。而恐太師以爲嫚言。迺遣不浪二人。鑽刀說誓。以明其無他腸。雖然火落赤實我部夷也。我何敢背太師之明約而誣之哉。亟當大會諸酋長。以我夷法論之。其六月給諫張棟行邊。見爲順義王使者。請官或請旅。或請由扁都。或請由川底。結轍於道。火酋尙

藉虜王勢。恐復跳梁二川。迺上書。言虜情變詐。上幸念甘肅。先後發馬價三十二萬有奇。今所費幾盡。以故爲兵餉計甚備。是月。制置使洛。以論者如靖毛而起。上書論不深入。故書多不載。居亡何。火酋使阿歹巴等四人。馳河州。調我塞。邏卒如虎。遂捕阿歹巴來獻。其七月。西寧諜者又言。火酋與大成妣吉。爭奪紅帽西番。尙巢海腦。會苗兵二千人。自治薊菱。願從蒼頭軍。效力於虜。故臺御史葉夢熊。欲征兩川。而洛欲征青海。顧恐羌虜狀貌不甚殊絕。軍行。不無波及生番。先期奏上。請以保生番爲誠。頃之。御史王有功上書。極言虜不可信。而給諫王德完。言三姑未除。語在邸狀。然自扯酋歸。而火酋遁西海。與邊去遠矣。其八月。僧阿爾力。言火酋與吉能。克臭。把凌台吉。永邵卜。明愛台吉。聲欲馳嘉峪關。寇我甘州。於是臺御史魏學曾。言虜以老小還巢。恐以精兵出我不意。偷至嘉峪。與火酋會。亦法中詭道。未可知也。乃提兵備靖虜蘭州。而以書請。居亡何。

給諫張棟。言番兵不足恃。今官洛烏思藏番兵。故楊岱二族所統。迺散處毳幕。與我兵若無干涉。其議與太僕丞徐琰同。其九月。虜王以索賞不如意。聲欲反。兵以要我。時火酋鼠竄西海。學曾迺從行間。上赤白囊請兵。其十一月。火酋移帳亦思木川。其下西北通高臺。東南通歸德。主計者急洮河。然虜王則決策東還矣。火酋反覆爲亂。則以兵從事乎。或請款以嘗我。不能旦夕解甲也。明年四月。哱拜發難。火酋迺聞著力兔方在金貴堡。而翦誣氣張蓋等又佐兵。遂偕鐵雷。莊禿賴。捨達大等。計欲馳寧夏。迺分道走舊安邊。磚井堡。先鈔黃婦。然後與哱拜合兵。御史孫鑑按備兵使楊時寧檄以奏。其六月。火酋土昧。鐵雷帥二千騎。從定邊深入巖子柳門兒。羊圈兒。我師鑿載於沙灘。虜騎遂往南馳。語在哱拜傳。其明年三月。永邵卜悔禍。大將軍令獻火酋。得除罪。國家殊不惜五千金。及龍虎將軍秩。購火酋頭急也。御史劉芳譽。請於上。幸報可。亡何。火酋亦令真。

牙等來款。其八月。御史方元彥言火酋求款未足憑。請增兵餉。其十一月。永邵卜與火酋復結歡。然火酋亦何當於漢乎。丙申春。臺御史呂珂。請於河歸之南。捏工之北。推擇強番。授以世職。俾得以圖虜。其二月。火酋渡河而北。乃遣其子揣庫兒。偕眞相。挾諸番移帳。我師挑戰。斬首虜七級。生獲板勝恰。阿蘭歹二人。其六月。火酋從永邵卜復起。聲言欲報夙怨。是時永酋不能忘西寧。猶火酋不能忘河州也。乃引精兵千餘寇我蔡旗堡。我師疾力戰。斬首捕虜凡十八級。虜乃從金硤口分道走。一道走景古城。一道走古濠。一道走果藏崖。頃之。火落赤請假道歸。套臺御史田樂。迺因驛騎以聞。事下大司馬。大司馬以爲如果道川底。則宜任其所之。不然。必欲從鎮羌。則當路塞。不可不陰爲備也。其八月。火酋竟從乞台。走故道。而謀者則又以牛心山。麻古灘。亂石灘。金硤口諸零騎。紛紛見告矣。給諫徐成楚上書。部使任萬化疏。順義王復欲寇我洮河。今其首領阿

賴等十餘騎。在著力兔營。九合大娘子及阿赤兔。爾成革麻吉等也。久之。火酋移帳往腦地。去歸德可十二日。去洮河可八日。始咷拜。率通事人鑿虜。幸射死打兒漢。傷鐵雷。而獨火落赤得逃走。悔此時不及授首。迺貽禍至今未已也。

讚曰

佐鬪者傷。然扯酋之寇我洮河。永酋之入我嘉峪關。咷拜之鈔我寧夏。豈非火酋佐之哉。何以得晏然青海也。番夷之焚積木。迺令虜不得建寺。此可謂番兵亡益乎。又聞火真遠遜。兩川無虜。惜乎。仰華寺之無以焚也。黠哉乎。火酋時畔時款。一日不死。西三邊終未安也。

擺腰把都兒。兀慎打兒漢台吉列傳

擺腰把都兒。擺腰阿不孩子也。所居在野馬川鴻子堂。對天城陽和去邊可二百餘里。隆慶中俺答寇我石州與擺腰兀慎而起。時土蠻及禥兒都司五合六聚甚倔強。控弦之士以二千數。往來哈喇閒。後與黃台吉等分道。志在鈔我雲中邊。頃之入在弘賜堡邊。直薄鎮城索降者。臺御史方逢時以敵聞。是歲隆慶庚午也。其明年貢市成。授我指揮僉事秩。居歲餘黃台吉與諸部不相能。復立守口市。以撫擺腰兀慎。摶力克五路把林諸酋。時黃台吉所部曰東哨。大成所部曰西哨。此其二大枝也。而擺腰兀慎及五路把林又分爲四小枝。入貢有賞。入市有燕羈縻之隆。何殷殷也。我譯者叢文光日莫訓以忠孝經。擺酋猶遵約東。歲市如初。後丁丑俺答西行。擺腰輒與俱。既還久之。俺答爲擺腰兀慎請異。詔可之。其癸未冬。擺腰爲三娘子恰台吉講和。竟未成去。明年冬。部夷瓦失戶

等盜我瓦窯口。阿的庫等盜我柴溝堡。塞上從此多事矣。已兀慎爭草地。兄弟二人不相容。益鈔邊。明年旱。赤地千里。擺腰迺合諸部三千餘騎。盜我新平邊。以饑故。罪可原也。故偏將軍管一方。李承祿。許以撫賞。拊循而去。頃之。諸酋復帶甲掘邊牆。我軍疾力戰。殺傷大相當。而擺腰朝台吉。亦引六百餘騎。馳關市下。挾我大賞。會莫。關吏令退舍。夜半窺牆隙。以八十餘騎。直走南山東山。觜略鄉民李通牛七十羊二百馬十餘騎。出邊。旦日復帥二百餘騎。環關市而立。它皆聚二十一墩。大言必賞至。然後去。於是臺御史鄧林喬。遣通事人師國勳。至守口市。曉譬擺酋。迺待命。蹠門外。國勳迺道臺御史意。擺酋自言。吾以行獵。至此索賞。非有它腸。參將弗禮我。歹縱其軍。傷我部夷甚眾。我輩以此紛紛請贖命。今奉太師命。當走榆林舊巢。語畢。果引其眾而去。還所略馬牛羊。於是御史王之棟及林道楠。後先劾奏將吏管一方等。置不以聞。詔下御史逮問。罰李承

祿俸凡三月。御史又一檄諭順義王。請得罰治。如罰哈不慎也。擺腰把都兒生四子。長速木兒台吉。次冷克木台吉。它弗可考。

兀慎打兒漢台吉。兀慎阿不孩子也。所逐牧。與擺腰同。閒至葫蘆海子。控弦之士不及千數。莊皇帝辛未。貢市成。兀慎得授我千戶秩。已遷指揮同知。先是俺答寇新州。擺腰。兀慎輩。實左右之。給諫溫純。按臺御史王遴奏。請備邊。已俺答擁眾。索把漢孫。而兀慎等乘隙。鈔我弘賜堡。有狀。慎已著名塞上矣。其七月。赴新平市。與黃台吉。擺腰。同市。其明年秋。兀慎。擺腰等。與黃酋有隙。請改市守口。幸報可。癸酉改元。四夷亡不結綱來往。而給諫蔡汝賢。猶聞兀慎。堵刺兒。尙干我塞。頃之。兀慎竟入貢如初。詔優勞之。是後貢市不乏。戊寅。俺答西行。畱兀慎。主市事。兀慎曰。我不敢誤乃公事也。獨庚寅之役。以三月至市口。歲杪。然後請入市。殊桀鰲。豈諸部酋主使乎。不然。何比年入盜我陽和及鎮川。西陽河邊。非

兀慎部酋五奴谷把失補兒害的力圪大麻大卜兒合。則妹夫襖不害儻不浪部酋我交哭參大兒也。兀慎又名打兒漢台吉。又名打兒漢那顏。又名河兒汗那言。

讚曰

擺腰把都兒。始奉冠帶。備保塞吏。抑何恭也。與黃酋爭衡。要挾市賞。漸倨。又考兀慎。擺腰。爭地後亡。它狀。豈碌碌因人成事者與。語曰。曲突徙薪無恩澤。始把漢孫之降。以捨兔金。女擣兔金。故兀慎部夷也。論款功者。豈獨俺答哉。

萬曆武功錄卷之十

翰林院添註待詔 瞿九思著

東三邊 一

土蠻列傳上

土蠻打來孫長男也。所部皆朵顏。禪惠。伯戶。鵝毛。壯兔等。控弦之士六萬。最精壯。嘉靖中。移徙黃河北。常引速把亥。入海蓋。開原。頃之。大會矮塔必兀魯台周。十餘萬騎。祭旂纛。聲欲入河東。廣寧。後從長勇堡。靜遠堡入。殺略瀋陽。遼南。遼陽迤北。於是大將軍楊照擁兵擊破之。斬首捕虜凡三十餘級。是歲嘉靖三十八年也。其明年冬。虜騎皆牧馬凌河。聲欲入錦義。時遊擊將軍徐九齡馳廣寧。張元禎馳閻陽驛。頃虜騎七八萬復移饅場。去邊可十五里。楊照亟引兵捕伏十三山驛。鑾諸虜。諸虜迺從義州。大康堡入邊。分爲二枝。一枝由張弼屯伊家。

谷。走閻陽。一枝由達旦嶺。空中塔。走十三山驛。我出土四千人。疾力戰破之。斬首虜十級。奪獲馬二十二騎。頃之。從十三山驛。馳張弼屯。而以三百人備千家屯。屯中牆卑兵少。又諸屯之衝也。諸虜果揚揚騎馬。走張弼屯。照復轉戰。斬首二級。奪獲馬二騎。虜亦殺我軍丘祥一人。傷高用等三人。大相當。虜遂跳驅千家屯。以邊有備。乃引去。大會黑石炭。王文打來。土獐。候河凍。略瀋陽。奉集閒。自是之後。土蠻部夷小四。我羅赤。款塞請降。居亡何。土蠻黑石炭。委正塔他昌吉。長禿。王文納木那林。聚炒禿。直入界嶺口。冷口。桃林口。已從花兒營。略山海關。一片石。其明年。聲欲略薊鎮。燕河諸路。已秣馬黃佃子。竟從古城大墩空入。而莊皇帝卽位矣。其八月。虜騎十餘萬。欲略山海。喜峯口。東西。迺先引三十餘騎。截我諜者。道路不通。頃虜騎皆馳脫力莽。聲欲入義院口。青山口。界嶺。是時俺答入水沖。黃台吉。擺腰兀慎。打兒漢等。亦入龍門。金家莊。臺御史魏學曾。移

壁山海關。度虜由黑谷頭入塞。隔絕灤河之東。勢必略永平以東。山海以西。遷灤昌樂之間。不至數日。當遁逃矣。於是御史王友賢。給諫歐陽一敬。皆後先上書。恐諸虜合營。勢益熾。請備不虞。其九月。果分騎入界嶺口。分水嶺。沙嶺兒。黎樹窓。羅漢洞。漢出兵大戰數十合。火礮矢石。擊傷甚多。虜皆咬指吐血。扶傷號泣。會虜騎二三萬馳救。盡炮擰栳葉。墳滿山巖。復循牆而進。臺御史魏學曾。卽帥參將李成梁。遊擊楊騰。李如禮。東援。寧夏副總戎楊貞。山東參將楊餘慶。大同遊擊戴椿。張驛。延綏遊擊張臣。何遵化。遊擊高仲安。西援。於是大兵至者。四面衝鋒。擊破之。斬首捕虜凡一百一十八級。是夜虜從義院口。花場谷。擎子口。折牆。奔突出邊。旦日虜皆聚黨平山營。但山爲險。復擁精兵挑戰。殺傷相當。制置使劉薰。度虜騎寧濡滯。志在敗我師。以保彼所鹵掠。還歸。我須分塗夾攻。然後虜勢分。虜勢分。然後收效。且夕也。迺使總戎李世忠。王治道。及裨將楊貞。董

一元錢勝等分諸軍爲三大路。鳴礮並鼓行而前。虜以一人執旂幟。先鋒卽劍斬之以徇。虜勢漸披靡。漢兵勇氣益百倍。虜乃棄旂鼓奔前。扒牆口走。殊逼迫。跌壓邊外壕塹者不可勝數。餘黨得脫身走。走如蟻。我兵追奔至棒棰巖。虜將犇上山。我兵先登。虜不得上。中道且行且卻。漢兵四面起夾擊。虜大亂。自相蹂踐。傾跌下巖死者亡算。山巖溝澗數十丈。一時人馬充盈。先後斬首虜大率九百五十四級。奪獲橐駝馬牛羊器械以萬數。父老傳此谷巖之戰。功略不世出也。頃之永平□高尙仁。詣谷巖翻覈。得酋長首六級。餘多腐穢不可近。割取馬耳三百六十四副。馬尾五百二十八縷。馬傾跌死者四千餘匹。旦日漢使王道得王隆疏山谷。生得虜二人。劍斬一人。執一人。鄉鑄至轅門。與之語。語不可通曉。召通事焦萬福譯之。自稱名瓦素。故黃大吉部夷也。大吉聚兵阿母林。與主蠻把哈打喇罕塔他喇太主。歹赤那顏。俺只李來等十餘萬。趨出塞。往南走。啼

哭。行閒唯恐漢兵復倉猝至。聞風響馬鳴。輒大聲哭叫。後邊追殺來了。以故瓦
素乘馬。扒山逃匿石巖中。漢使馳紅草溝往視之。虜騎果偃旗息鼓。揮淚還矣。
是隆慶丁卯事也。其明年春。土蠻益怨怒。漢所殺損過甚。不自忍。於是大會西
虜把都兒。期正月。由界嶺。義院口入。迺微使擦巖子。馳義院口視路頃之。使夷
使哈不襯。至沙蠻營。易糗糧。其四月。聚兵老花。捨刺母林。聲欲略桃林口。是時
把都兒。辛愛。伯彥奴兒。修城。先是。李羅漢部。夷阿羅頭兒。往火郎務。具得其狀
以告。語在給諫張鹵疏。其明年秋。東西虜約分犯。土蠻從捨刺母林。馳冷口。把
都兒。從插漢腦兒。馳古北口。俺酋黃台吉。從腰帶。馳獨石。黃花鎮。皆有狀。御史
傅孟春。因郵置以聞。上詔薦遼制置使譚綸。宣大制置使王崇古。各要虛心奮
力。其明年冬。八家寨夾河山。城葦子谷。酋長汪住。內英哥。鎖落可赤。把其三。把
兒太寧公提等。從陽明臺入。是時速把亥。委正。炒花。好兒。趁者兒。得。聚羊場河。

與土蠻未合。相攻殺。頃之。好兒趁。與土蠻講和。并皆索者兒忒及逞仰奴。養加奴。以爲有如者兒忒。亦講和。則請以大舉入漢塞。而會拏木大小把都兒。亦聚兵。聲欲略前屯。於是土蠻中分虜。以其半。大索者兒忒。以其半。九合拏木大。皆入塞。先使精虜三百餘騎視路。已。虜騎皆入遼陽西北。去邊可一百餘里。與我軍相持。凡三月。臺御史張學顏。亟使副總戎趙完。馳遼陽。參將郭承恩。馳虎皮驛。遊擊安熬。馳奉集堡。備禦裴承祖。馳鮑家屯。柯萬。馳平虜堡。齊可。馳一堵牆。而備兵使王之彌監軍。郎中王念轉穀。不乏絕。居亡何。虜騎果從酒望墩入。是時朱御史及臺御史。皆壁清河。大將軍李成梁。請先矢石。於是令諸軍傳發。旣行至卓山。道逢虜。旗鼓相望。虜度不可敵。皆驚畏。我趙完。郭承恩。攻其後。朱良臣。馬文龍。攻其前。虜首尾不暇顧。乘馬騰山穿林。急走出邊。我兵乘勝追逐。至虜巢。各以銃礮四面環攻奪壘。自日中至暮。勇氣益盛。擊破之。斬炮兒太寧公。

提等首。凡五百八十八級。奪獲馬六百餘騎。我軍亡八人。傷三百有二人。漢馬死二十二匹。明年春。土蠻盡還巢。其八月。土蠻部夷卜言兀灰正。把都兒。惱毛大。黑石炭。滾鬼。董狐狸。萬餘騎。牧馬捨刺母林。待土蠻。聲欲窺我錦義寧前黑莊窠。其九月。虜披甲牽橐駝。載鐵木鈎杆。直擣白塔谷堡。戴家嶺。分爲三營。奔沙河營。一營馳迤西。一營馳迤東。一營馳雙墩鋪。參將楊爍卽擁兵亂岡臺。虜衝鋒。漢以鎗礮火器擊殺甚眾。頃遊擊李惟一至合營。追逐雙墩鋪。虜復戰。爍督我兵用弓矢火器戰車。殊疾力。虜不能敵。盡走沙河驛。先是千總李元善。備禦葛景岳。捕伏待諸虜。虜至伏起。并皆鑿戰。自未至申不衰。會大將軍李成梁。參將楊騰。遊擊傅廷勳。至合營。虜乘鉤杆而去。其十月。土蠻復收仇夷好兒。趁以爲好兒。趁儻不可得。卽往略遼西。其十一月。漢諜視之。旣行至舊遼陽北河。去邊二百里矣。遙望見沙漠中。虜騎五六百往來。殷殷不絕。於是臺御史張學。

顏大將軍李成梁度此虜既聚黨必先入廣寧迤東亟使千總王九貢潘燾備
鎮寧鎮遠頃之以羽檄徵裨將李國相馬衛都于志文胡鶯唐朴兵合營成梁
欲先奪壘以伐其謀期初二日出邊成梁冒雨雪先鋒令襲虜虜或覺卽起火
爲號大兵接踵繼至虜亦備漢兵襲擊皆列營並上馬前接戰漢營烽火起成
梁急趨兵應接魚鱗而入大率增什三破之斬首捕虜凡二十二級奪獲馬二
百有六騎盔甲器械亡算我兵傷禍承訓等一十三人漢馬死八匹是歲癸酉
改元時也明年三月土蠻與西路黃台吉合兵聲欲略遼東備禦使葛景岳卽
使通事歐陽清諭黃台吉黃台吉迺云察罕兒及花日都督果有之於是給諫
張書奏虜勢因言察罕兒卽土蠻也其七月土蠻徵長兔至營中皆以牧馬爲
務戒毋騎乘先是插漢兒聚襖伏大會董狐狸從毛埃兔往南走聲爲炒蠻報
怨其十月土蠻黃台吉犯薊鎮不得去寧前寧前又不得去錦義錦義又不得

去廣寧。開原其十一月。與速把亥合。頃之。虜騎二萬。佯言略建州。以示漢不備。與打刺罕。略遼陽金蓋。而以灰正。擁七千騎。馳廣寧東西。其明年正月。引速把亥十餘萬騎。馳遼陽西。自虹螺山歷廣平山數百里。聯絡相望。其四月。虜騎五萬。持雜帛馬牛貂皮。往仰加奴新寨。請婚王台。語在王台傳。頃之。土蠻益結連好兒。趁速把亥。合二十餘萬。是時制置使劉應節。以轉遷當去官。與臺御史王一鷁。張學顏。大將軍戚繼光。楊四畏。李成梁。治兵馬。嚴烽堠。其八月。王台使使送奉土蠻婦人二口。盜甲弓矢二副。貂二百皮。段二百純。逞加奴。仰加奴。亦以貂皮一百段。一百。皆如土蠻禮。土蠻遂與諸虜約。約秋高略錦義。廣寧河凍。略金復海蓋。御史郭思極。得其狀以請。其九月。土蠻果與黃太主合。太主等屯治架秣力。刑馬祭旛纛。欲略廣寧。錦義。寧前。是時堵刺兒。卜言兔。黃台吉。亦欲略清細河。而速把亥。炒花戒母。以小略費大舉。其十一月。土蠻偕速把亥。炒花。以

兒鄧。擣勞漢二萬騎入錦義。未遂。於是聲欲略大小黑山。高平。開原。鐵嶺。瀋陽。其明年正月。土蠻男卜言台周。大會打來漢。速把亥。黑石炭。黃台吉。歹青委正。土買罕。長兔。煖兔。拱兔。抄忽兒。堵刺兒。六萬餘騎。馳廣寧。語在卜言台周傳。其二月。王杲引土蠻五萬騎。執鉤杆。略廣寧外邊。漢出兵追逐。至屯不喇哈會。屬夷長昂。亦帥四百餘騎。略架礮所。給諫蔡汝賢。迺以書請嚴武備。頃之。卜言台周從西北來。黑石炭從西來。速把亥從北來。聚黨七八萬。皆自虹螺山走遼陽城。聯絡不絕。西可入廣寧。錦義。東可入遼瀋。甚岌岌然危也。大將軍李成梁。提兵出遠塞。會風沙障天寒甚。士卒墮指者什二三。以死地血戰。成梁揮兵衝虜營。破之。斬首捕虜凡四十三級。火器所擊傷亡算。河東兵亦馳救合營。乘勝殊疾力。斬首虜凡十九級。餘黨悉竄。其四月。土蠻偕黑石炭。亦聚黨可兀。魯思太。欲逐水草。居前屯衛。請比宣大開市。我其如約。不則吾以數十萬騎。略山海迤。

東及開原迤西。漢烏柰我何。邊吏得之。太寧人幹多羅忽。朶顏人莽惠有狀。制置使楊兆。具以實聞。是時廣寧右屯衛。地震有聲。從西北響如雷。諸臺杆起大火有光。而會賓兔欲開市於西。土蠻欲開市於東。給諫蔡汝賢奏以爲必不可許。大司馬譚綸議亦如之。其五月中。貴人馮保於會極門傳奉聖諭。前報虜賊數十萬。欲犯遼東。前哨已到近邊。朕心日夕懸慮。今經旬日。如何又聲息杳然。不知前賊果否入犯。該鎮有無失事。你部裏如何通不以聞。著從實說來。先是御史陳文衡奏。青把都聲欲略上谷。制置使楊兆奏。察罕兒聲欲略漁陽。臺御史張學顏奏。青把都大會察罕莊哈聚黨二十萬人。馳大寧舊城。聲欲犯遼陽。於是請發遼東入衛兵。及薊鎮硝黃鉛彈。詔從之。是時李成梁提兵壁大林河。會虜騎千餘直擣塔山所。裨將秦得倚追逐斬首三級。奪獲馬六十七騎。我兵傷二十六人。漢馬死者四騎。傷一十八騎。居有頃。上谷臺御史吳兌使使者解

宗堯及夷使鐵寧。往諭青把都。青把都言吾無犯漢意。我來爲欲略朱赤達子。漢使迺告我曰。欲絕我貢市。攻我穹廬。柰何謂我爲亂於遼陽。而賞利於上谷乎。於是相引趨罷兵去。總戎戚繼光。雷龍。具以實告。以爲今日爲漢東邊患者。唯長昂而已。大司馬譚綸覆奏。上幸詔曰。這所報虜情。前後異詞。東西異狀。看來通無的據。止是傳聞。將來何以待敵。且暑月饑荒。無端爲虛聲所動。周章調遣。先自罷勞。秋防猝有虜至。何以禦之。今後各總督鎮巡官。居平當亟圖戰守。日夕戒備。厚遺間諜。的探虜情。有警。卻宜持重安詳。示以整暇。不許沿習舊套。虜未至。而虛張賊勢。以避罪。虜已退。而虛稱斬獲。以要功。有這等的國法。不宥。你每職在本兵。居中調度。亦要沉謀審算。動中機宜。毋但依邊臣奏報之言。謾爾處畫。致乖舉措。致輕外夷。自後給諫蔡汝賢。亦上書劾張學顏。大略言屬夷則虛張聲。以挾賞。將領則假訛傳。以冒功。爲陸戰者。則曰。虜塵不斷。綿亘百里。

爲火功者則曰。烟焰蔽空。燒燬約有數千。爲永戰者則曰。犁沉賊船。漂溺殆以萬計。皆成套語。上從大司馬議。詔張學顏。著策勵供職。其八月。土蠻飲馬哈刺母林。頃之。馳義哈腦兒。聲欲略遼陽。瀋陽。開原。會遼陽。大水流殺人民。於是走廣寧。錦義。其十一月。土蠻男卜言台周。姪黃台吉。及其部曲炒花。煖兔。拱兔。以兒鄧。炒忽兒。堵刺兒。擣勞漢。歹青。委正速。把亥。窺灤東。多所斬獲。語在炒花傳。其明年二月。土蠻讐兀把都兒。黑石炭。速把亥。五萬餘騎。飲馬遼河。聲欲擊開原馬市。以報平虜堡之役。居頃之。帥五十騎。渡河。馳新馬泊臺。總戎李成梁。提兵往擊之。虜騎還河上。趨渡赴河。溺水死者數騎。斬首虜二級。奪獲馬九騎。我兵傷七人。漢馬死者三騎。是時總旅尹世爵。道行尖山臺。逢虜八人。追逐。會林中伏虜起。射死世爵及蒼頭軍九人。馬一十一騎。傷五人。於是給諫裴應章上書。大略言。虜酋或言攻女直。而實略前屯者。或言攻河東。而實略廣寧錦義者。

或牽我兵西向。而實略廣寧開原者。爲計甚詭祕。當嚴武備。其五月。入廣寧。錦義。乞貢賞。不可得。飲馬黃佃子。白岩子。久之。使夷使莽惠來告。以爲安灘。故阿蠻部夷。今迺得王封。佩金印。大如斗。它豈不漢子。而土蠻老婆乎。漢亦使通事姜玉祥報曰。往俺答縛趙全百十餘輩來請。今誠欲如前事。當執速把亥。黑石炭。歹青。炒花。煖兔。長兔。款塞。然後許可。是時。土蠻部夷那安兒。自稱能主土蠻事。請貢市不容口。王祥問土蠻安在。那安兒對曰。土蠻本王子。今張黃蓋者是。復言以兒鄧。速把亥。炒花之眾二十餘萬。以疑懼漢。使土蠻度貢市。必不可得。還走團山。擊城堡。成梁追逐。斬首七級。奪獲馬一十四騎。虜復使宰桑虎刺赤。果力箇恩克太。阿徐赤。告漢。漢幸許我。我以三百人。歲獻闕下。稱臣。願以銀鍋銀碗。銀項圈。銀花段布賞之。不則虜騎雲翔而至。其六月。果走開原廣雲堡。射三人。虜七人而去。其七月。長昂犯前屯。其九月。煖兔。董狐狸。犯義州大定堡。其

十月。土蠻部夷速把亥。炒花。哈屯委正。歹青。黃台吉。堵刺兒。莽忽大。董狐狸。長昂。長兔。三萬餘騎。從黑林墩入。賴副總戎。曹簠等追逐急。去略海西王台。語在速把亥傳。其十一月。攻我沙河東關驛。斬首三級。已遣速把亥。入海州太康堡。鹵蒼頭軍于朝。其十二月。攻我太興堡。鹵張仲禮等四人。已鹵大福堡。韓用及胡孜等八人。已鹵大定堡。王得功等數十人。其明年正月。青把都兒。哈卜慎。莽古歹。同母哈屯。約長昂。大會土蠻。分犯寧前。於是土蠻馳傍山。李成梁提兵擊破之。斬首虜四百三十五級。奪獲馬橐駝亡算。祭告郊廟。賜爵賞金幣如禮。其二月朔。土蠻從海州東勝堡入。日日從前屯瑞昌堡入。已飲馬舊遼陽。總戎李成梁計曰。此誘我西防。擊我東。乃遣諜于現等七人。峒之行至雕背山。逢虜殺傷殆盡。頃之。帥二百餘騎。入自靖虜墩。漢兵逐之。出邊。射死馬二騎。傷三人。其三月。虜騎二十入宋家泊。奪牛六頭。軍一人而去。成梁擁兵至中遼河北羅兔去。

邊可一百餘里。衝鋒擊破之。斬首捕虜凡五十二級。奪獲馬一百二十騎。復遣劉友升從代子河北圍灣兒出邊。行四十餘里。至爛蒲河。鑿虜戰。破之。斬首虜二級。奪獲馬一騎。其四月。土蠻打來罕。大會速把亥。歹青。拱兔。煖兔。黑石炭。以兒鄧。數萬騎。聚兵捨刺母林。欲分犯薊遼。以五十餘騎。入自鐵嶺鎮西堡。以二十餘騎。入自古城。以三十餘騎。入自松山麻溝台。視道里。挾貢市如初。居亡何。御史趙允升行部。宿西寧堡。會虜至。趨李成梁親臨兵。疾力戰。語在速把亥傳。久之。土蠻長兔。拱兔。銀燈。堵刺兒。迺治雲梯黃佃子。以北廣平山。因徵歹青。速把亥。亡慮五萬餘騎。欲入遼陽。市夷額頌華。言狀。我遣使易達子。往諭之。行逢馬達子。逮捕易達子。至煖兔。傳送土蠻。土蠻惡之。令割左耳以徇。易達子言漢實使我至。土蠻怒髮上指冠。呼左右斬之。手足異處。已漢復使伍承益往。行至里松林。去邊可一百二十餘里。虜騎五六千。方吹掌喇叭。揚揚馳道上。其五月。

虜眾遂至二十萬。入自錦義大勝堡。走凌河。會天雨。迅雷風烈。止壁。日分騎。東至鹽場。南至右屯衛。西至吉山驛。北至十三站。居一二日。復合營出邊。於是分巡使張崇功。告於御史趙允升。察所鹵略。左屯衛。殺陳廷貴等三十四人。鹵尹大化等三十七人。牲畜三百一十七頭。燒燬屋居一百四十所。馱糗糧四百九十石。右屯衛。殺于朝等一十三人。鹵董得等六人。牛六十頭。燒燬屋居一百六所。中屯衛。殺易萬等五十五人。鹵染成兒等五十九人。牲畜四百九十六頭。車二十八輛。燒燬屋居一百所。馱糗糧五百五十石。允升具得其狀。迺劾奏參將馬文龍。事下大司馬方。逢時間狀。會制置使楊兆。亦上書。言防堵無虞。頃之。大司馬覆奏。見爲土蠻臨塞。要求貢市。甚倨傲。錦州之役。天大雷雨迅烈。虜迺驚潰。時當北郊大辰。乃有天誅及虜。請寬假馬文龍罪。以部議。凡遇虜入。可守而不能守。當戰而不敢戰。請論如法。其或保全城堡。迎擊衝鋒。則當以保全。□

戰爲功。損傷可無罪也。於是上詔該鎮將士連年禦虜勤勞實倍它鎮賜李成
梁張學顏金四十兩表裏四之張崇功金二十兩表裏一之黃都李澄清徐國
輔黑雲龍姚大節楊爕曹簠齊可金十兩秦得倚王維貞高良弼肖汝芝孔思
魯金純儒馬負乾張相孫守廉李得全李平胡竇勇祖承訓朱文翰喬官張承
武丁倣高文衢劉希武潘熹趙柏崔吉夏尙忠王純武張三畏孟文舉金五兩。
遣使者齎馬價二萬兩犒軍民其十一月犯海州塞其十二月犯前屯明年春
正月入丁字泊其二月入寧遠灰山堡鹵我軍陳欽二人已入松山備禦使劉
登泰帥伏兵起斬首虜二級相當其三月土蠻益痛怨邊吏入骨髓迺徵黑石
炭等大率三十餘萬治兵期草長而大舉於是青把都及其母哈屯弟蟒古歹
蟒古塞哈卜鎮提達子常擴勞等來告久之果窺十方寺上榆林鎮遠鎮安靜
遠靜馭丁字泊宋家泊諸堡射死我軍朱阿保等數十餘人鹵馬一十三騎而

去。去遼河。逐水草。漢使夜不收。張弓騎。哨至長林子。去塞二十餘里。見裸魯車輛。皆東馳。中間一二虜。隔河爲漢語。語小人。故塞外屬夷也。今以旱過。冒觸土蠻。願渡河而東。得緩須臾。毋死。分守使翟綉裳。以爲此必詭我。我不可許。於是總戎李成梁及副總戎陶承譽。決筴議勦矣。迺帥裨將佟暹。康元吉。以一軍。軍長定堡。佟應科。王朝寵。以一軍。軍新打營。裴承祖。高雲登。以一軍。軍小船城。而以羽檄徵參將李澄清。備禦王守道。陳朝升。及遊擊將軍徐維忠。王盛宗。從征。下令。逗遛者斬。虜方以八十騎。捕伏林中。欲出漢不意。窺塞。不知我塞上精兵。先已知窟穴矣。是日。望見林中。伏虜殷殷起。從長定堡。沙溝兒。南窓牆入。堡軍趙洗。卽吹掌海螺。張旛鳴礮。聲震天地。虜皆懾魂遁逃走。走老營。我兵追至虜營。去邊已四十里。虜接戰。我兵弓矢鎗刀火藥。並發如雨。大破之。斬阿丑哈。伯革柰初太。撘矢。阿卜塞。障太。伯兒。伯戶。革失朵卜等。凡四百七十六級。奪獲馬

三百有五四。牛一千二百九十有一頭。羊一千四百有九頭。橐駝八頭。明甲一百六十七付。盜一百三十四頂。臂手一百五付。餘黨悉鑽林跳河。溺死亡算。先是阿丑哈。引精騎數百臨邊。佯請降。以緩我師。御史李尙默得其姦報不可許。時上注意邊臣。遼左尤甚。故遼奮死以報德。時制置使梁夢龍。臺御史周詠。以捷聞。論功。盛稱總戎臣李成梁。當封廕。遊擊臣陶承譽。當陞廕。參將臣李澄清。臣王有臣。備禦臣馬衛都。臣王守道。臣李梁。臣中軍臣佟進。臣康元吉。當陞賞。遊擊臣徐惟忠。臣王盛宗。備禦臣陳朝升。當賞賚。把總臣楊四維。臣馬世隆。臣裴承祖。臣劉顯。臣宋維殷。臣周文。臣李建邦。臣高世武。臣劉世臣。臣李志公。臣王善。臣都文才。臣金文忠。臣佟陳。臣石定玉。臣王延祚。臣佟應科。臣王朝寵。臣林文節。臣劉天秩。臣高雲登。臣李延齡。臣趙國臣。臣古文相。臣黃雲龍。臣佟世祿。臣朴時忠。臣江應武。當爵賞。千總臣秦得倚。臣李平胡。臣李得全。臣李興。臣祿。

李寧。常賞賚。分守臣翟綉裳。臣張崇功。當爵賞。郎中臣高自新。當厚賚。事下大司馬方。逢時間狀。擇五月初九日宣捷。且爲高皇帝忌辰。以十一日請上御門。行慶賀禮。於是太常具祭品。太史爲文章。遣公張溶告南郊。伯楊炳告北郊。駙馬許從誠告太廟。如禮。詔賜李成梁金八十兩。紵絲蟒袍一襲。廕一子指揮使。遷陶承譽。都督僉事。廕一千百戶。皆世世勿絕。梁夢龍廕一子太學。遷周詠御史右丞。金幣皆有差。賜翟綉裳爵一級。李澄清等爵一級。與張崇功金皆二十兩。秦得倚等十五兩。發馬價一萬。犒軍士。從征者。賜前都御史張學顏金三十兩。表裏二之。加本兵。方逢時。少保。金五十兩。蟒衣一襲。曾省吾。郜光先。金皆二十兩。大紅綺絲飛魚衣一襲。遷所司郎中。秩一級。金十兩。餘悉八兩。其十一月。黃台吉到關。言土蠻復請比宣大開馬市。索種蘖綿絮諸什物。不則陳兵塞上。是時速把亥業已入河東。而三屯營尖哨錢恩公爲黃台吉嚮導。有狀。於是給

諫光懋。見爲土蠻數被兵。常勝在遼。竊恐常勝之家。難與虜敵。而犄角之勢。成於多助。迺以書請申飭備禦。上可之。居亡何。黃台吉擁老撒恰昌吉柰脫柰朱。數萬餘騎。要貢市。而會酋長塔卜囊。馳黃河。迺大會土蠻。以兒鄧速克赤把赤。拱兔。煖兔。委正。小委正。十餘萬。聲欲略廣寧。遼陽。於是裨將秦得倚。千總熊朝臣。出海州。孔東儒出鞍山。查大受。席承祖。出瀋陽。徐國輔出奉集堡。陶承譽。孫守廉。出析木城。凌雲出威寧營。適速把亥。炒花。拱兔。煖兔。合營遼河。大率長四十餘里。而李成梁帥親兵李如柏。李平胡。李得全及把總郭梅兵。從鎮安堡。未買營。出邊。而以蘇國賦。楊燦。爲左將軍。劉承武。王惟屏。爲右將軍。直馳養善木。去邊二百餘里。大戰。擊破之。斬把兒度卜等八百八十二級。奪獲馬一千二百四十八匹。橐駝十六頭。盞六十二頂。甲六百二十付。臂手四百四十四副。我軍死高得功等二人。傷蔡繼祖等一百一十四人。漢馬死二百二十八匹。捷奏賜。

李成梁封爵。它金幣皆有差。語在速把亥傳。其明年正月。土蠻使部夷果力箇。黑淮等三十餘騎到關。索貢市如初。先是黃台吉。討賣老小馬並芽價布疋。關吏閉關。謝絕甚嚴。土蠻愈卻愈求。於是御史安九域上書。大略言遼鎮中後所及前屯外邊烏牛背。大青山。有朵顏大一千之酋。長昂之酋。長兔之酋。董狐狸之酋。小一千之酋。土魯赤之酋。忽兔罕之酋。廣寧錦義邊外虹螺。舊遼陽。有卜而愛之酋。卜言兔之酋。速把亥之酋。哈屯之酋。歹青之酋。遼陽長安外邊。中遼河。有泰寧莽金之酋。卜勞兀之酋。把兒度之酋。卜言之酋。哈當之酋。開原外邊。上遼河。有福餘莽巾之酋。炒木之酋。卜哈之酋。卜言之酋。東勝外邊哈喇河。有撘兒揹之酋。忒木兒之酋。土魯之酋。孛兒戶之酋。歲爲塞上患。我師備河東者曰。我慮十月後。河凍冰堅。騎可大寇。備廣寧者曰。我慮秋高馬肥。虜得長驅。備寧前者曰。我近虜巢尤甚。四時無須臾閒也。要之二月初旬以後。三月中旬以

前舊草既除。新草未長。我稍得恃以無恐。今正月將盡。土蠻頓思大舉。臣必其不敢輕動。至二月中。上馬。至三月而越寧。前至四月而近廣寧。三岔河下。冰已解矣。請以遼陽兵備西面。薊州春防兵備東面。虜畏兵威。必不敢南下而牧。則邊備豈不精哉。獨慮土蠻要市賞亡已。不數日內。以兒鄧及黃台吉。又復見告。臣竊跡遼陽市事。酋皆因以爲利。而獨開原慶雲堡西市。亡賴專誘土蠻爲重。前是福夷入市。近朵顏泰寧人伯言卜言。以兒鄧者蓋兒及黃台吉哈屯。煖兔諸酋。皆傳箭而入。要挾大賞。不一而足。豈直今日事哉。廣寧市例。由文皇帝詔頒榜文。禁持弓箭器械。裸而牽馬。奉土產赴關吏驗入。故欲就約束易。開原故未有禁。而驟思繩以文法難。主計者可蚤圖之。且遼左米價殊迥異。河東軍士願得折色。河西願得本色。先是臺御史周詠。請予太倉金爲糴本。九域以爲未便。莫若開石昌谷州諸金銀冶。令饑民採取。四六以佐軍乏。事下戎部問狀。其

二月。往來者。言裨將馬衛都。以酒肉犒諸虜於長定堡。或言陶承譽。假以犒賞。號召解甲。臺御史周詠。深辯之。夫朝而殺略。暮而歸降。一庸夫能識其詐。而況虜性多狡。一旦驅之解甲。其誰信乎。後土蠻益憤。市事不成。明阻貢道。其八月。土蠻克石炭。黃台吉。大小委正。歹青。拱兔。煖兔。以兒鄧。赤勞亥。花台吉。宰桑戶。土妹。大會於兀炭。聲欲略廣寧。錦義。是時專難。董狐狸。兀魯思罕。鵝毛兔。亦治兵。待土蠻。略寧前久之。土蠻罕他太兒打兒罕。灰正蘇把亥。聚四萬餘騎。在好村。刑白馬。以祭旂纛。下令。並馳磕力曲禮。期而不至者罰。於是。人牽牛二角羊三頭。以充餉資。是日。直走錦川營。小河口。李成梁卽提兵馳高台堡。明山川。鑿戰。虜度不能當。還走出塞。我兵死一人。傷三人。漢馬死者三匹。已復犯仙靈。其九月。西虜青把都。治鉤鎗諸鬪器。大會辛愛及三衛。聲欲略遼左。時冬月大雪。馬牛多餒。土蠻男卜言台周。宰桑兀兒。皆治鳴鏑。決筭入廣寧錦義。略糗糧。以

糊口。市夷大亦洪。具得其狀來請。於是夜不收張鐸。哨至邊外歪頭塙地。虜皆敝車羸馬。雖眾無所用之。頃之。虜以三十騎。馳長勇堡大邊獐驛站墩。空牆而入。備禦使張世麟。提千總王景魁兵接戰。虜分爲二枝。以一枝圍堡。以一枝刦略。會遊擊將軍王守道馳至。合營殊疾力擊殺甚多。皆鉤馱其屍而去。我兵死一人。傷二人。漢馬死者十餘騎。已土蠻同男卜言台周宰桑兀兒。大會黑石炭。大小委正二十餘萬。空巢而來。略廣寧。過黃河。至那林。請貢市如初。大言漢不許我。我破迺城堡。於是遣速把亥。略河東遼瀋。開原。備禦使劉崇正得之降夷。召兒兔。有狀。召兒兔。故堵刺兒哈刺越部夷也。後果略長勇。故城鎮北。丁字泊諸堡。是歲萬曆庚辰也。是後土蠻出沒志復在薊門。

土蠻列傳下

上蠻兒伯言。蘇把亥。黑石炭。銀燈。五萬餘騎。從撥刺兔治行。往河西南兀魯班。蘇喇哈聲。欲略寧遠。前屯衛。因奪山海關。十月。諜者馳。澆鬼營。得土蠻近狀。方與伯彥等五萬餘騎。欲從刺母林入遼左。寧遠閒矣。夷婦孫則。又言土蠻到土列根。撥刺兔行。欲入黃土嶺。一片石。東到山海中前所。日日竟從敖木林止壁燕河路。敖木去遼左寧前可二日。去薊鎮東西可五日。邊吏皆陳灤河以備虜。時遼陽地震。復雨雹。大雨如注。居亡何。虜自苑兒營入。已自錦川入。以四萬餘騎。布十里許。參政使李松亦更戎衣臨兵。於是遊擊將軍黃都。卽擁精兵馳狗兒河轉戰。斬首一級。奪獲馬三匹。都復與遊擊將軍許汝繼。大戰石河墩。斬首二級。奪獲馬二騎。虜還走山莊巢。列陳二十餘里。得出塞。先是薊鎮總戎戚繼光。馳中前所應援。大司馬方逢時。以督撫梁夢龍。臺御史周詠。御史安九域。議

請。上念兩鎮將吏。協力卻虜。功同斬馘。賜梁夢龍。大紅飛魚綺絲衣一襲。金四十兩。李成梁。戚繼光。金三十兩。表裏亦如之。繼光加少保。周詠。張夢鯉。皆賜金三十兩。二表裏。遷夢鯉秩一級。李松金十兩。遷秩一級。楊紹勳亦如之。黃都金十兩。祁棟金五兩。其十一月。土蠻黑石炭。聚黨二萬餘人。欲略廣寧迤西。其十二月。黑石炭銀燈。一指委正帥三萬餘騎。約土蠻略遼東。廣寧。而土蠻志尤在義院。以報薊鎮之役。誠母犯遼。頃之。虜騎遂合營。欲攻廣寧。花桑谷。猶豫未決。於是與速把亥合營。移遼河。止壁邊外紅土城。佯言欲入海州。以牽我師東顧。又以零騎。一犯錦州大鎮。一犯義州。大靜。以覘我虛實。土蠻爲人最倔強。盤牙遼左邊外。兩河患虜。錦義爲尤甚焉。通近虜巢。又塞外山林設險。易於捕伏。哨探既難。追逐不便。異時總戎李照。王道治。死此樹下。時按察使李松。分守使張崇功。洪濟遠。分巡使周于德。太僕少卿喬應春。監軍十道竝發。而大將軍李成

梁捕伏大清堡。乘勝出塞二百餘里。直抵大營。擊破之。斬首虜凡四百七十一級。奪獲橐駝馬牛羊器械亡算。我官軍傷者凡九十九人。制置使梁夢龍。使使奏捷。以正月二十二日。公卿以致詞稱賀。祭告郊廟。上有詔。後邊功奏捷。俱先議賞。其應陞等項。俱候勘明奏行。是役也。賜李成梁。大紅蟒衣一襲。還同梁夢龍金五十兩。表裏四之。周詠金三十兩。表裏二之。周于德。高自新。朴栗卿。秦得倚。李成材。孫守廉。李平胡。李得全。熊朝臣。曹簠。楊爕。蘇國賦。劉承武。蔣位。金二十兩。高自新。李松。張崇功。洪濟遠。喬應春。雷以仁。徐枝。黑雲龍。金十五兩。周之望。劉崇正。涂廣。黃廷鑰。張相。查大受。李成林。金十兩。于國母。承先。楊栗。陳文治。金五兩。本兵調度有功。方逢時。金三十兩。表裏二之。吳兌。王一鶴。金二十兩。表裏一之。司長。皆賜金十兩。辛巳正月。王兀堂殺我寬奠。鎧陽。語在王兀堂傳。時土蠻又聚兵十萬。聲言欲略開原。不可。則此略建州伯顏罕。筭已決矣。會忙金。

兒阿只亨林亦擁四千餘騎屯大寧以元日焚紙約與土蠻略遼左我諜者诇之或言土蠻灰正在捨刺母林或言在黃河黑河或言在遼河上梢於是遼東廣寧迤東西苦兵甚矣其六月御史于應昌覈鴨兒匱紅土城功併請詔曰李成梁累獲奇功著以原任都指揮同知併功世襲伯爵給與誥券其七月土蠻調黑石炭蘇把亥正哈亥惡卜各素已調好趁家達子及大委正約與略廣寧迤西山海迤東土蠻男百樣又約諸虜畢聚老河廠房乃使柏三戶往安灘營而西虜黃達子亦往土蠻營土蠻方移壁一克磕力把漢磕力與速把亥祭纛定以八月初十日直擣寧前期而不至者罰治後土蠻以酋長老思罕未至與諸虜改約至二十日夷使以檄速之又不至西虜至者唯蟒古歹一枝而已土蠻不得虜不敢入九月虜始張旛幟持鉤杆跳驅與水堡分道而馳馳東窯河者備我師東壁馳寧遠者備我師西壁馳關廂巷者圍我城堡是時備兵使李

松躬帥偏裨。三面當虜。至東關。大戰十合。南關八合。東關又六合。虜不敵。潰圍北走。我師追之。從天礮臺出邊。久之。土蠻石黑炭打來罕。以長昂爲耳目。多持械攻城具。復南馳克兒裡。以遼左失利。欲犯山海關。一片石黃土嶺。大毛山。先使諸騎分布卜里兔眼及羣。渾落兀素。卜里兔眼去大寧。東北可二百餘里。羣。渾落兀素去大寧。東南輕騎。可半日至。所在皆唶唶聲也。先隆慶初。花桑峪失利。土蠻僅以身免。向不敢窺山西。今漸東逞。從山海走界嶺口。首尾略盡矣。時薊鎮總戎戚繼光。亦分部燕河。臺頭。石門。山海四路。備土蠻。御史劉光國言。兩鎮諸臣未盡協心。似非長算。給諫王致祥言。方可憂。書多不載。時薊鎮南兵厚糧粟能。與北軍異。互相詬病。至謂不慣披戴。難當虜鋒。致祥恐兩軍不睦。利其敗而實其語。南兵卽死。柰疆場何。如欲調和南北。請著爲令。以分之。在薊門。則思灤東爲受敵之衝。在遼左。則思寧前爲虛弱之病。皆深溝遠瞭。堅壁而守。以

隻虜不犯。爲上功。如一入遼。則薊門大將軍。軍右門。出銳師。以撓其勢。如入薊。則遼左大將軍。軍寧前。以扼其吭。若率然在山。虜將不戰而屈。久之。虜騎從慶雲堡入。裨將吳尙忠擁精兵。馳中固城。會虜攻關廂急。偕遊擊將軍王維貞。令鎗棍火器竝發。虜始懼。犇馬家寨。而備禦使高雲衢。李宗召。蔣國泰。益堅備鐵嶺城。適裨將黑雲龍。馬世龍。郎梅。兵至。虜果馳鐵嶺上。往北走。於是黑雲龍還歸中固城。而副總戎孫朝梁。及參將孔東儒。楊伍典。備禦高雲衢。皆尾虜邀其歸路。虜倉猝反走苗頭。向城東井朝寺。我軍四面竝發。斬首虜三級。奪獲盔甲二項。弓箭三付。腰刀三柄。馬七騎。陣亡百戶朱國戶。蒼頭軍陳得時。漢馬死者二十七匹。傷胡承恩等六十六人。馬八十五騎。至十三日。復攻關廂。我救兵四合。更迭進戰。虜始夜投殷殷家莊去。已出塞。不及追。隻虜遺矣。顧有攘此功者。流言虜把薊門。京師鼎沸。民攜家赴安定者。爭門而入。多蹂踐死。通州民爭舟。

而渡者多漂溺死。玉田散走林薄。多饑寒死。村落年少乘閒幽掠者。不下土蠻。御史王國行部按之。數日而定。乃虛聲自建昌至也。其十月。虜騎犯義州。深入大凌河右屯衛。其明年正月。土蠻黑石炭。以蟒金兒爲嚮導。與西虜哈卜慎。蟒古歹。往長昂營祭天。聚兵四萬。壁廣寧外邊。居亡何。虜騎犯錦州。深入松山。杏山。小凌河。殺毆官軍。其二月。炒花使部夷哈喇那亥。告漢言。土蠻男卜言台周。腦木大。黃台吉。克石炭。大小委正。以兒鄧。矮兔。拱兔。抄戶兒。陳兵女只。罵水屯。已竝馳赤納哈氣兒。佯言略海西建州。欲出不意。犯廣寧塞。然虜多往騷達子營。竊盜馬牛羊矣。藉藉皆有口。自是後。花大亦使火力紅道。言黃台吉。克石炭。大小委正。欲斬關而入。略廣寧東西。給諫王致祥。見土蠻深入凌河。焚略幾盡。其視遼民蓋藏。不啻原圃。迺奏薊鎮亟調援遼兵馬。以資夾擊。宣大亦戒青把都。竊發以防未然。久之。土蠻黑石炭。擁眾馳裸郎兔。休舍成梁從義州。大寧堡。

出邊行四百餘里。直擣虜壁。擊破之。斬首三百四十三級。奪獲馬四百三十騎。盔甲器械亡算。我蒼頭軍亡馬鋒等四人。傷張永官等七十四人。漢馬死六百八十騎。捷至。會上大閱喜甚。祭告郊廟。賜爵賞金幣如例。語在黑石炭傳。自後土蠻益懷不逞。與速把亥。阻河爲險。以避我兵。出沒東西。毆殺以報。其四月。黑石炭。以兒鄧。小歹青。卜言兔。阿夷。聲言略遼瀋。海州及廣寧。虜騎萬餘。從長安堡。直走新城南境。我兵李守忠渡河。守備使劉崇正追至堡東。可三里許。虜以二千餘騎挑戰。我師大敗。千總陳鵬。把總潘汝楫。蒼頭軍曹義等。死者凡三百一十七人。傷楊四維等。凡一百五十八人。漢馬死者凡四百六十四騎。我師斬首虜五級。奪獲馬二十八騎。御史于應昌。使備兵使張崇功廉之。實殺略遼左男婦凡二百九十八人。傷一十九人。齒馬牛驢凡三百七十九頭。糗糧九百九十一石。焚燒室廬凡二百有六所。以書劾奏。上詔革曹簠。張奇功任。并崔吉。吳

胤祉下御史逮問。其九月。虜騎五萬。從謝海深入山岡鋪。白廟兒屯。見屯堡備兵至周詳。盡驅馬還歸。我師聚而追之。虜以萬騎接戰。漢兵萬弩俱發。擊殺甚多。虜亦發鳴鏑。射死我軍李雲等七人。馬三騎。其十月。土蠻大會。速把亥謀入。因遼水深不可渡。馳白雲山寺邊。可三十里。圍廣寧城。不克。復從鎮安。鎮靖入邊。攻圍山堡。盤山驛及十三山驛。已攻義州。殺略軍民二十二人。鹵六人。糗糧二千一百有八石。焚燒廟宇二座。草廬五百四十八所。車七輛。我兵斬首虜一十八級。奪獲馬四十二騎。官軍張勳等被傷者五十二人。漢馬死者五十二騎。虜皆從大清。大靖出邊。其明年正月。虜從靜遠堡九臺入。已從榆林堡。入瀋陽城南渾河西岸。已從長勇堡。大臺南北二空。深入渾河東岸。時土蠻欲略廣寧。迤西。伯彥兔又聚兵捨刺塔。欲略廣寧。迤東。會王果男阿台。阿海報虎兒罕。而瓜兒罕爲速把亥。報開原。青把都。又略速把亥。卜言台周。大會黃台吉。以兒鄧。

青把都。伯言鬼。大正委正。耿革兒。以克歹青。馳遼河及瀋陽。海州。廣寧關門迤西。逞把都。莽官大。莽骨塞。乘機略寧前。錦義。其二月。炒花。請土蠻。往空臺子。報速把亥之怨。其九月。西虜哈卜慎。聚兵二萬餘騎。大會土蠻及大小委正三衛屬夷。聲欲略寧遠。山海桃林口。山海關參將王守道。請治深溝固壘。以衛關外居民。頃之。小委正帥萬餘騎。馳廠房。走山海關。關上兵出中前所。延綏兵出前屯衛。東虜大逞克世等。擁三萬五千餘騎。馳老河水汲。欲略山海關或一片石。而一克灰正馳惡力委正亦會青把都所。欲略山海關。亦如之。迺決筭。以三萬五千騎入關。行劫略。以二萬餘騎堵口子。阻絕遼陽。弗得通。如入關亡所利。從此略前屯衛。於是村落居民盡遷徙。入山海關。而大將軍楊四畏。備臺頭石門。東協副將軍楊紹勳。中協副將軍史宸。皆張三軍。東移聽援。遊擊將軍戴朝弁。檄把總李幹兵。預設鋼輪火礮。備一片石。指揮傅國忠。備巷口。令千總張蘭。出

寺兒谷。參將王守道出關外。則西虜哈卜慎已至大寧城矣。頃直往塔盤。至敖母林。大會大小委正。先是虜騎略前屯。山海亡所獲。迺馳罕赤保哈止壁。復從前屯衛三山營入。而譟者張興三。曹文勝。阿的生。道逢虜興三。獨中流矢死。於是守道。提裨將崔大相。施奇武。楊國賓。張便。兵八百有八人。遊擊杭大才。提裨將盛莊。王爵。劉彥。兵一千四百三十有三人。皆舉烽直走老軍屯西李家山臺。鑾虜虜下馬穿甲。我軍亦下馬依山爲營。設置火礮。虜適用白旗。每旗引數十餘騎。分道並馳。我師火礮。火箭。三眼銃。並發。虜皆還走。已更番衝鋒。大率增萬餘騎。王守道。杭大才。卽鳴大礮。虎蹲礮。自午至酉。大戰五十合。斬獲大相當。會莫。虜還走一里許止壁。我師被圍甚窘困。守道乘夜半解嚴。躬帥軍士執刀鎗器具。掘壕用盃連土。壕深四五尺。將火礮設置壕外。我軍擐甲拒守。日日虜迺以一枝阻前屯。以一枝犯一片石迤東新堡。去關可五里。先是遊擊將軍戴朝

弁都護霍貢備一片石。烽火嚴甚。人畜又皆內徙。虜亡所獲。鹵呂家莊男子呂信等七人。傷朱福一人。燒李澤車一輛。趙世臣房一所。驢二頭。因使七八騎。衝南水關。監門張蘭。以矢石擊去。皆還走。虜亦射中我軍王大功。已復走。四騎追。蒼頭軍林見至東嶺。賴關吏戴邦彥救免。是日守道。使陳良金。夜半出營告變。亟徵兵。有副總戎楊紹勳。以中軍盧光先兵至。參將王國翼。以中軍汪洋兵至。遊擊麻柏。以中軍李從善兵至。參將錢國用。以中軍李如梓兵至。遊擊劉遠圖。以中軍李爵兵。救之。四面合陣。主事王邦俊。趨諸軍出關。關外虜勢強甚。我師竝休舍丘家山。明日。虜折居民門板。蔽箭。益衝鋒。守道兵殊疾力戰。火藥弓矢幾盡。即以悶棍潰圍而走。楊紹勳馳救。舉放號礮。守道知爲援兵也。亦鳴礮響應。合營接戰。破之。斬首虜一級。奪獲達帽。套靴。達刀。木鈎。鈎鎗。護胸。皆一事。達箭三百八十四枝。回箭二十六枝。於是參將高如桂。遊擊王鳳鳴。以一軍軍黃。

土嶺。參將賈應隆副總戎張玠。以一軍軍駙馬賽界嶺口。劉家營遊擊路宰。王添職都護馬魁武。以一軍軍山海關。虜望見大兵四至。皆退走。臺御史翟繡裳。督戶部郎程宗伊。主事王邦俊。治糗糧。率永平卒李一言。轉餉不乏。恐虜復有它圖。使參將錢國用。王國翼。備信地。紹勳備前屯。備兵使成遜。馳臺頭路。軍居中。虜竟東走前屯衛。由沙河站高臺堡去邊。頃復以五十騎從大清堡奔白土溝。備禦柏朝翠。追逐至雙壕。斬首一級。奪獲馬二騎。自是後。給諫馮景隆。劾奏寧遠伯李成梁。上從大司馬吳允議。詔曰。邊事重大。將才難得。若大將盡忠奮勇。替朝廷出死力的。卻誤信浮言。橫加詆斥。反不如避事偷安的。可免訾議。這等是非倒置。功罪不明。何以服人心。作士氣。李成梁封爵照舊。益加策勵。勿以人言芥蒂。有負國恩。馮景隆輕率妄言。姑調外任。其月。虜騎從古北口入。先是謀者由松山始至背陰障。凡九撥。一旦虜敵。卽鳴礮傳檄。而松山將袁祥。不

行遠探虜得直走山海關。過歡喜嶺。於是王守道卽提裨將崔大相施奇武。兵五百一十五人。杭大才。提裨將盛莊。胡順華。兵八百五十五人。出關而把總楊國賓。張便。王爵。柯寧。徐桂。竝馳南北水關。虜迺帥千餘騎。衝一片石。掠人畜。從南山。走犇石門路。我偏裨戴朝弁。麻柏。霍貢。路宰。竝發火器。追急。奪獲周安。李真。等一百三十三人。牛驥二十一頭。已虜千餘騎。衝南北水關。把總張蘭。王爵。張應期。丁科。病力戰。虜大敗。鼠竄南海口。旱門角山。行至三道寺。裨將譚堪。趙愷。何寧。徐桂。卽以郎機。火箭。快鎗。石礮。拒堵。而虜騎之眾。亦增至三千餘矣。虜執鉤鎗。短刀。衝關廂新城。而會新城北面。未告成。虜遂從城北抄入。殺我百戶陳守仁及軍餘徐奉。呂勳。亦被一鎗幾斃。守道衝鋒。奪獲達帽一頂。氈口袋六條。鐵鉤鎗一十三桿。盜纓一根。達箭三十九枝。捕斬相當。遊擊將軍張秉忠。馳救。虜竟還歡喜嶺。已復以三百餘騎。奔一片石。我鋼輪石礮甚備。虜不能駐。始

虜在關外。殺我張貴等三人。虜我孫虎等六十五人。傷我譚昇等三人。奪羊豕牛驃驢以百數。糗糧七十七石五斗。燒燬土平房一十九所。車一輛。俱論指揮林樹勳以法。由收保之合弗早圖也。時遼東人梁才亦被虜。久之。竊胡騎奔關。逢中軍崔大相及蒼頭軍詹二。詹二奪被衫布袋。奪所騎馬。梁才以裸身不可歸。因賂詹二錢。一得贖衣被而去。居亡何。虜騎百餘。殺略關外鄭家莊人。史宸卽擁戴朝弁路宰霍貢高如桂王鳳鳴兵出塞。虜以東馳八里鋪老君屯。餘黨或竄入前屯衛。我師追逼。虜皆從古北口出邊。漢使黑倉諭之。至丙兔打兒漢營。諭之。則土蠻之弟小打兒漢董狐狸之男伯彥孛來。并死關吏刃矣。哈卜慎兵卒。被擊傷尤甚。於是青把都。往專難營藉兵。又逞仰二奴。約土蠻略鐵嶺。遼瀋開原。土蠻業已刑馬祭旛纛。欲犯三岔河及遼陽。爲速把亥修夙昔之怨。迺引男卜言台周。大會黃台吉。以兒鄧青把都。土妹摺臣。大小委正。歹青。莽古素。

台吉塔塔兒伯戶莽惠拱兔煖兔奘兔逞把都已又會五路男扯勞亥速把亥
男把兔兒及花大抄花老撒卜兒亥牧馬養善木大入遼瀋海州其十一月虜
以五人捕伏冷家溝殺道上行人一人馬一匹劉崇正使把總賈待聘高尙仁
陳衛國馳冷家溝捕獲生口脫羅復追亡至紀家臺乘雪襲蹤堵截虜一人從
白土溝出邊柏朝翠追逐至皂洞山去邊四十餘里劍斬之虜亦傷我兵一人
馬一匹其十二月虜騎三萬從榆林堡入蒲河及永安寨大寧諸堡參將王有
翼擁精兵轉戰益疾力擊破之後先斬首捕虜凡四十二級奪獲馬八十一騎
我蒼頭軍死李化等二十六人傷官軍李平胡等四十八人漢馬死者六十五
匹先是備禦使何應魁使諜者錢仲美等七人由長勇堡出塞馳長山去邊可
一百里有虜騎四五十從西北來望見漢使輒前接戰漢使殊疾力斬首虜五
級奪獲馬八騎虜亦傷我兵一人馬三騎已復使降夷我羅柰等三人馳養善

木舊遼陽。虜營火光燭天。我軍使降夷卜兒寨。勾登。向化等十二人。馳伏捫革兌。去邊七八十里。道逢虜八騎。轉戰斬首二級。獲生口盃。指打兒漢一人。馬一騎。虜亦傷。卜兒寨一人。馬一騎。而是時長昂。董狐狸。欲略前屯。錦州。東虜速把亥。灰正。西虜哈卜慎。會土蠻及腦毛大。欲略三岔河東遼陽。瀋陽迤西。并金復海蓋。東虜銀燈花台吉。欲略遼陽東西。以故閒諜甚密。其明年正月。漢復使降夷卜墩。卜兒寨。乃六果羅太。忒谷。魯之東等五十二人。由義州大康堡出邊。行至哈老柰掩伏。而乃六果羅太等行至虎塔孛羅。相去卜兒寨。既三十餘里。虜以七八騎衝鋒。乃六等忽轉戰。魯之東捕獲生口打兒塔一人。忒谷斬首一級。是時三岔河尚未凍。東虜大委正。小委正。治兵。日夜候土蠻至。土蠻先使先大兒子伯彥太主。數萬騎。治行。令人持口袋一條。及鉤杆鐵斧口袋。用以乘土。至冰上墊路。然土蠻微指。必欲俟河凍實。然後大入遼陽南四衛。不則入廣寧東。

西矣。邊吏聞諜者言。腦毛大滾兔。欲略寧遠迤東西。而董狐狸。獐兔。欲略前屯。迤東西。長昂。董狐狸。又欲略山海迤東西。皆有狀。其正月二月之交乎。是月土蠻部一克灰正。滾兔總萬餘騎。擇精兵五百。馳黃土嶺。阻絕漢使往來。把亥。灰正。又陰與滾兔約。以四千騎。佯言行獵。誘遼東人出塞。撲殺之。如弗至。請以數千騎。大入寧遠。二者必居一焉。居數日。土蠻大男伯彥太主。及部夷一克委正。聚二萬騎。入遼東。開原。而小委正。歹青。亦治盔甲鉤梯。擊錦義城堡。把兔兒。至上蠻所。言我無年命。姑徐徐。今弗至。是時把兔兒。抄花花。大卜言顧。方牧馬。恰亥額力素。以爲新月兒上。乘此騎。馳舊遼陽。諜者來告曰。西虜欲自無冰者入。東虜欲從有冰者入。居亡何。黃太舟。恍忽大。竟馳養善木。東虜短弓兒。茶回兒。灰正。馳黃泥溝。築城。而土蠻黃台吉。亦馳陽場河。始蒲河之役。殺略石家衝。馬祥溝。李馬軍溝。舊排插屯。王連屯。斗山屯。洪傑小屯。八家屯。黑林子屯。錢剛。

屯。崔官屋基屯。孤山陳家十餘屯。雕背山之役。殺略人畜至三百。燒燬房屋至一百二十餘所。奪獲糧穀至六百有餘。制置使張佳胤。乃劾奏備禦使郎梅。李日增。王九貢。遊擊韓元功。史儒。參將涂寬。旂鼓官張棟。上從大司馬張學顏議。左遷郎梅等秩二級。韓元功等一級。改調王大用。其三月。長昂哈卜慎。約土蠻。入寧遠東西。頃速把亥子卜言把都兒。偕土蠻爲阿父。大入開原鐵嶺。其四月。青把都亦治兵。與土蠻約。以八月入遼東。土蠻報曰。必欲大入遼。始俟天大雨霧晝晦。然後起。出遼所不意可乎。其九月。土蠻馳專難他不能營。約青把都兒。躰忽歹。大入薊鎮義院口。因止壁大寧老河。時哈卜慎擁七百餘騎。行獵東北。頃之。老酋婦及青把都。佯言迎喜神。發自白言舉兒克東馳。專難恰儻不浪。卽託以駝米。陰帥諸部夷。日夜裝。於是哈卜慎。猛可真。小阿卜戶。因使通事兀子來。請於馬蘭牆子嶺。曹家寨。開撫賞。而會長昂亦至。自虹螺山分兵。至擦屋冷。

口桃林迤東。撲捉尖夜。以絕我耳目。若小阿卜戶。又以好辭款塞。請除罪。卜戶。故青酋部夷也。制置使張佳胤洞察之。不過以請賞爲緩兵計。且馬蘭又牽制我三路。給諫王三餘奏亦如之。請預發密薦永平年例銀十萬兩。以佐軍乏。詔可之。其三月。西虜擣臣台吉得兒鄧台吉以兒鄧大會東虜把兔兒花大炒花。卜言顧竝馳舊遼陽休舍。聲欲略遼瀋。於是增長營靜遠上榆林。十方寺。會安。步兵。皆一百人。居亡何。虜從上榆林堡南。張旂幟。鳴礮。竟從威遠鎮直犇河北。已徙河北。深入南泥溝鋪。因以三百餘騎。捕伏劉千戶屯。我師尾其後。奪獲馬三匹。橐駝一頭。虜退大營。聯絡王連諸屯。而漢亦還石山兒屯。自是偏裨涂寬。喬官張棟。裴永勳。史儒。施國臣。兵及降夷勺登等。一百有四人馳救合營。虜選精兵六千騎衝鋒。傷我楊繼文等二人。馬十八匹。會大風。飛砂蔽面。不可戰。竟從十方堡南。榆林堡北出邊。漢使勺登調之。行至大長山河。去邊可六十里。遙

聞西岸諸虜吹掌觱篥。傳發卽還走上榆林堡。而以兒鄧業渡河矣。頃勺登復從十方寺堡出塞。行大長山。逢虜騎五六十。接戰擊破之。斬首虜一十級。奪獲馬九頭。盔甲四副。虜亦殺降夷納哈一人。傷那亥大等二人。漢馬死者四匹。其四月。土蠻大會東虜。皆攜小穹廬。并有奶駢馬。乳牛。聲欲入廣寧錦義。由此塞上藉藉。或言土蠻罕。一克委正。一克打來罕。提十萬餘騎。治兵尺納哈氣兒。略廣寧東西。或言聚二萬餘騎。略寧遠山海。或言土蠻。把漢委正。聯寧遠。或言治兵捨刺塔林。略遼陽。以積怨深也。居亡何。虜騎果入十方寺。不克。去長勝堡。又不克。去靜遠堡。又不克。去上榆林堡。是時御史陳登雲方閱視。嚴烽火。卽以一月四入。無寸草爲虜利者。久之。瓜兒鬼。黃太舟。倚克打刺漢。會舊開原。而把鬼兒花大炒花。同西虜以兒鄧。摶臣台吉。五路男哥兒。欲入討來鬼兒。十方寺。而土蠻打刺漢。黃台吉。又欲大入開原鐵嶺瀋陽。合從而起。計不返顧。而邊備亦已。

日固。至八月。土蠻使部夷躡戶百戶。欲入界嶺。與諸部夷謀之。或又稱薊門兵將所聚。不可入。土蠻乃好謂曰。界嶺必不可入。蓋不從廣寧入乎。又九月。土蠻益徵諸。略廣寧及遼瀋爲務。有夷中鐵匠煖太。走漢營告。漢亦分諜靜遠榆林長山閒。知其路必在瀋。頃虜夷六萬。直擣懿路。以漢兵追逐。還走。後從上堡北空之十方寺南空。後入順邊。竟擊破汎河懿路二城。旋出。是後汎河懿路備益堅固。居亡何。虜復以二千餘騎窺堡。遊擊將軍查大受。引兵鑾戰。虜皆走殷家屯塞。我兵五千騎。列陣新堡城下。虜見兵盛不利。皆還騎。會老營。居一二日。虜會五萬騎。圍汎河城。我師大戰數十合。破之。多所捕斬。而以虜勢重大。不及取首級。上幕府。虜皆以鈎鎗。得屍負載而去。汎河平衍。可列馬步。濠塹尤深。帆檣稠密。虜疑其下有伏。不敢至。至東門。中軍張良棟。把總張治。守之。不可下。竟被金瘞死。虜迺直薄南門。把總陸尙學。殊死戰。勝亦如之。虜乃自宋家泊出塞。

明年二月。東虜一克灰正。把漢灰正。土蠻台豬把兔兒。抄花花大老思卜兒亥。約土蠻男李彥伯彥鬼燒花。十萬騎馳遼陽邊外。挾賞賚且曰。如例則已。不然者。以十萬騎擣若塞。不得耕種。是時東虜方攜牛羊糧米及皮張氈片。屯阿亥壩。而塞上卒或言。西虜青把都及滿都不賴。欲入遼東。伯洪大及東虜蟠戶伯戶。欲入寧遠。甚有聲。適虜騎五十。從正寧堡入。擊臺兵殺一人。略馬二匹。驢二頭。旋出塞。漢因使降夷乃六。我兌出鎮靖堡。往諜之。行至李羅嶺。逢夷哈亥率其弟若妻來降。具以實告。於是制置使王一顎。臺御史顧養謙。總戎李成梁。大會庭中議。計莫若先伐其謀。而會成梁有風水恙出。萬死不顧生。竟輿疾。從鎮邊堡出塞。行二百餘里。道逢虜於可可母林。大戰。我兵鎗矢火箭火礮竝發。自辰至未。母倦。虜披靡四散走。我進至穹廬。擊破之。斬首虜九百有二級。降夷乃六。奴木賴。視之中有酋長虎兒處。把都等二十四級。奪獲被齒漢人二十九人。

幼夷七十八人。胡馬一千三百餘匹。駱駝。盜甲。器械。動以百數。我兵死者僅三十餘人。越四日。班師入城。大雨如注。三軍舉手相賀。此天爲洗兵矣。給諫顧九思奏以爲奇功足嘉。始大將軍提兵。取鎮邊堡閒道。出虜西北。撓其後。晝則捕伏山谷間。不敢火食。食乾餚飲水。夜則疾馳。用副總戎李平胡。李得全。帥降夷四十餘騎。先驅導軍。故得趨便宜。無失道。如是者凡二晝夜。二日之內。大風雷鳴。飛砂石蔽天。卽人馬囂塵不能辨。故機不先露。而我兵得近。及虜覺而迎敵。我兵已橫絕之矣。是日風恬日朗。虜無遁形。虜甚急。矢發如雨。士馬死傷。而我兵愈奮。爭爲先鋒。虜以爲有神也。頃之。屬御史王國弼。訪誅納。旣乘傳到廣寧。卽偕備兵使任天祚。按驗與兩臺所奏同。大司馬嚴清宣捷。祭告郊廟。皆如故。上賜李成梁。廩男秩遷三級。王一顥遷御史右丞。視右司馬事。顧養謙亦御史右丞。金錢幣帛皆有差。遷任天祚一級。趙三聘俸一級。遷楊爕署都督僉事。陞

李寧。李興。查大受。孫守謙。秩。視副總戎。姚大節。劉崇正。官如故。陞涂寬一級。王
緘俸一級。金皆十五兩。傅霖。准以原官調用。葉夢熊。金十兩。高良弼。八兩。宿振
武。五兩。發馬價五千。以犒軍士有功者。本兵調度有功。賜張佳胤。石星。金幣有
差。郎中皆十兩。它一切五兩。其三月。土蠻偕一指委正。把兔。十餘萬騎。皆帶牛
羊騾馬。欲深入廣寧東西。是時。東虜銀燈。聚兵三萬。腦毛大。亦牽戰馬及騷達
子打刺漢。并皆欲入廣寧。打刺漢。迺使龍兔伯言。略開原。鐵嶺。大氏。土蠻。欲以
廣寧。請比宣府。張家口。開馬市。而炒花。把鬼兒花。大老思。卜兒愛。則又大會以
兒鄧。入遼瀋。哈刺把備入開原。紛紛藉藉。母寧日。其明年正月。漢使降夷。乃六
等四十七人。從鎮虜堡出哨。行至硃砂壩。去邊三百餘里。逢虜騎三十有奇。接
戰。擊破之。斬首虜七級。餘遁走。乃六亦從新寺兒山入塞。居頃之。虜騎二千。直
薄東昌堡。流沙溝。會冰坎傾馬。馬多跕立河北岸。於是先鋒三百騎。馳迤西新

鋪臺大路。去邊七里。殺我黃欽等一十八人。燒草房五十五所。鹵男婦八人。古大相。提兵接戰。斬首虜一級。奪獲馬四匹。虜亦殺我軍趙要及溪馬七騎。鹵三人。驢牛八頭。其二月。虜騎千餘。從西平堡。平山臺入。千餘捕伏邊外。分六十餘騎。從鎮寧堡。張茂臺潛入盤山驛三里橋迤東。略婦女四口而去。於是臺御史顧養謙帥成梁以兵截其歸路。李平胡等卽引百金之士二千五百人。從鎮遠堡。樣臺西空出塞。馳遼東河。去邊已九十餘里矣。虜迎戰大敗。我兵斬首捕虜凡三十七級。奪獲馬五十騎。被鹵婦女四口。我兵亡李繼祖一人。傷官兵馮文用等一十九人。漢馬死者一百九十一匹。其四月。土蠻黑石炭銀燈把漢打來罕。一指委正。大入廣寧東西塞。而東虜把兔兒。卜言顧。老撒。卜兒愛。煖兔。伯言兒。皆馳三岔河迤西沙嶺高平大小黑山居頃之。虜騎萬餘。從邢百戶大臺至東蓮子湖。東空臺。臺空。空拆牆口七十餘所。於是分五千騎。犇鎮武堡東西門。

五千騎奔堡東大臺。老鴉莊臺。穿牆而入。遊擊將軍劉崇正衝鋒。益疾力。自辰至未。會平洋。西平。西寧。偏裨涂寬。塗廣。胡尙忠。楊紹先等。馳救。虜迺半渡河還歸。半欲往南面深入。見湖泊泥濘。而正兵營兵。又從西至盤山驛止壁。悉勒馬盡出邊。我兵死黃相等一十六人。行人六人。傷李敏等二十九人。漢馬死者一十五匹。鹵三十四匹。漢人陳來子等一十三人。馬牛驢羸一十七頭。焚車五輛。漢僅獲胡馬六騎。是後降夷我兌等。復從鎮安堡出哨。至莫艾兔。去邊四十餘里。虜以十餘騎接戰。我兌斬首一級。奪胡馬二騎而還。阿卜當。李得功等四十三人。亦從平虜堡出哨。至長山。去邊可八十餘里。乘夜黑。奪獲馬二百二十四。小駒二十二匹。其五月。降夷阿卜當及蒼頭軍楊萬里等。從長勇堡出邊。馳中遼河。去邊可一百餘里。遇虜騎百餘北走。阿卜當忽從中起。鑾戰。生獲海廝得一人。奪獲馬五騎。牛一十二頭。虜亦殺降夷一人。傷我兵王友功三人。漢馬死

者五匹。先是把兔兒帥百十餘輩。捕伏溝中。欲入清細河。備禦高良弼。即使降夷蕭漢。卜向花。我兌羊羔兒等七十五人。從太平堡暮山營臺。馳古勒半已林。去邊可二百五十餘里。虜方以三十騎。擺撥架梁。遙見漢兵。皆鑽林走如蟻。我兵亦斬首一級。奪獲馬一百五十八匹。漢馬死者九匹。是時黑孛羅之子託力。爲劉國威所斬矣。託力一名把兔莽機。蓋胡中所稱巨酋。與速把亥爲顏行。級乃大如斗乎。其後二年庚寅秋十月。土蠻族弟土墨台豬。使夷使藉兵西虜青把都哈卜慎。以爲吾已聚兵六萬。幸爲我更治四萬。姑俟長昂。獐兔至。卽當大舉。時往來者言。青把都男扯稱阿亥及哈卜慎。莽兀素班不來沙。已至長昂營矣。制置使張國彥。臺御史郝杰。以爲殊不然。青把都住牧插漢我不根。方互市張家口。夙號忠順。曩以十月祭先人冢。常東行。柰何助土蠻爲亂乎。久之寧前錦義外邊諸虜酋。旂鼓相望。結轍於道。我偏裨李寧。柏朝翠。章應選等。十道竝

出分部土河鋪及威寧營右屯營大凌河戚家堡牽馬嶺十三山站撫順所會安堡東州堡鞍山驛閻陽鎮松山店小凌河海州城甜水站草河堡青台峪臺御史及大將軍李成梁軍居中虜竟從長勇堡山河臺深入鞍山驛甘泉鋪休舍分遣精兵攻我海州北關成梁追逐急迺由海州迤東殺略東山閒副總戎李寧兵至牛心山逢虜騎擊破之斬首七級柏朝翠斬首二級奪獲馬三十餘騎盔甲二十餘副餘黨悉引騎並出塞先是上以御史胡克儉奏有詔詔大司馬王一鶚傳與督撫分部將領迎敵截殺毋得逗遛觀望致悞軍機以故制置使張國彥迺以書仰慰宸衷自是之後土蠻老而厭兵邊患稍戢久之以狗馬病死子卜言台周嗣土蠻或名土蠻罕或名土買罕或名察罕兒或名插漢兒土蠻生八子長卜言台周次宰賽兀兒次伯言戶兒次把哈委正次額參次先銀次燒花又言生四子長卜彥伯吉次柏太次卜彥兔始棒棰厓之役其姊執

土蠻手流泣。戒毋復犯薊。今犯薊者數矣。及死。以花桑峪之恥未雪。猶曰。吾甚媿市事未成。反不若俺答子孫。得長王胡中。歲時佩黃金印兩肘間。大如斗也。

讚曰

蠻夷猾夏。豈蔓延至今乎。何其興之久也。土蠻故胡元苗裔。又俺答君長。意中獨戀戀貢市事二十餘年。迺卒不可得。老死矣。假令不殺上郡吏卒。卽縛速把亥。黑石炭等款塞。如俺答獻趙全故事。卽予之以市。亦無不可者。而迺欲以兵要挾我。我誰從哉。禍福無門。唯人所召。土蠻始入遼。終入薊。實西虜三衛實導之。皆於土蠻亡益。自底滅亡。善哉乎。王御史之言曰。異時大可慮者。終西虜非東虜也。

卜言台周。宰賽兀兒。黃台吉。額參列傳

卜言台周。土蠻長男也。甲戌冬杪。常與打來漢。速把亥。黑石炭。黃台吉。治兵插漢腦兒。約曰。五騎馬入廣寧塞。如河凍不可入。入河東。灣弓而馳。矢無虛矣。明年正月。自虹螺山馳遼陽舊城。邊吏見爲虜勢倥偬。亟請於臺御史張學顏。大將軍李成梁。卽提兵出鎮遠堡。以參將馬文龍。把總王大璋。潘燾。爲左將軍。遊擊王咨禹。把總劉崇正。劉希武。爲右將軍。成梁與把總蔣位。高雲衢。軍居中。爲三道。並入匈奴營。行至遼河迤西。去邊可二百七十里。望見卜言台周獵其西。黑石炭震其東。我兵并直前就營。搏戰攻之。虜自度戰不能與漢兵。遂馳歸大營。成梁躬帥三軍追逐。虜反戈接戰。會風沙起障天。寒甚。卒之墮指者什二三。皆奮死不顧生。用鎗礮擊打甚急。虜大敗遯逃。沿山鑽林。斬白牙兒。額兒忒等首四十三級。奪獲馬五十八騎。盔二十九頂。甲二十一副。漢馬死者一十七騎。

三軍皆凱歌。從西興堡入塞。且日日出。卽移師東指。行間。逢副總戎楊騰。言虜已入塞。見塞上烽堠頗精。虜皆偃旗而走。成梁度虜入關。秋毫無犯。勢不能自忍。必復入。入則先出高平。乃移太僕少卿楊愈茂。分守使翟繡裳。趨備胡頃之虜騎果薄廣寧塞。漢出兵鑿之。多所斬獲。卽日馳還。已移壁南鄉海州。東鄉遼陽。復從長勇堡及馬鞍山兩空入。分馳的山。拗鋪虎皮驛。於是成梁帥偏裨李一惟蘇國賦。列左右軍。亦知之。并走煙臺。我師衝鋒斬逼。盡發戰車火器。虜畏甚。唯求得死屍鉤馱而去。又以五千騎爲誘兵。千總王好善。從閒道追至楊家寨。胡騎五千。猝從中起。發鳴鎗。竟中好善。死於野。是夜漢亦使車營礮手數十輩。各持鎗礮。乘虜營鼾睡。鳴礮如雷。虜大驚懾魄。卽起營。往西北走。而遊擊趙應昌。姚大節及參將王永祐。從南往北馳。參將曹簠。郭夢徵及備禦王國瑞。張志遜。楊謙。黃都。馮文弼。孔東儒。從北往南馳。遊擊王惟屏。丁倣。從東往西馳。虜

以精兵殿後。走如脫兔。我師竟追北。斬首捕虜。凡一十二級。奪獲馬三十五騎。虜亦以伏弩射死我官兵王好善與李炳等。凡一十五人。傷凡七十九人。馬死凡九十餘騎。八月。卜酉與速把亥。坤肚兒哈。黑石炭。委正。黃台吉。以兒鄧長兔。煖兔。扯勞亥。大言欲入河東開原遼陽。瀋陽塞。給諫裴應章奏及未然爲備。十一月。卜言台周。黃台吉。黑石炭。以兒鄧堵刺兒。煖兔。拱兔。會速把亥。炒花。摺勞亥。大入瀋陽海蓋。已欲奪廣寧關門。大將軍李成梁。提偏裨宋承恩。夏尙忠。楊子隆。朱文瀚。彭國珍。郎國忠。兵行至盤山。以諸兵爲先鋒。因與參將郭夢徵。馳張繼先屯。虜騎已從平虜堡。南靜九臺入矣。我兵殊疾力戰破之。斬勾茶戶。哈收勤。把安大。把兒孫。李嗑。銷合兒等首。大率二百有七級。奪獲橐駝馬牛羊器械。亡算。語在炒花傳。居二三年。己卯秋。卜言台周。宰賽兀兒。治弓矢諸鬪器。入廣寧。錦義。先是雨雪久。馬牛多瘦死乏食。以故欲略糗糧甚急也。大將軍李成

梁哨至歪頭塙溝。虜騎已從獐驛站墩而入。遊擊將軍王守道。把總王景魁。追逐。斬捕甚多。居亡何。土蠻欲比宣大請馬市。於是卜言台周。宰賽兀兒。大會黑石炭。大小委正等。遂渡黃河。馳那林。去廣寧三日矣。有如市不可得。請以數十萬騎。大入廣寧塞。寧乏金繒林藁乎。臺臣王一鶴。梁夢龍。堅不可許。其十月。引胡騎五萬。從撗喇母林開營。聲欲直走寧遠。漢使诇之。行間逢夷婦孫。言東虜已至土列根。撥拉兔矣。鮮車怒馬。欲以一日而橫行乎黃土嶺。一片石。不則山海中。前所頗有狀。不迺欺也。居頃之。諜者又言。虜至敖木林。已復屯燕河路。臺御史張夢鯉。見爲敖木林。去寧前。輕騎可二日至。去薊門東西。可五日至。乃以書。請治易州城。以易州防秋駐札之所故也。其後辛巳春。卜言台周。與奴木大。黃台吉。黑石炭。大小委正。以兒鄧。煖兔。拱兔。抄戶兒。大會女只罵火屯。並騎馬馳赤納哈氣兒。休舍。佯言吾欲略海西建州。以示漢不意。忽大入廣寧塞。其四

月。市夷哈屯及男煖兒與伯言。卜言台周傳箭入市。欲增賞。弗可得。於是發鳴鏑。中我邏卒羅四。以示威。因執蒼頭軍何曰祿而去。已自知罪成。狂犯守尉。因解縛。與之箭一枝。趨入塞。幸爲我告馬法。請倍恍忽大賞賜。我然後已。參政使張崇功以告。制置使吳兌使備禦使高良弼。譙諭卜言台周。示以生活丹青之信。曰將軍令若等還我所鹵略軍民。軍民有一不幸客死。許若執夷酋獻漢。請贖死罪。然後開市。其後發未春。卜酋乃大會黃台吉。以兒鄧等。欲入遼瀋海州。廣寧迤西。是時阿台及逞仰二奴。並發難至棘。制置使周詠臺御史李松。乃因郵置以聞。居頃之。卜言台周偕青把都。大小委正。耿革兒。以克歹青等。馳黃河以北。而會花大炒花。把兔兒。老撒卜兒愛。卜言顧等。引其眾。西欲攻遼河。因爲約。所不如期上馬。罰酋長馬一百騎。橐駝五十。部落馬二騎。牛四頭。其明年春。土蠻引卜言台周。黃台吉。大會以兒鄧。青把都。土妹扯臣。大小委正。歹青莽。

古素台吉塔塔兒伯戶莽惠拱鬼煖鬼裝兔逞把都及五路男扯勞亥與把鬼兒花大炒花老撒卜兒亥治兵養善木並寇遼海諸郡明年春伯彥太主連四萬餘騎寇鈔寧遠取糧粟能一千石以上頃之又引一克委正二萬騎入開原諸郡其明年冬卜酋將七萬騎屯老河遂侵遼陽其明年十月胡中傳言遼左城垣傾頽數十丈速把亥男把鬼兒土蠻男卜彥卜言台周乃欲窺隙而起大會東虜把漢大成及西虜哈卜慎打來明安謀入遼左爲寇是時黑石炭把漢大成一克大成一克委正滾鬼土妹銀燈亦治兵撣喇母林謀欲入廣寧錦義二郡約分爲二道卜言台周入錦義他台兒入廣寧於是分巡使鮑希顏輒以狀請於臺御史顧養謙乃遣副將軍李平胡將胡鸞李繼武蔣國泰兵八百人出閩陽李寧將李尙仁兵六百人出十三李興將金尙禮閻爭坐兵一千二百人出右屯城查大受將胡文翰熊鑰兵八百人出大小凌河遊擊將軍胡尙忠將

郎顯忠兵六百人。出松杏山。李應時。將宋國賢兵二百人。出晉寧屯。張世爵。將史儒。張國忠兵。出錦州。唐伯美。將熊朝臣。張玉兵五百人。出戚家堡。秦得貴。將陳文德。鐵邦彥兵二百人。出鎮遠堡。詹鞠養。將高仲先兵二百人。出鎮寧堡。喻成功。將佟元相兵四百人。出中安堡。而又遣把總尙傑。將一百人。出大靜堡。魯友時。將二百人。出鎮夷堡。卞世祥。將三百人。出鎮邊堡。劉可學。將二百人。出牽馬嶺。大將軍李成梁。軍居廣寧中。胡騎果馳黃佃子。黑松林。平山。青山。止壁。去邊可二十餘里。謀者望見胡騎十餘萬列營。闊五十。長九十。烽火通於廣寧。錦義乃分五萬騎。從鎮夷堡大邊。下韓口。沙河營入。五萬騎。從白土溝入。謀欲鈔掠郡界。漢出兵逐擊。千弩俱發。虜皆應弦而倒。由此引其眾出塞。居頃之。虜復寇大清堡。備禦使李都。發兵興擊。斬一人。虜馬一騎。匈奴始商軍進退。稍引去。去頭山寺兒溝。自是之後。臺御史顧養謙。見爲虜營旁近鎮夷堡。發三將軍。屯盤

嶺。牽馬嶺。以備之。虜竟從二嶺入。捕殺吏卒。燄侵城堡。漢發兵擊。大破之。語在
把兔兒傳。其後庚寅春。卜言台周。引黃台吉。大小委正等。入遼瀋。開原海蓋諸
郡。寇鈔百姓。制置使張國彥。劾奏副總戎姚大節。有狀。先是大將軍李成梁。發
車騎。詣虜營。虜不敢南下。各鳥獸散。已追逐至河北。再抵雕胥山。去邊已百餘
里。擊破之。斬首虜二百八十級。酋長十三人。奸細四人。奪獲胡馬器械。動以千
數。是歲也。賜李成梁祿米五十石。廕子李如禎。列堂上。僉書管事。廕郝杰。男入
太學。遷李寧都督僉事。吳希漢。李如柏。副總戎。李繼武。遊擊。加鮑希顏。山東按
察使秩視事。它皆賜金幣有差。已祭告郊廟。皆如故事。自後給諫薛三才。稱道
路傳言。言遼左多捕降者爲虜。掘死人以爲獲。請按驗首功。其後癸巳五月。卜
言台周。攜家室。至義州外邊湯池。而以千餘騎。屬小歹青。拱兔台吉。并軍。軍五
千人。從大定堡。于果營。入義州塞。於是備兵使馬時泰。請於制置使顧養謙。帥

遊擊將軍宿振武。千把佟照。王東銘。出遮虜障。虜與漢軍相亂。漢兵與虜騎並馳。斬首五級。鹵獲馬十八匹。虜尤殺遊擊宿振文。中軍夏尙忠。把總宿振義等二十三人。傷家丁杜梅等四十人。奪漢馬三十三匹。過當。遂乘勝走大康堡。祝青營出塞。居四五日。復從鎮安堡北馳者久之。漢發兵追奔。亡所得而還。虜竟以二千餘騎。捕伏鎮北堡外邊紅窯東小台。倉猝從溝中起。漢兵覺。鳴礮矢石如雨下。虜乃以其半。復捕伏堡東廟兒山。半攻城堡。守備使孟宗孔。躬帥蒼頭軍尹世武。阻壕爲險。弓矢鎗礮火箭。一時並發。所擊殺甚多。大率虜滅什二三。是時副總戎姚大節。馳三尖山。遊擊安本固。馳半邊山。將合營。虜望見漢兵益增盛。遂解去。御史周繼翰。見爲數日之間。兩鈔廣寧。至亡道。輒以狀請。其十二月。傳調一克灰正。銀燈。奴木大等三萬餘騎。期上元。佯言略廣寧。遂入遼陽。其明年十月。伯彥。復調一指委正。把漢委正。銀燈。腦毛大。十餘萬騎。竟寇鈔廣寧。

東西。是時卜言台周以眾鳴。把兔兒以強鳴。兩酋相得。甚驩。母厭。於是連騎大入塞。扼三岔河。攻吳家墳。大將軍董一元。卷甲輕舉。長驅三千餘里。逢擊大破之。斬首虜四百餘級。奪獲橐駝馬牛羊。以千數。語在把兔兒傳。其十二月。卜言台周擁精兵。寇鈔我右屯衛。天誘其衷。伯言兒及扯拜授首。伯言兒卽黃台州而扯拜。故一克委正口也。伯言兒最驍勇知兵。虜每出戰。悉聽伯言兒所調度。常以市賞故。名姓數奉御覽。是時卜言台周如失左右手。殊飲恨。乃與把兔兒。得革力台吉。打刺漢。小歹青。銀燈。一克大成謀。謀欲以正月。寇廣寧。寧前。錦義諸郡。以報振武之恥。而會把兔兒。被金瘡竟死。猶豫未發。制置使孫鑛。與大將軍董一元。議守河東。故炒花。煖兔巢也。今伯言兒。把兔兒。後先蚤天。虜營方擾亂。可襲而取。卽以二月。將兵從龍灣。至十方寺。汰其老弱三千。畱居塞下。遙爲聲勢。是夜。以參議使楊高。監軍大方。伯郭性之。參政使梁雲龍。參議使王邦俊。

給餉不乏絕。直抵黑山。旦日天大雪。深數尺。一元引偏將高策等。冒雪而前。日夜裝至拴道去塞四百餘里。忽日晴明。襲虜營破之。得其酋長卜勒亥。汪那呵及首酋百九級。捕得生口十人。奪獲馬五十八騎。我兵亡七人。傷三十三人。漢馬死者五十一匹。於是制置使孫鑛。大會臺御史李化龍。以捷聞。上詔加孫鑛。李化龍。董一元。王邦俊。下部紀錄。孫守廉。復副總戎秩。視遊擊事。它皆賜金幣。有差。卜言台周。或名卜彥伯。或名卜言台住。或名伯彥太主。或名撥言太主。或名卜言台主。先是平虜堡奪獲橐駝二百餘騎。傳致京營。每騎予價十金。悉以佐所司戎馬費。臺御史李化龍。請得著爲令。以鎮武獲橐駝。至九百有二十四騎也。議欲以五百備役路馬價亦如之。它悉以付騎乘。上畱二十騎。供均圍之用。京營於是列胡馬矣。

宰賽兀兒。土蠻次子也。又名柏大。甲午夏。東虜炒花。把都兒。卜言顧。脫合赤。老

撤卜羅愛帥六千餘騎治臨衝謀欲寇鈔我正安堡雙臺大小黑山當是時宰賽兀兒始臨兵業與西虜合營矣先是土蠻卜言台周數爲邊害廣寧錦義尤甚宰賽兀兒亦欲新入是郡也知遼河西涯美水草乃結聯諸胡騎於其下而會夜月明宰賽兀兒以爲稱兵不便遲望後天黑夜續而出遂入錦義顧不愉快耶時宰賽之眾漸至萬騎皆移壁黑山綿塔剋期斬關會西夷捨具以實告於大將軍尤繼先發五將軍軍數千人出擊胡大將及巡使部署諸將張旂幟礮聲震野虜方以二千騎從莽撞湖直擣李高麗略取軍民於是寧前兵使大會諸將下令令軍中毋逗遛毋下馬爭級三軍受令鼓行而前與虜大戰一日破之得甲首一十八級奪獲漢人一百七十六人馬八十四騎牛驥二百二十六人傷尤彪等四十八人漢馬死者五十三匹虜乃從野猪湖出塞始虜敗

時我師斬虜獲生大有功。虜眾大亂。自相衝殺。恐漢兵追欲屠之也。皆雉兔逃至堡南三里。相嚮哭失聲。輿尸而去。

黃台吉別名小黃台吉。土蠻姪也。甲戌冬。卜言台周與打來漢速把亥輩治兵插漢腦兒。時黃台吉引其眾盡從諸酋。明年秋。黃台吉遂爲酋長。於是黑石炭卜言台周以兒鄧堵刺兒。煖兔。拱兔。大會速把亥。炒花。撈勞亥謀欲入瀋陽。海蓋諸郡。久之。胡騎從虹螺山直走舊遼陽城南。旁塞行獵。以誘我兵。語在炒花。卜言台周傳其冬。黃台吉同土蠻從古城堡小關門入。參將郭夢徵提兵至劉指揮屯。虜方分道而馳。見漢兵盛。盡走出塞。頃之復從開原城東大入塞。分爲三營。一營營團山屯。一營營靖安松山堡。一營散四野行劫略。是夜止壁王貴屯。旦日攻城。城中矢石如雨。擊傷甚多。遂解去。其明年秋。黃台吉及速把亥。炒花。哈屯。委正。歹青。堵刺兒。莽忽大。董狐狸。長昂。長兔。大入全遼。於是副總戎曹

薦出瀋陽。參將姚大節出虎皮驛遊擊徐永昌出武靖營。徐國輔出錦州。王大璋出寧前。守備凌雲出奉集堡。千總郎梅出鎮夷堡。劉登泰出中前所。虜益環繞我東塞。阻絕市夷及譯長。從寧前歷錦義廣寧遼瀋。至開原道路不通。低徊者久之。邊備嚴弗入。稍引去。去鈔王台塞。已度漢兵解嚴。窺隙入開原。開原烽火堠望甚盛。復西徙而不敢東向。虜既見東隅弗可入。因佯示北遜。以緩我兵。旦日乘監門或不意。倉猝入威遠堡。備如開原。矢石所擊傷甚眾。皆遁走。先是土蠻有女皎好。黃台吉爲其子求婚。大言若許我。卽以金繒貂裘馬牛羊送若。若不許。請得以橫磨劒刃若塞。土蠻恐啓釁。竟許之。是日刑白馬以盟。遂送土蠻牛馬五十頭。羊二百角。甲一副。土蠻亦致通袖襖十襲。貂豹皮襖三副。藍白布三疋。盔甲二副。已乃戒之曰。旣與阿塞。有百年之雅。自今開原塞不得動一草一木。明年四月。黃台吉帥諸部往海西。行親迎禮如漢。是時塞下傳謂入寇。

或言青把都往鈔朱赤達子。語在給諫蔡汝賢疏。於是開原之外。其從如雲也。
額參。或亦云土蠻子也。丁丑夏。與土蠻及委正黃台吉。那言禿。擣起台吉。拱兔。
以兒鄧五路等。擁五萬餘騎。馳緊水河。聲欲寇東西塞。時土蠻爲主。而額參益
彊。庚辰之寇錦義也。參爲先鋒。引十萬騎。至古北路。會我大將軍李成梁備邊。
乃引去。甲申夏。參以堵刺兒起。復引千騎。應堵酋之召。于是錦義告儆。明年夏。
又偕柏彥務。勺里兔。謀欲寇我廣寧。當路塞。其秋。參又結連以兒鄧。黃台吉。委
正。以克歹青。拱兔。阿民台吉。煖兔。哥兒。大鈔。我沙嶺。我師多所斬獲。自後。腦毛
大及一克委正。把漢委正。復發難。參皆與俱。李羅。胡吉兒。爲左右。我裨將李平
胡往擊之。斬首虜凡二百四十有七級。奪獲馬三百匹。語在灰正及滾兔傳。李
羅。胡吉兒。去邊可三百餘里。一戰而走。由備之嚴也。

讀曰

士蠻之子數人。而卜言台周及宰賽兀兒。乃獨倔強。李彥。炒花。碌碌。因人成事。不足論。獨兩酋不能匡父于正。及父死。猶與西虜距漢。結婚王台。大入小入。歲爲邊患。而竟得全首領。此豈無天道哉。謀之不臧。則債帥責也。

土墨台豬列傳

土墨台豬。土蠻族弟也。土蠻諸部。夙與東夷不善。而所與相煽起者。往往多借勢於西虜。擁眾數十萬。東西逐我水草。兩河之間。不得解甲。丙戌之役。台豬與一克灰正。把漢灰正。攜牛羊糗糧及皮張氈片而至。其爲說。挾土蠻以擾邊鄙。阻我耕牧。我因而許開市。視宣大。諸酋爲快。而制置使王一鶴。念萬世大計。寧大戰。終弗許。諸虜得比宣大事。當土酋之治兵。毋林也。我遼陽將軍楊爍。寬奠將軍王維貞。海州將軍李宗君。寧遠將軍劉登泰。中後將軍祖承訓。長奠將軍王紹芳。亦合兵備河西。會土蠻未至。台豬先遣零騎。馳野豬湖。合把禿兒。炒花。花大老思。卜兒亥之眾。固已八萬。於是臺御史顧養謙。恐土蠻至。而黨益盛。乃大會大將軍李成梁。決筭伐謀。亟徵諸兵赴會。於是義州將軍黑雲龍。鎮武將軍佟養正。正安將軍李維藩。錦州將軍李文芹。如期四集。陣類一字。以大將軍

軍居中出邊。直擣虜巢。行至可可母林。去邊口二百餘里。道逢虜。大戰數十合。擊破之。斬首捕虜凡九百有二級。奪獲馬牛羊橐駝千餘數。盈甲器械亡算。居頃之上。幸從給諫顧九思議。乃遣御史王國弼。按驗首虜。果如幕府所上。乃賜爵賞有差。語在土蠻及一克灰正傳。庚寅。台豬復借兵于青把都。青把都以長昂未至爲辭。至則先往。入寇不利。至八月。土蠻亦藉眾酋而起。待新月上。後馳兩河。向無土蠻。則台豬輒敗。兵家伐交之議。正此類也。

讚曰

令甲以出塞爲生事。撲殺爲啓釁。然律于虜衰之時。則計專于守。今虜勢方張。必按成法以繩將士。則可可母林之戰。獨非出塞□□。今之虜患。正以文皇北伐之後。不復出塞。故虜騎敢于南牧。以戰爲守。政患其出塞之不遠也。封狼居胥之想。諸將勉之。

滾兔。灰正。一克灰正。腦毛大。堵刺兒。小歹青列傳

滾兔。土蠻部夷也。隆慶末。常與腦毛大。董狐狸。治兵。鈔寧前。已與董狐狸。卜言兀。灰正。把都兒。都刺兒。黑石炭。侵苦我守障吏。於是大將軍李成梁。搏戰於亂岡。轉鬪至雙墩堡。虜大敗。進薄雙河城。參將楊騰。疾力戰。破之。自是之後。數奢辱部夷。討孫不賴。討孫不賴。因牽馬牛羊。亡抵於青把都。是時。那莫大亦被困。欲亡去。滾兔乃大會。把都兒。卽引萬餘騎。追至五兔牛臺。御史陳道基得其狀。見爲五兔牛。去馬蘭峪。黃崖口。百餘里。西南可入黃崖口。將軍石關。西可入牆子嶺。南可入馬蘭峪。大安口。乃遣總戎戚繼光。出寬奠。副總戎白福。出松棚。董一元。出牆子嶺。參將張忻。出將軍石關。遊擊李信。出黃崖營。協守史宸。出鮚魚石關。李如樞。出曹家寨。賴邊備至悉。得不入。其明年春正月。滾兔竟引兵。從大定堡西北走。漢使裨將胡鑾。備大康兵。虜因走中寺兒臺。遂入塞。略樵夫王大。

汗等七人。殺馬一騎。欒卽擁精兵。追至賚福驛。去邊六十里。與虜接戰。斬首虜四級。奪獲馬六騎。及所略漢人。餘皆引去。我兵傷王儒等一十三人。馬十七匹。欒復使諜者出大茂堡。訶之既還。至色樹嶺道。逢虜四騎。執一人。斬其首而去。四月。虜騎千餘。馳惡木林。佯行獵。欲謀入前屯。頃之。從永安堡。小川臺東空入。裨將石太柱。張國維。大戰數十合。虜弗敵。遁走。遊擊楊紹勳。度虜不得志。鞅鞅去。必復增兵。大入塞。乃使備禦張應選。捕伏背陰障堡。而虜騎三百。果分爲二部。一部馳永安堡。一部馳河口臺。漢出兵追犇。擊破之。斬首七級。餘黨悉走小川。逢應選兵。斬首虜一級。我官兵傷楊得功等一十二人。漢馬死者一十三匹。而會紹勳及吳進忠。弄璋兵。亦追至前屯迤西長山。虜望見漢兵盛。不可敵。遂引去。於是制置使梁夢龍。臺御史周詠。具以狀聞。自是之後。滾兎與長昂歸正合營。倉猝寇中前所。見漢兵乘邊守塞。甚精明。遂解去。是歲萬曆壬午也。其後

甲申。滾兔與一克大逞。把漢大逞。復聚五千餘騎。屯兀魯班蘇刺哈。欲寇鈔遼左。明年三月。與腦毛大鈔寧遠。其明年冬。滾兔復欲寇廣寧迤東西。先是胡騎入錦州。秋毫無所得。以故虜亦藉藉亡寧日居有頃。胡騎三千。從大興堡三道溝入。我大將軍李成梁。馳閱陽驛。遣參將李寧。備塔山千戶鄒應龍。備高橋及古山。參將李維藩兵亦至。合營。滾兔畏漢兵盛。力弗當。引眾出塞。明年聚十萬騎。自捨刺母林分略廣寧錦義。語在卜言台周傳。後辛卯。速把亥。復使滾兔。腦毛大一克委正。把漢委正等。聚兵捏畱屯。而東虜額參委正。以克歹青。耿革兒台吉。小歹青。拱兔台吉。亦並欲略廣寧錦義。諜者亟以狀請。閏三月。會胡馬方羸餒。制置使蹇達。欲先發以制之。使偏裨李平胡。李寧等。擁精兵數千人。從鎮虜台出塞。越二日至李羅。胡吉兒道逢虜去邊已三里餘矣。與虜騎接戰。自午至酉。虜相引遁去。我師尾其後。旦日復戰至酉。我師大捷。斬首虜凡二百四十

二級。奪獲漢人一口。馬三百騎。盔甲器械。以百數。我裨將亡者。梁朝等三人。軍
崔鸞等一百九十六人。馬九百七十五匹。明年冬。以兒鄧大會哈柰歹青。卜合
腦顏烏龍大哈刺哈五路。委板城上。合諸營。皆縫口袋。期明年上馬鈔廣寧。而
是時火彥罕銀燈黑石得黑籌大成。抽戶更根兒燒大成。方治盔甲及鉤竿斧
子。曰。吾以新歲入廣寧塞可乎。時甲午正月也。於是制置使楊紹勳。大會臺御
史韓取善。並乘傳移廣寧中。以羽檄徵塞上兵。如林而至。夫滾兔甘就撫賞。稱
劖門藩籬。一旦爲虜嚮導。狂逞至此。安用款爲。

灰正。又名炭正。隆慶末。土蠻之發難也。而灰正及卜言兀。把都兒。都刺兒。滾兔。
黑石炭。董狐狸。猶爲小酋長。帶甲一萬。並聚捨刺母林。日夜治裝。以橐駝載鐵
木鉤竿。翦茭乾餼。或鈔錦義。或鈔寧遠。皆爲我諜者所覺。俱以狀告。胡騎果從
高臺堡入。分爲三營。一營馳沙河驛。一營馳迤東。一營馳雙墩鋪。於是參將楊

燉引兵出亂岡臺。逢戰。捕斬甚多。而遊擊將軍李維一兵亦馳至合營。虜復挑戰。我戰車如雲。弓矢如雨。虜度不可敵。亟奔圍沙河驛。大將軍李成梁先已遣偏裨李元善于慶。捕伏驛下。并皆倉猝起。虜始棄鉤杆而去。備禦使葛景岳追亡逐北。至老衝。以火器擊殺甚多。虜皆鉤歟其屍。遂引去。先是胡騎寇黑莊窯。殺備堡者將劉雲登。而會備兵使李松行部。至高臺堡止。傳舍聞之大驚。參將楊燉卽以爲郊迎官。逢虜使使者調之。乃虜騎深入。王乃溝。登迺直追奔。不幸中流矢死。旦日。虜鈔東關驛。略驃五頭。頃之。從河灣臺入關。乃殺一人。略驃五頭。驢一頭。虜乃奔錦川營。小河口出邊。御史朱文科以書劾奏燉。有狀。明年改元。土蠻及速把亥。寇我開原。遼陽。灰正輒提兵七十人。乘東塞空虛。直擣我廣寧東西。已馳錦義諸郡。灰正爲人多智。有膽略。每入寇。輒明目張膽。不欲襲漢。不意常與五路黃台吉。歹青聚兵鎮靖關外。使謀者張復賢。正告關吏曰。吾來。

欲報夙怨。請自關以內。迤東西。橫行義州。大清不使塞上禾稼生長。己卯夏。灰正引千餘騎。往佛延寺。奔鎮靖堡。掘牆而入。備守使劉崇正。出兵大戰。自已至午。擊傷頗多。皆鉤馱入虜營。不以報級。頃以百餘騎。深入渾河。遂捕伏箒溝。誘漢兵。不可得。遂圍攻正義小莊。焚草廬三所。於是漢兵至者。四面俱集。虜遁走。道路皆言。虜將復入。居民洶洶。其秋。果與土蠻罕。他太兒。打來罕。蘇把亥。聚四萬餘騎於好村。刑馬祭旗。欲畢會於磕力曲禮。曰。今茲入遼。所不如約者。罰盜甲馬牛羊。於是牽牛一頭。羊三頭。其明年春。灰正復與土蠻打來罕。聚兵捨刺母林。謀鈔廣寧東西。已欲鈔錦州。已又欲鈔寧遠前屯。以漢嘗殺胡騎六百故也。是時蘇把亥炒花。煖兔伯言。以兒鄧。皆欲入瀋陽。而制置使梁夢龍及臺御史周詠。卽遣使者行邊。兵豫爲備。乙酉。東虜茶回兒。短弓兒。掘起山谷閒。以五萬騎。大入塞。於是寇鈔我遼陽。迤西。廣寧。迤東。黃泥窪。瓢城。是時銀燈亦欲爲。

速把亥報怨。乃大會一克大逞。把漢大逞。哈刺哈。更根及東虜炒花。把兔兒。卜言顧。花大老撒。卜兒艾。西虜以兒鄧。黃台吉。委正。以克歹青。額素委正。拱兔台吉。阿民台吉。煖兔。小歹青。五路男哥兒。並聚兵呵呵莫林。灰正因與之俱。遂決策。欲鈔三岔河西沙嶺迤南。吳家墳。有如泥淖不可入。入錦義清細河。居頃之灰正。果從銀燈及灰正。把都兒。一揜委正。把漢委正。腦毛大。躰戶。伯戶等三萬騎。祭旗纛於搖言。先使諸虜牽馬駝負盛甲糧糧。視山海迤西道。東虜則那彥伯彥打賴。白洪大老沙。西虜則忙金兒。兀魯孩子。獐兔。打來明安哈。卜慎。滿古賽打兒漢。或近塞行獵。或閒易漢服。謀欲窺隙入寧遠前屯及界嶺。義院口諸鎮。於是制置使張佳胤。臺御史顧養謙。大會大將軍李成梁。遣守備鄭應時。出蒲河。參將查大受。出汛河。遊擊胡思忠。出鐵嶺。涂廣。出撫順。唐伯美。出海州。皆聽調度於副總戎楊爍。備河東。胡鶯。出錦義。李平。胡出。大小凌河。備河西。成梁

及參將李寧。李興。出右屯。廣寧。鎮武。吳家墳。軍居中。備兵使任天祚。與民部郎趙三聘。帥廣寧倅支應瑞。轉餉軍中。勿乏絕。是日。平胡從大靜堡尖山門。馳古路半那林。去塞三百五十餘里。捕伏聽諸虜。諸虜方帥千餘騎接戰。平胡疾力擊破之。斬卜兒忒革。卜言兀捨正。首凡一百有八級。奪獲盜凡五十項。甲凡六十一副。臂手凡三十八副。我兵僅亡阿塞一人。亦降夷也。漢兵凱旋。走大清堡。入塞。亡何。漢降夷乃路等七人。出鎮邊堡。走三塔谷。道逢把刺哈。委正部夷也。以駝負盔甲。從委正黃台吉。以兒鄧來會炒花。花大。把兔兒。路中生捕以獻。是時謀欲分鈔東西邊。分守使傅霖。備兵使王緘。乃遣千總馬世龍。移長勝堡。金效葵。移奉集堡。遊擊裴永勳。移武靖營。參將王維貞。移鞍山驛。把總羅維冕。移虎皮驛。指揮宋衛。移十方寺堡。劉嚴。移靜遠堡。千戶楊世英。移上榆林堡。黎文。移長營堡。把總曹養勇。移蒲河城。陳九疇。移會安堡。使譯者蘇文禮及莊達子。

分道而馳。一道馳靜遠堡。一道走上榆林堡。既至大長山。去邊六十餘里。望見胡騎入瀋陽。亟舉烽鳴礮。遠近皆赴。追奔至板橋鋪。胡虜六萬。業已從上榆林堡北。及深入懿路。汎河。鐵嶺。殺略公行。已率二千餘騎。寇會安堡。有參將宿振武。遊擊彭國珍。胡思忠副總戎楊爍。遊擊涂廣。鄭應時。馳盧野鋪夾攻。多所捕斬。虜乃從汎河城出塞。於是備懿路者曰。寇我八里莊及陳五屯。徐千戶屯。孫家小屯。金英屯。魏臺衝。張海屯。王祥屯。于二漢屯。遞運所屯。殺十二人。略馬驥六匹。燒焚室廬一百五十四所。穀垛三十三堆。糗糧四十三窖。備汎河者曰。寇我劉志綱屯。洪杰屯。李千戶屯。白聰屯。麻線衝屯。宋家屯。劉京屯。蔡宣屯。盧千戶屯。溫玉屯。周三屯。汪鐵屯。段家屯。劉指揮屯。殺裨將曾尙忠及男子三人。略二十九人。牛馬驥一十五頭。燒燬室廬一百一十七所。穀垛一十八堆。糗糧五十九窖。已攻門西。燒燬演武廳八所。樟杆一根。城東殺四人。略馬驥三頭。焚燬

房廬一十五所。葛秫頭一垛。穀垛一堆。糗糧二窖。復攻門東弔橋。有守將查大受。伏其下。大戰而退。備鐵嶺者曰。寇我馬官兒屯。陳指揮屯。李家莊。金干戶屯。蕭家溝屯。舒元俊屯。南塔寺項坤屯。顧官兒屯。祁家小屯。遼海屯。糗糧茭草。鹵掠殆盡。居頃之。虜復合謀入寇。成梁欲以先聲奪之。卽提精兵。至長勇堡。下令降夷家丁。逢虜卽殺。使彼疑懼。卽從瀋陽上榆林堡出塞。行一百五十餘里。至江山道。逢數十騎鏗戰。大破之。斬首虜一十五級。奪獲盔七頂。甲七副。馬十五騎。虜度勢孤。遂引去。

一克灰正。土蠻部夷也。癸未冬。土蠻欲寇我山海關。而灰正首以兵從。粟馬惡力曰。吾部五萬餘騎。今以三萬騎闖漢關而已。二萬騎堵口子。使遼左無彈丸阻也。後一年。灰正與滾兔合。又欲寇遼東。寧遠。而灰正則又慮薊兵出戰。乃遣滾兔引五百騎。伏黃土嶺。一片石。如漢兵至。猝從中起。漢兵進不得攻。退不得滾。引五百騎。伏黃土嶺。一片石。如漢兵至。猝從中起。漢兵進不得攻。退不得

守。將必坐而自斃。明年春。灰正果與把漢台猪。合三萬騎。至捨刺母林止壁。期土蠻男李彥伯。彥兔。煖花。相與犄角。而自引兵十萬。馳廣寧關下。要講市賞。計以漢不與賞。卽以十萬騎。鈔漢塞。是時王一鷗爲制置使。市賞竟不可得。且大發兵出邊。從鎮邊堡行二百餘里。至可可母林。胡中望見兵來。輒相傳報。虜始被甲赴戰。大將軍李成梁帥士卒疾力戰。自辰至未。矢礮俱發。聲振天地。虜大敗走。成梁追奔。至穹廬。大破之。斬虎兒處把禿等首。凡九百有二級。奪獲馬凡一千三百一十三騎。橐駝三頭。牛一百二十七頭。盜甲器械亡算。使至御前宣捷。祭告郊廟如禮。詔以大司馬張佳胤議。歲加李成梁祿米五十石。金錢幣帛有差。語皆在土蠻傳。是年冬。加兵備使葉夢熊秩。視參政。從臺御史蹇達。御史韓國禎請也。是後土蠻伯彥令灰正與銀燈。奴木大。引三萬騎。寇遼陽。灰正佯言寇寧前。度漢塞不我備。然後深入遼左。此虜中故智。豈得與持重者敵哉。

腦毛大亦土蠻部夷也。居部中久。亡所知名。壬申夏。始與炒蠻。滾兔。董狐狸。從小河口圍我東關驛。參將楊騰遊擊傅廷勳擊之。勢如席卷。盡棄鐵木鉤杆走。我兵追至碾盤山出塞。頃復聚兵東行。謀欲寇寧前。其秋。從黑石炭。伯顏兀。把都兒。聚兵捨刺母林。諸酋趨治裝行。腦毛大曰。吾必待月老。然後傳發。將入義院界嶺之間。市夷以其狀來告。制置使劉應節。臺御史楊兆。遣遊擊將軍馬承胤。備建燕。大將軍戚繼光。備燕河石門。臺頭。山海。有頃。胡騎竟入黑莊。築仙嶺寺。是年。莊皇帝晏駕。寇多事有日矣。給諫蔡汝賢奏免兩臺護駕。庶得備邊。其冬。腦毛大。董狐狸。益縱諸部。旁塞行獵。微使五百騎。捕伏杏樹溝中。以誘漢。漢兵果至。虜倉猝中起。持滿拒漢。我戶百儲朝先及軍士。多中流矢死。會漢兵馳救。引去。後丙子。腦毛大從速把亥。寇河東。已寇廣寧。錦義。自後卜言台周及黃台吉。克石炭。大小委正。以兒鄧。煖兔。拱兔。抄戶兒。大會女只罵火屯。亦欲寇廣。

寧。本腦毛大謀也。後癸未冬。聚兵萬餘騎。馳廣寧關下。請市。其乙酉春。與土蠻六萬騎。寇鈔三岔河東。遼陽迤西。及金復海蓋諸郡。頃之。從滾兔五百餘騎。小入寧遠東西。已從委正長昂。謀入寇。已從一指委正。把漢委正。合三萬餘騎。馳負盛甲糧粧。間易漢服。視道路。語在委正傳。明年四月。復牽牛羊至廣寧。請馬市。辭至桀驚亡道。久之。腦毛大治兵七萬騎。止壁舊遼陽。副總姚大節備虎皮驛。孫守廉備遼陽。虜果以萬騎分馳。分二千騎。從小團山。黎園走。二千騎。從塞尖山。歪頭山走。三千騎。從大定堡。五能營走。三千騎。從大勝堡。大尖山走。皆外邊制置使張國彥。郵置以聞。後腦毛大。與一克把漢。更根兒大成。滾兔。並聚兵捏畱屯。寇廣寧及錦義。語在滾兔傳。腦毛大。始亦薊門撫夷也。以寇遼故。自嬰大罪。不可赦。每至廣寧關下。自張家口市夷。竟無復與請者。

堵刺兒。與土蠻。打刺罕。並起。始發難時。打刺罕寇我遼東。堵輒以三萬騎往。後

從卜言兀。捨勞亥。寇廣寧錦義。時董忽力渡灤河。亦鈔我羅文。馬蘭。給諫張書。以忽力小酋。止三百騎。而敢鼓行塞上。焉用將爲。至明年。堵復從卜言兀。速把亥。黃台吉。寇我錦義。則萬曆甲戌也。明年春。大會卜言台周。打來罕。黑石炭。歹青。委正。土買罕。長兔。煖兔。拱兔。抄忽兒。六萬騎。並聚插漢腦兒。在廣寧北。乘夜移壁海州。與遼瀋相鄉。頃之。從長勇堡。高架于臺北。馬鞍山南。兩空入。攻我山拗鋪。虎皮驛。李成梁發兵擊破之。擊殺甚多。皆駝負其屍。不及首級報。五日。堵與擺言兀。黑石炭。黃台吉。萬餘騎。寇謀錦義。先馳柏凌河。而會山上礮鳴。虜知有備。亟麾兵走。隨擊寧遠塔山。山城斗大孤懸。而守禦有法。堅弗可下。虜中精兵善馬。俱被殲焉。切齒恨曰。秋後禾登。必報此役。中夜偃旗而去。諜者聞其哭聲。數月不止。志雖必報。眾弗從也。改走舊營。延袤二十餘里。中分道。一道正西。一道西北。會大風雨。咫尺不辨。虜將乘此以窺塔山。塔山備禦如故。望而膽裂。

皆棄旗鼓北走。久之。海州被掠婦女李蔡。自堵營亡入漢。稱擺言兀久物故。戒諸虜毋妄言。其大言復入塞者。實欺謾漢。諜者陳加友。從大寧來。道逢敗虜重傷者凡數十人。皆棄置橐裝。往西南去。加友熟視橐中。得口袋。袋有鐵錘。小羊皮及皮襖四。甲包二。皮包一。加友捨歸。恐吏弗我信。亟斬諸死。夷首二級。馳還。已諜者李得全。從大福堡出哨。至二百里外。虜騎少者四三十多者五六十。相望于道。而皆散漫唏噓。殊無鬪色。亦傷而未死者也。十一月。黃台吉。黑石炭。卜言台周。以兒鄧。煖兔。拱兔。大會速把亥。炒花。擣勞亥。起兵。時堵乘眾。從廣寧。斬關。而入我瀋陽海蓋。公行殺略。語在卜言。炒花傳。其十二月。與黑石炭。委正。王買罕。長兔。拱兔。炒忽兒。謀欲寇廣寧。先使那哈乞。往哈喇聚兵。是時。長昂不入貢者已久。意欲阻喜峯爲險。屬夷以告。備不得入。明年冬。堵與速把亥。炒花。哈屯。委正。歹青。黃台吉。董狐狸。莽忽大。長昂。長兔。聚兵三萬。鈔全遼。明年春。治精

兵四萬會哈卜慎莽兀歹往長昂營祭兩酋因而合營堵不能自立矣。或言入遼或言入山海皆以辭驕而退丙戌長昂大會堵刺兒董狐狸打來明安兀魯孩子謀入寧前土蠻亦會諸部寇廣寧錦義與眾誓曰不如約者罰馬十騎囊駝一頭總以累敗之後挾眾爲勢虛聲言寇言鈔而處處有備能不坐而斃乎小歹青堵刺兒男也庚辰秋土蠻寇我錦義歹青輒輸肝膽爲我謀焉明年秋克石炭以兒鄧卜言兎阿夷首難歹青又反以兵從非眞能附漢者佯言曰吾欲寇遼以欺漢胡騎竟從長安堡直奔新城渡河東走副總戎曹簠及鎮靖守備使劉崇正追奔可三里許道逢虜虜縱精兵二千餘騎鑿戰我將校多受傷略人民畜產甚眾我兵止得首四級馬二十四騎御史于應昌以書劾奏事下大司馬梁夢龍請寬假臺御史周詠分守使張崇功大將軍李成梁罪上從之於是罷副總戎曹簠遊擊張崇功任而以守備崔吉吳胤祖下御史逮問小歹

青爲人柔弱。因人成事。乍順乍叛。反覆亡常。癸未。速把亥死。而卜言台周起。乃與青把都言鬼。大小委正。耿革兒。以克歹青。大會黃台吉。拱鬼。卜克扯臣。奘鬼。以兒鄧。渡黃河迤北。往南走。時速把亥死。虜祕言之。有脫落指以告。而小歹青。故朵顏人。亦告卜言台周急。明年夏。歹青。會額參委正。引千餘騎。寇鎮靖關。明年秋。歹青。與以兒鄧。黃台吉。委正。以克歹青。拱鬼台吉。阿民台吉。煖鬼。及五路男哥兒。聚兵呵呵莫林。鈔寇我三岔沙嶺。語在灰正傳。明年冬。歹青。從大小委正土妹台吉。耿革台吉。哈兒趁。捨利大。青把都兒。卜言顧。從外邊平山迤西。黃佃子起兵。大入錦義。語在炒花傳。明年。歹青。與卜彥太主。大小委正。土妹台吉。捨刺大台吉。及紗花。把都兒。並壁黃佃子。黑松林店。辛卯。引額參委正。以克歹青。耿革台吉。拱鬼台吉。寇我廣寧迤西。語在滾鬼傳。癸巳。歹青。及台周五十餘騎。從大定堡。入義州。乙未冬。台周鈔右屯。漢出兵破之。殺委正男扯拜黃台吉。

於是。歹青。從卜言台周。耿草台吉。打來漢。銀燈。一克大成。聚三萬騎。略廣寧。以報右屯之役。大將軍董一元大破之。斬首虜凡一百有九級。奪獲生口十人。馬牛橐亡算。明年丙申。歹青誨禍款塞。引旁塞諸虜乞歸降。向因邊吏不通胡音。通事多恣巧詐。撫之則請增餉。勦之則苦鑿空侵盜之慘。歲無虛日。時房山故令俞方策。以久任寧夏。習知胡音。且馴夷性。歹青每至義州求貢。輒與親盟。譯者不能設詐。方策撫以私恩。憚以漢法。虜親畏之。稱俞那顏。稱俞太師。進止惟命。當道聽爲指南。而忽以計黜。制使乃特疏請白。兵家使過使功。不可拘以吏議。今房山舊吏俞方策。才與地相宜。功與過不相掩。請以邊才起用。居官幣故。詔從之。諸虜因是束手。歹青昔日大言。所爲誘兵伏兵分兵合兵者。曾不能索一飽。樽俎折衝之說。于此見之。

讚曰。

土蠻部。以十萬數。滾兔六七酋最大。要之藉兵於西虜。藉耳目於三衛。灰正置不論。獨怪滾兔。腦毛大。就賞薊門。旋入遼爲寇。是可撫哉。歹青。一朶顏夷也。自以漢可欺謾。日言寇鈔。有兵無餉。窮而乞市。貢道已絕。此亦自欺謾也。

勘誤表

第一三三頁第三行

澆兔營則滾。兔營之誤

武功錄自序

龔九思殊驚悟。典謨虞廷作堯若舜微。但故純王蓋帝者。乃其曰。誰敢不讓。敢不敬。應亦若自侈其威德者然。矧七旬三危。若乃聖乃神。乃武乃文語。又必以奄有四海。四夷來王終之者何。蓋離大人以繼明。照四方。至貴倨矣。乃上九亦必曰。王子出征。有嘉折首。獲匪其醜。然後能重明麗正。得化成天下。則前聖長慮。卻顧多暇心。可相見已。或謂方今重熙累洽。而天幸上又以聖神文武臨況之。疑武功錄可無作。恐祇足導人主好大喜功。顧九思所以得就成此。亦大艱難矣。歲甲申。余不幸得罪。過之不意。囚繫武昌獄以三年。久之。於法當徙居庸塞里。中父老若親友門人憐余非罪。念余自茲出國西門外。與桑梓且生死辭矣。塞上不毛地。慮余或困苦貧窮。餓死塞外。不復得還。上先人丘壟。乃相率醵金錢。得百餘。惠贈余。爲塞上歿身計畫。已乃它旁郡邑聞。亦多來相餞送。遂天幸得二百金。乃買一妾姚。并擣兒子甲。行赴闕受遣。因撻擊登聞鼓。上書北闕下。賴天子哀憐。臣得逡巡未輒發。京師戒嚴。余風聲鶴唳。虛恐爲遷卒捕得。乃出帝城西百里許。竇德城高叟家止舍。余故有微名。東西南北燕。

薦青衿士。傳聞余在寶德。率遠近裹糧行百餘里。畢來受學。余或與談學。或與談制義。或與談文章詞賦。或與談二氏。或與談經國大業。二三子率鼓掌蹈足。謂得未曾有。各人人得所意欲去。余乃作一聯句曰。埋沒豐城。望霄漢斗牛龍劍。乾坤難合。經過薊野。相驪黃牝牡馬羣。朝暮將空。高叟乃大書。趨刻之。令高懸寶德城樓。公卿冠蓋過其地者。多問訊余所在。或言在高叟家。多返旆下車見訪。若是者。蓋輪蹄相接踵無虛日。於是長安薦紳。多盛言九思非罪。久之。相國怒亦寢以解。丁丑庚辰。余更再伏闕。有詔下所司行楚中推勘。楚當事念余當出關。設驛報。卽不得久畱止中國。乃故緩不報。以故余得畱寶德以五載。余揣知難且解。乃變易姓氏。曰吾陳姓。往往騎一驥。或附載大車中。微服入京師。余故無妻孥。念里中若旁郡邑所惠遺我橐中裝。無慮二百金。將安所用。卽出塞。居庸去陵寢不百里而近。九思馮持列聖寵靈。或不至竟窮餓死黃雲白草閒。乃日走禮部前正陽門外雙塔寺演象所左右。從康王陳李諸書肆窮搜索。每三日必一至。至卽移日。甚或至夜分乃去。諸書賈殊厭苦之。久之。聞六科有存科。蓋日紀載綸音簿籍。余乃從所知交在省中者購得密登錄之。乃執是走

抄報所。稽其日全報章。設率與存科合。無闕遺。乃愉快。取大卮酒。飲數升。設第闕一疏。必多方謀之四方。至七八年。必盡得乃已。京師故重書。卽小交際。亦必以一書包裹。帖金其內。題其刺曰。小書。余念其中或庸有奇祕書。乃屬諸把賣從薦紳家僮奴收買。設其家故名家多書史。即盡令諸把賣持來余邸中。驗問有邊事。輒多金市易之。所知交有仕宦在四方者。余必卑懇詞。乞其以羌虜倭蠻名籍事狀。幸告詔我。久之。幸稍稍多所得。第所得羌若倭朝報事狀。以戊子冬十有一月十四日。若辛卯正月十四日夜。盡燬于火。自恨余兒時。第多讀三蘇語。苦才筆陋惡甚。諸所就業無文章。乃市買班馬書。以數十。親點竄至十餘。每種必別變置法。生剗剗之。諸奇字剩語。若批亢擣虛亂趨倒走法。舉無不字模句擬。方繆敢操筆札。蓋三閱歲。乃幸就次。既就矣。余取自披讀。大愧死。此何者語。乃敢曰列傳。當亟盡投畀烈燬中。已復自念。方今水旱屬頻仍。閭閻空竭。有司一不戒。諸羣不逞。若楚劉汝國。吳羅朝廣。越丁士卿。閩柯守岳。粵東林道乾。西楊秀。大梁車宗孔。蜀九絲。秦楊戩。晉王漢臣。魯侯沐封。滇緬甸夜郎安國等。率往往陸梁鼓噪。如蝟毛而起。烏夷播州之役。天戈凡再指。而後僅能

定之不無事矣。正虞書鋪張舞兩階竄三危時也。九思識慮誠淺小。第所見僅及此。以故作茲錄。爲上五十壽。及觀大雅江漢詩頌。四方旣平。時靡有爭。而末亦歸本。天子萬壽。天子萬年。其所頌矢。文德洽四國。正虞書誕敷文德。舞干羽兩階意也。九思此錄。未必非虞書若意旨。倘幸徵皇上靈寵。四方郡國得多付剞劂。或鄉置一部。家藏一帙。令華夏蠻貊霜帽日域。傳相告語。則帝光天之下。至于海隅蒼生。萬邦黎獻。度且盡寒心銷骨。罔復有敢越厥志。此卽與詰戎兵陟禹跡胡異。竊妄意所裨補。或亦不甚小。夫安可以導人主好大喜功。小之哉。

時萬曆歲在壬子夏五月二十有五日。翰林院添註待詔臣翟九思謹序。

萬曆武功錄總目

山東

王登列傳

卷之一

北直隸

西山珠窯房山易州諸礦盜列傳

羅道教侯表列傳

叛僧王鐸如燈王善列傳

叛民王志孝列傳

京營叛兵列傳

西城易州邯鄲通州諸鄉馬盜列傳

閘河賊陶文列傳

草賊張從敬列傳

饑民王友臣列傳

萬曆武功錄總目

山西

王登列傳

叛生侯沐封列傳

德平叛民列傳

山西

饑民王漢臣列傳

礦盜王張住列傳

礦盜張守清列傳

宣大鎮

史二官車達鷄列傳

河南

礦盜王西庵鹽盜塗四列傳

白蓮教喬濟時曹嵩列傳

一

張小村列傳

江賊何旺李七列傳

饑民車宗孔列傳

海賊嚴大邦列傳

王自簡列傳

湖盜殷應采列傳

陝西

運河賊劉朝列傳

礦盜楊戩列傳

合肥山陽諸強賊列傳

回夷列傳

蘇松諸強賊列傳

茶盜楊四列傳

流賊楊儒列傳

曹進禮列傳

崇明江陰諸鹽盜列傳

囉賊馬有忠列傳

揚州通州饑竈列傳

寧夏鎮

饑民姜柰史存列傳

哱拜哱承恩列傳

叛僧省悟列傳

叛民帥嘉謨倪伍徐宗式朱漢卿列

南直隸

卷之二

傳

叛兵陸文緒傳胎子列傳

馬蹟洋爛洪口諸倭列傳

朝鮮梁承貴列傳

浙江

大營叛兵馬文英象山昌國營叛兵

何中列傳

上虞叛民丁仕卿列傳

叛生張綺呂協祖列傳

楊文學列傳

崇德強賊梁翰列傳

嘉善強賊列傳

江西

花園洞陶洪楊白列傳

建昌諸盜列傳

流寇羅朝廣列傳

安遠賊葉楷李圓郎列傳

饑民胡佩三列傳

湖廣

款人劉應葉國瑞列傳

兪處劉堂良草坪石纂祿列傳

牛角尖大盜列傳

山賊劉汝國列傳

山賊周志棋列傳

叛兵王禮董承恩張鎖兒張勝豪列

福建

傳

莆田游天王柯守岳列傳

鎮海龍王宮諸倭列傳

卷之三

廣東

巢賊賴元爵藍一清諸會嶺東殘寇

列傳

鮑時秀列傳

六灣諸山賊列傳

岑崗江月照列傳

山賊陳金鶯羅紹列傳

山賊黃高暉海賊許俊美列傳

林道乾諸良寶林鳳列傳

李茂列傳

蛋賊蘇觀陞周才雄梁本豪列傳

林奇材魏朝義黃應敷黃瑞劉興策

列傳

羅旁猺浪列傳

黎岐列傳

羅定東山叛兵列傳

王三唐景松列傳

惠潮廣州諸倭列傳

卷之四

廣西

府江右江諸猺列傳

懷遠諸猺獞列傳

永寧洛容諸猺獞列傳

岑溪潘積善諸猶列傳

北三譚公炳河塘韋宋武諸猶列傳

十寨諸猶列傳

馬平韋王明諸猶列傳

高江諸猶列傳

懷集嚴秀珠諸猶列傳

土吏黃拱聖列傳

山賊楊秀列傳

流賊黎福莊黃邦緣列傳

叛兵呂子和張鳳梁一貴列傳

安南

莫茂洽列傳

卷之五

四川

凌宵都都寨九絲諸蠻列傳

傀廈羌列傳

丢骨人荒沒舌列傳

白草風村野猪窩諸羌列傳上

白草風村野猪窩諸羌列傳下

羅打鼓諸羌列傳

楊柳羌列傳

樹底空撒列傳

元壩潘喃商巴石觜列傳

建昌桐槽黑骨諸夷列傳

膩乃列傳

土吏馬邦聘馬應龍列傳

土婦奢世統。奢世續。列傳。

叛兵范大龍。列傳。

叛民瞿旦。列傳。

播會楊應龍。列傳上。

播會楊應龍。列傳中。

播會楊應龍。列傳下。

卷之六

貴州

安國亨。列傳。

定智。列傳。

奢效忠。列傳。

王之佐。列傳。

草坪天漂諸苗。列傳。

毛吳墜。長牛阿田。諸苗。列傳。

也香狗場者亞。答干鷄賈甲多。列傳。

銅仁龍木恰。吳老天。諸苗。列傳。

彭必信。列傳。

皮林苗吳國佐。石纂太等。列傳。

雲南

鐵鎖普羅思。諸夷。列傳。

別者電記來阿烟矣。允。諸會。列傳。

緬甸。列傳上。

緬甸。列傳中下。

緬甸。列傳下。

羅雄者繼榮必六。列傳。

金騰•姚安叛兵列傳

卷之七

中三邊一

俺答列傳上

俺答列傳中

卷之八

中三邊二

俺答列傳下

黃台吉列傳

不他失禮•沙赤星列傳

扯力克列傳

卷之九

中三邊三

波兒哈都台吉列傳

三娘子列傳

把漢那吉列傳

昆都力哈•青把都•白洪大•哈不慎•滿

五索滿五大列傳

永邵卜大成台吉列傳

合羅氣把都兒台吉列傳

哈喇慎著力鬼把都兒台吉•銀定把

都兒台吉列傳

哆羅土蠻把都兒黃台吉•麥力哥•克

臭•列傳

火落赤列傳

擺腰把都兒•兀慎打兒漢台吉列傳

卷之十

東三邊一

土蠻列傳上

土蠻列傳下

卜言台周宰賽兀兒黃台吉額參列

傳

土墨台豬列傳

滾兔灰正一克灰正腦毛大堵刺兒

小歹青列傳

卷之十一

東三邊二

王台列傳

虎兒罕赤猛骨李羅康古六歹商溫

姐列傳

逞加奴仰加奴列傳

卜寨那林李羅列傳

王兀堂趙鎖羅骨列傳

奴兒哈赤列傳

王杲列傳

阿台阿海阿革來力紅列傳

卷之十二

東三邊三

速把亥列傳

卜言兔卜言把都兒列傳

炒花花大列傳

老撒卜兒艾列傳

卷之十三

東三邊四

黑石炭列傳

大委正列傳

董狐狸兀魯思罕長昂列傳

猛可真小阿卜戶列傳

大嬖只炒蠻列傳

趕兔倒布列傳

卷之十四

西三邊

吉能把都兒黃台吉隱布台吉銀錠

台吉土昧阿不害威正恰把不能

卜失兔阿不害俺墜阿害虎來不

罕同阿只鬼滿金台吉列傳
卑不利阿不害把都兒拓不能阿拜
戶拓不能禿退台吉阿計大台吉
哈漢把都台吉圪塔台吉把禿台
吉至利台吉寨桑拓不能沙計台
吉討太把都兒拓不能耽戴捨吉
列傳
切盡黃台吉切盡妣吉那木歹台吉
滿克素阿不害碑馬鬼阿不害阿
著鬼阿不害折答答阿不害滾吉
阿不害打正台吉白馬台吉成把
都兒告素阿不害脫計阿不害打
刺克漢阿不害列傳

萬曆武功錄總目

明愛台吉切盡罕同列傳

莊禿賴孟格台吉麟素兒拓不能列

傳

炒忽兒卜打什台吉列傳

或收氣黃台吉捨刺乞捺道化列傳

萬曆武功錄總目終

中華民國貳拾五年六月重印

(實價國幣壹元五角)